

# MATEUS

## Unâ Koendonro Jesus Cristo Wâgâ Mateus Inweniby

*Xirâ livru wâgâ inwenily Mateus nhangahu odaji iemâmy Deus. Awylygue Deus itaumbryrlâ xirâ Mateus nhegatyby. Jesus nhapygueni, aguely idani warâ ewy myakâwândy Mateus.*

*Kâmakerim Jesus Cristo wâgâ kiuntuhoem myakâwândy Deus xirâ inwenien-honly. Xirâ livru wâgâ Jesuslâ, Messias awyly kiuntuly, mâkâ Deus “Igonose urâ” kehobyry. Jesus iazehobyry wâgâ, âdy waunroem aini awyly tiuntuhoem ximukâ enuagaeni modo xyrense idâhobyry wâgâ, José, Maria, iamudo warâ Egitoram âwientomobyry wâgâ, târâpa odopâdomobyry wâgâ warâ xirâ aguely.*

*Tâlâ xirâ wâgâ “Jesus iwy wâgâ unâ nhegatuhoobyry.” Jesus aguely: “Koendâ lelâ âduerymo xurâem aitaungâ. Tâpeânzeba itaungâ. Ipa kydato xuduze lelâ Deus.” Turâ modo tonomedâze lâpylâ, âdara Deus agâ aguelymo awyly wâgâ. Xirâ iwenihobyry wâgâ tutuze kurâ, Deus kywymâry awyly, âdy xyppyry etay aini modo awyly warâ.*

### Jesus Cristo idamudo

*(Lc 3.23-38)*

**1** <sup>1</sup>Jesus Cristo wâgâ ise unâgu. Davi iweryppyry myakâwâm Jesus Cristo, Davi pylâ Abraão iweryppyry-ro warâ. <sup>2</sup>Saguhom kuru ise Jesus idamudo kâengatuly, Abraão donropyrylâ, pymâ Daviram. Abraão myakâwândy Isaque nhunwym; Isaque, Jacó nhunwym. Jacó, Judá, iwaigordolâ warâ nhunwym. <sup>3</sup>Judá, Peres, Zera warâ nhunwym. (Tamar myakâwândy isemo ezedy.) Peres, Esrom nhunwym. Esrom, Arão nhunwym. <sup>4</sup>Arão, Aminadabe nhunwym. Aminadabe, Nasom nhunwym. Nasom, Salmom nhunwym. <sup>5</sup>Salmom, Boaz nhunwym. (Boaz ise myakâwândy Raabe keho.) Boaz, Obede nhunwym.

(Obede ise myakâwândy Rute.) Obede, Jessé nhunwym. Jessé, Davi nhunwym.

<sup>6</sup>Jesus idamudo ise iwerâ kâengatuly, Davidâpalâ, kypemugudo sawâtybyem Babiloniarum satyby modoram. Kydamudo iwymâry ton-honreim, tynrenseim warâ myakâwândy Davi. Davi, Salomão nhunwym. (Bate-Seba keho agâ imerymo. Urias iwidyppyry myakâwândy mâkâ.) <sup>7</sup>Salomão, Roboão nhunwym. Roboão, Abias nhunwym. Abias, Asa nhunwym. <sup>8</sup>Asa, Josafá nhunwym. Josafá, Jorão nhunwym. Jorão, Uzias nhunwym. <sup>9</sup>Uzias, Jotão nhunwym. Jotão, Acáz nhunwym. Acáz, Ezequias nhunwym. <sup>10</sup>Ezequias, Manassés nhunwym. Manassés, Amom nhunwym. Amom, Josias nhunwym. <sup>11</sup>Josias, Jeconias, iukonodolâ warâ nhunwym. Israeldâ Jeconias pymâm

awyly ume myakâwândy kydamudo adaholy Babiloniarum. Iweâpa myakâwândy Babiloniadâ awylymo, tâtymo anaxilâ odopâdomoem en-hem kehomba tawylymogue.

<sup>12</sup>Jesus idamudo ise iwerâ kêngatuly, kydamudo Babiloniarum satoem sawâtyby modo dompyryenlâ, Jesus iazehobyryram. Jeconias, Salatiel nhunwym. Salatiel, Zorobabel nhunwym. Akaemo ume myakâwândy kydamudo Babilôniadâpa odopâdylymo tâtymo anaxilâ. <sup>13</sup>Zorobabel, Abiúde nhunwym. Abiúde, Eliaquim nhunwym. Eliaquim, Azor nhunwym. <sup>14</sup>Azor, Sadoque nhunwym. Sadoque, Aquim nhunwym. Aquim, Eliúde nhunwym. <sup>15</sup>Eliúde, Eleazar nhunwym. Eleazar, Matã nhunwym. Matã, Jacó nhunwym. <sup>16</sup>Jacó, José nhunwym. José akâwâm Jesus nhunwym-em ini, Maria agâ tohogüinduo. Jesus ani Maria imery. Jesus mawânkâ Cristo kelygue tâzekeim, Messias “Deus Ingonotyby” keze aguely.

<sup>17</sup>Jesus idamudo merâ kêngatuly: Abraão donropyryem katorze lelâ iepadomobyry, Daviram; eagonro katorze modo lâpylâ Davi donropyryem israelita domodo Babiloniarum satyby modoram, eagonro katorze iepadomobyryem lâpylâ Jesus iazeho odaxi.

### Jesus iazehobyry

(Lc 2.1-7)

<sup>18</sup>Jesus iazehobyry wâgâ ise unâ kêngatuly. Pekodo Maria keho myakâwâm ise. Uguondo José keho agâ ohogüinrim wâne myakâwâm mâkâ. Ohogüinlymo iraynâlâ olâ myakâwâm Deus Ispiritury eon-honrugue adamyly. <sup>19</sup>Moisés inweniby ara lelâ adâidyse do myakâwâm mâkâ José. Maria imegu tiuntuduo olâ myakâwâm imoze tâzeke, âdykâ aniempyra tawylygue. “Eagonro

uguondoram adâiehoze keanra awâkâ” tâkeduo. Aituo tutuzebalâ imoze kely, Maria tâwentâzeba itoem. <sup>20</sup>“Âdara ise awidyly-ro?” kely ume myakâwâm, nhâenkyem Deus eanjury âepanâ-guely; eyam aguely myakâwâm:

—José, Davi iweypyry, tywypazeba ikâ Maria agâ ohogüinze. Tymegue lelâlâ wâne, âdaunlo uguondoram nâdynanâoba olâ. Awâkâ pekodo iodano iamudo, Deus Ispiritury awâkâ xuguni. <sup>21</sup>Uguondo ise awâkâ imery. Awâkâ iamudo wâgâ ise Deus kurâdo nhemakely, inakanhe aitomobyry nhygakely warâ. Awylygue ise “Jesus” kelygue mâenzetâdyly —kely myakâwâm anju Joséram.

(“Jesus”, “Kâmakerim” keze aguely.)

<sup>22-23</sup>Iweâpalâ myakâwândy Isaiás aguely:

“Pekodo âdykâ uguondo  
nhynanâdânry adamyze.  
‘Emanuel’ kely ise imery  
ezedy”

kewândymy Isaiás tinweniby wâgâ.

(“Emanuel”, “Kagâlâ Deus” keze aguely.)

Jesus iazeduo, aguehobyry aralâ myakâwâm aidyly.

<sup>24</sup>Kopaelâgâem myakâwâm José, anju aguehobyry ara aidyly. Maria tagâ nhedyly. <sup>25</sup>Nynanâbyra olâ myakâwâm, imery saguho iazeho odaxi kehoem. “Jesus” kelygue myakâwâm iamudo nhezetâdyly.

### Ximukâ enuagaeni modo Jesus eydâ atoram idâhomobyry

**2** <sup>1</sup>Jesus iazely myakâwâm xidadâ imeimbyry Belémdâ, Judéia eynynâ, Herodes pymâem awyly ume. Jesus iazepygueduo, xixi ega-seho eynynonro modo ewy idâlymo myakâwâm xidadâ Jerusalémram. Ximukâ enuagaeni modo myakâwâm

akaemo, âdy aini awyly tiuntuhoemoem. <sup>2</sup>Saintybyem myakâwâm tonlo modo nhapâiguelymo:

—Âdykâka iamudo judeu domodo iwymâryem iazepy? Xixi egaseho eynynâ ani xina ximukâ nhedyly, iazehobry xutuho. Enado âzeguhoam ise, ehoguze warâ xina âewyly —kelymo.

<sup>3</sup>Egary tindatuo, toenzepa kehoem myakâwâm pymâ Herodes âseguâdâdyly. Toenzepa lâpylâ myakâwâm mârâ xidadâ odano modo âda tâidyly nutuba idylymo, âseguâdâdylymo warâ. <sup>4</sup>Aituo Herodes, kurâdo eynynâ Deus agâ aguwâni modo iwymârydo, Moisés inweniby wâgâ enomedâni modo warâ indâtyguyly, tyampâiguehoem:

—Âdykâka ise Messias Deus Ingonokyly iazely? —kely.

<sup>5</sup>Aituo in-hogulymo:

—Belémdâ ise iazely, Judéia eynynâ. Warâ myakâwâm Deus itaumbry ega-tuimbry Miquéias inwenily:

<sup>6</sup> “Kydamu Judâram xuduypy onro odaylâ myakâwâm awârâ xidadâ imeimbyry, Belém. Tâwâlâ lelâlâ wâne mârâ xidadâ imeimbyry awyly.

Alâ olâ ise mârâ xidadâ egary, târâ pymâ ton-honreim iazely awylygue.

Israelita domodo iwymâry ise mākâ.

Kanery eni modo tâguy nhedyly ara ise tynynonro modo nhedyly’ nygue Deus”

kewânmy Miquéias tinweniby wâgâ —kely judeu domodo iwymârydo Herodesram.

<sup>7</sup>Aituo myakâwâm Herodes, akaemo ximukâ enuagaeni modo ingâsenhonly, eagâmo lelâ adâkehoem. Saintuomo, adapâigueolymo:

—Âdaraka ani mârâ ximukâ Messias iazely xutuho âepanâguely? —kely.

Aituo tientobry nhगतulymo.

<sup>8</sup>Aguepygueduomo, eyanmo aguely:

—Inepa Belémram idâwâtaungâ. Koendâ iamudo âdykâ awyly xutuwâdaungâ. Mâentuomo, yam egatuwâdaungârâ. Udâdyse lâpylâ urâ myarâ, enadoram âzeguhoam ise, koendonroem awyly wâgâ auguehoem —kely Herodes; kewâdyly kulâ olâ myakâwâm.

<sup>9-10</sup>Ilâpygueduo, ximukâ enuagaeni modo âxiguelymo. Belémram idâlymo myakâwâm. Tâtâdaymolâ, ximukâ xixi egaseho eynynâ saguhoem tien-tybymolâ nhetonguylymo kau wâgâ. Toenzepa kehoem myakâwâm iomazelymo mârâ ximukâ tientonduomo.



(Mateus 2.9-11)

Iwaunrorumoenlâ mârâ ximukâ idây, idâhomo tânehonze. Iamudo eydâ ato nhangawaym myakâwâm ximukâ epagudyly. <sup>11</sup> Âtâ odaji egawântybyem myakâwâm iamudo nhedylymo Maria ihuay. Iamudo enado âzeguhoam idylymo, tynrense tawyly tienehon-homoem. Ilâpyryem tysejiguy etary nhenahunguelymo. Iamudo xurâem tiantyby nhudulymo: ouru, incensu tyânringuneim, mirra warâ.

<sup>12</sup> Ilâpygueduo myakâwâm kopae nhâenkymoelâ Deus eyanmo aguely: —Herodesram egatuze todopâzebane itaungâ —kely.

Aituo tâty anxilâ odopâdylymo eagonro ânwa oze, Jerusalém einkâ sakadânry oze.

**José, Maria, Jesus warâ  
Egitoram âwientomobyry**

<sup>13</sup> Ximukâ enuagaeni modo idâpygueduo myakâwâm anju âepanâguely Joséram, nhâenkyem. Eyam aguely:

—Autaungâ. Inepa tarâpa itaungâ. Merâ iamudo xuien-honze enra Herodes, tyâen-hon-hoem. Egitoram âwientaungâ iamudo agâ. Târâlâ wao itaungâ. Âgâsezemo urâ, modopâdomoem —kely.

<sup>14</sup> Anju agueduo myakâwâm inepa kehoem José saudyly. Kopaelâ kehoem âwiendylymo iamudo agâ Egitoram. <sup>15</sup> Herodes iguely ara myakâwâm târâ awylymo. “Egitodâba ymery xigâsedâ” kewândymy Deus, Oséias inweniby wâgâ. Jesus iamugâry Egitodâba odopâduo, Deus aguehobyry ara kehoem myakâwâm aidyly.

**Herodes iamimeom  
nhâen-hon-hobyry**

<sup>16</sup> Ximukâ enuagaeni modo tonokudobyry tiuntuduo myakâwâm Herodes iewiâpadyly. Aituo tyzodadury modoram aguely:

—Belémram idâwâtaungâ. Iamudo uguondo imeombyry xyâwâtaunda tâjihuanu modo dompyryem, azagâ anupeom modoram xyâwâtaunda. Idânârâ xyâwâtaungâ, xidadâ odano modo, poji anano modo, xidadâ iwaguepaom modo alelâ —kely.

Jerusalémdâ tatay, ximukâ enuagaeni modo aguewânмомy: “Azagâ anu sakadyby wâgâ akâwâm mârâ ximukâ pymâ iazely xutuho xina nhedyly” kewânмомy. Aguehomobyry wâgâ myakâwâm Herodes, idânârâ iamudo uguondo imeombyry tâjihuanu modo dompyryem, azagâ anupeom modoram nhâen-honwâdyly, âdykonlo pymâem ini awyly nutuba tawylygue. <sup>17</sup> Arâ myakâwândy Deus itaumbryry ega-tuimbyry Jeremias aguehobyry ara aidyly:

<sup>18</sup> “Xidadâ Ramádâ kurâ domodo tytyrungue toenzepa eogunrumo xina nidadâ. Tymeombyry xyâhobyry wâgâ Raquel eogunru xina nidadâ. Ânguy nhetubanâguelyemba itynrumo idânârâ tymeombyry xyâhobyry wâgâ” kewândymy tinweniby wâgâ.

Jeremias inwenihobyry ara kehoem myakâwâm Herodes uguondo modo imeombyry nhâen-honwâdyly. (Israel iwydy Raquel iweompyrylâ mawânkâ israelita domodo.)

**José, Maria, Jesus warâ  
Egitodâba odopâdomobyry**

<sup>19</sup> Herodes igueduo myakâwâm Deus, tyanjury Egitoram ingonodyly, José xuruse. José xykyly ume myakâwâm anju âepanâguely nhâenkyem. <sup>20</sup> Eyam aguely:

—Aukâ. Israelram odopâgâ, iamudo, ise warâ agâ. Mâkâ iamudo tyândyseudonro modo ipa, niguemo —kely.

<sup>21</sup>Aituo myakâwâm José, Maria, Jesus warâ saudylymo. Israelram odopâdylymo. <sup>22</sup>Saintybyem myakâwâm “Arquelau pymâ, Herodes imerybyry, tunwym ejipyano” kely indadyly. Awylygue myakâwâm José eanu myarâ Judéia yan-yam idâze, “Pymâ iwelo iamudo xyâen-honze enra” tâkeduo. Nhâenkyenlâ olâ myakâwâm Deus aguely:

—Galiléia yan-yam âxidâdaunda —kely.

Aituo Galiléia yan-yam âxidâze idâlymo. <sup>23</sup>Xidadâ Nazarédâ myakâwâm âxidâdylymo. Iweâpa Deus itaumbry egatuwânybyry modo, “nazareno” kelygue âzezekeoze kehomobrylâ. Nazareram iamudo Jesus agâ âxidâze idâduomo, Deus aguehobry ara aidyly.

**João kurâ domodoram Jesus  
âewyly wâgâ aguehobry**  
(Mc 1.1-8; Lc 3.1-17; Jo 1.19-28)

**3** <sup>1</sup>Tâlâ myani uguondo João Batista keho Judéia eynynâ. Âji âdy peba atodâ myani mâkâ âxidâdybyem awyly. Deus itaumbry mykâinane nhegatuyl kurâ domodo myarâ idânri modoram. <sup>2</sup>Alâ mykâinane aguely:

—Âjityendaungâ, inakanhe kulâ amitombry wâgâ. Deus izepa ato aiedyly imowâdaungâ warâ. Iweâpa nitaymba ise Deus Ingonotyby âewyly. Kywymâryem ise —tâkeze mykâinane.

<sup>3</sup>Warâ myakâwândy Deus itaumbry egatuimbyry Isaías inwenily João Batista wâgâ:

“Messias wâgâ agueim târâ âji  
âdy peba atodâ ise aguely.  
Adâkely idase idâwâtyby  
modoram:

‘Inepa ise Deus Ingonotyby  
saindyly.

Izepa ato aiedyly  
imowâdaungâ.

On-hondybyem lelâ itaugâ,  
aguely mâindatomoem.

Pymâ ton-honreim kâty anaxi  
âewyly kiuntuduo wâne,  
kâty inatary tuonse, tuonkeze  
warâ kurâ,

myara on-hondybyem lelâ  
kydawyly aguely idase’ ”

kely ise mâkâ unâ egatuim, warâ myakâwândy Deus itaumbry Isaías inwenily.

João Batista myani Kywymâry saindyly egatuim. <sup>4</sup>Camelu xuhudugue xygatyby mykâinane João ety iwogonro, âdy pebaom ety iwogonro emyenro kulâ. Tâjitubygue kulâ mykâinane iwanxiegu. Kahuli, penrâ warâ mykâinane ipyniry. <sup>5</sup>Jerusalémdâ tâtyuneim modo, Judéia eynynonro modo, paru Jordão emelano modo warâ tâtâzemo mykâinane João aguely idase. <sup>6</sup>João aguely tindatuomo myani toenzepa kurâ domodo aguely eyam:

—Deus izepa ato aieni xina. Adâidyly tumoze olâ xina-ro warâ —kelymo.

Arâ agueduomo myani paru Jordão ikay Joãoram batiza âieholymo, Deus izepa ato adientombry wâgâ tâjityenze tawylymo tienehon-homoem, inakai modo adientyly imoimbyryem tawylymo tienehon-homoem warâ.

<sup>7</sup>Agui kehoem myani fariseu domodo, saduceu domodo warâ Joãoram batiza âiehoze idâlymo. Tutuze olâ myani João, akaemo nâjityembyra awyly Deus izepa ato adientombry wâgâ. Awylygue aguely eyanmo:

—Âgâu poji âdugueuly ume âsema-gueze kewâni ara kulâ âmaemo! Warâ wâne amyguelymo: “João batiza kyetuo ise kydâsemagueuly. Deus

kânagazedaymba ise” myguelymo. <sup>8</sup>“Deus eynynonro urâ” myguelymo wâne, Deus eynynonro keba olâ âmaemo. Deus izepa ato amânhe-  
tomobyry wâgâ tâjityenze mawylymo enehorim aietaungâ, inakanhe amidylymo imoimbyryem mawylymo mânehon-homoem warâ. <sup>9</sup>“Deus kânagazenehonwâbyra ise, Abraão iweonma kurâ” tâkezeba itaungâ. Abraão iweryem tadawlyly mâkeba mârâ kuru. Âdy mâkeba awârâ! Auguely xirâ âyanmo. Ton-honre Deus, xirâ tuhu modo Abraão iweryem ienehonze. <sup>10</sup>Nady koendâ ewisedânry pygue satâly. Iwindy âzesagueoly. Peto onwanji adameoly alelâ aieholy. Nady koendâ ewisedânry ara kulâ âmaemo. Deus izepa ato mâinmopa âmaemo-ro watay, inepa ise Deus inagazenehonlymo.

<sup>11</sup>—Urâ pygueduo eagonro âese lâpylâ Deus wâgâ aguenri. Ton-honreim ise mâkâ, iemyenro keba. Mâkâ ise yakadâ kuru ton-honreim. Ihuru etary sanienlâ witoem nudupa lâgâlâ. Urâ parugue batiza âenimo, Deus izepa ato amânhe-  
kylymo wâgâ tâjityenze mawylymo mânehon-homoem, inakanhe amidylymo imoimbyryem mawylymo mânehon-homoem warâ. Mâkâ âeni olâ ise Deus Ispirityry xudunri, eynynâ mawylymo xutuhomem. Inakanhe amitomobyry xygakeze, peto wâne saxium nhaduândyly âpa ezay myara. <sup>12</sup>Trigu ekaunâni wâneam tudua-  
keze ewy nhekaunâdyly myara mâkâ. Tynynonro modo iduakewâze ejidy tâkehobyryanlâ ise nhekanâdyly, trigu etary kehobyry odaxilâ ekanâdyly myara. Tynynâbaom modo olâ typygueba kehoem enagazeze peto âdaunloenlâ nhântânry onwanxi ise nhamely —kely João.

### João Jesus batiza nhetobyry

(Mc 1.9-11; Lc 3.21-22)

<sup>13</sup>Alâ myani Jesus Galiléia eynynâba idyly, paru Jordâoram idâly, João batiza tyetoem. <sup>14</sup>João myani batiza tiendyseba, Jesus tynrenseim kuru awyly tutuze tawylygue. Aituo aguely:  
—Batiza âetoem yam mâewyly. Âmâlâ yakadâ kuru tynrenseim. Âmâ batiza yekâ —kely João.

<sup>15</sup>Warâ olâ Jesus aguely:

—Ize wato aralâ nidâ. Batiza yekâ. Ara ise Deus ize ato aguiendyly —kely.

Aituo João âkeá kely. Jesus batiza âieholy myani, Deus eynynonroem tawyly tienehon-hoem.

<sup>16</sup>Jesus âjikaguely paikayba. Âjikaguebygueduo myani kau âzenahunguely nhedyly. Papaem myani Deus Ispirityry xytâgyuly, ekadyly nhonwa. <sup>17</sup>Aituo kau oday Deus itanru indadyly lâpylâ:

—Ymery toenzepa kâinwynegyuly merâ, toenzepa womazeâni —kely myani Deus.

### Deus ize ato araba Jesus aitoem,

#### Satanás aiese kehobyry


(Mc 1.12-13; Lc 4.1-13)

**4** <sup>1</sup>Ilâpyryem myani Jesus adaholy Deus Ispirityryam âji âdy peba atoram. Tarâ myani Deus izepa ato anhetoem Satanás aiese kely wâne. <sup>2</sup>Quarenta iguandyly, quarenta emedyly warâ myani Jesus nâwinduapyra awyly. Alâ myani toenzepa kehoem ewindupadyly. <sup>3</sup>Aituo Satanás eyam saindyly, aguely:

—“Deus imery urâ” mygueansema. Âkealâ kuru amyguely-ro watay, awârâ tuhu pãoem iekâ pylâ —kely.

<sup>4</sup>Aituo myani Jesus aguely:

—Amygnehobyry agânhetaymba ise urâ.



(Mateus 3.13-17)

“Pão kiendawynlygue lelâ inkâba  
kyiguepa kydawyly.  
Idânârâ Deus agueho  
kieinwândyly, aguiendyly  
warâ watay,  
kyiguwâpyra kurâ”

kely mawânâ Deus itaumbry awo  
wâgâ iweniby —kely Jesus.

<sup>5</sup>Ilâpygueduo myani Satanás, Jesus  
nhadyly Jerusálêmram. Deus ijidadâry  
kelygue tâzekeim myani mârâ xidadâ.  
Deus ety nhangakuedaji myani  
nhadyly. <sup>6</sup>Aituo aguely:

—“Deus imery urâ” mygueansema.  
Âkealâ kuru amyguely-ro watay,  
tarâpa onro onwa adamegâ. Mâdyâ-  
wâpyra ise âmâ. Warâ mawânâ  
iwenibyem Deus itaumbry awo wâgâ:

“Deus nhese lelâ.

Anju domodo igonose awâniem.

Âihugueduo, awâse lelâ

tâmarygue,

âda mipyra mitoem, âhuru tuhu

onwa nâdyâpa itoem warâ”

kely iwenibybe mawânâ —kely Satanás.

<sup>7</sup>Aituo myani Jesus eyam aguely:

—Onro onwa kadamewâbyra ise urâ.  
Warâ lâpylâ iwenibyem awyly Deus  
itaumbry awo wâgâ:

“Deus imakelymo mâentomoem  
kulâ, kâmayno  
akâiedaundâ.

Amidylymo-ro watay,

mâinwâmpyra mawylymo  
kulâ ise mâenehonlymo”

warâ lâpylâ iwenibyem awyly —kely  
Jesus Satanásram.

<sup>8</sup>Ilâpyryem myani iwy kaynonro  
onwa adaholy Satanásram. Idânârâ  
onro anano modo nhenehonly; idâ-  
nârâ âdydo imeom iwâkuru modo,  
tâwâenseim modo warâ nhenehonly.

<sup>9</sup>Aituo myani aguely Jesusram:

—Idânârâ awârâ mâentaynly modo  
âyam xuduze urâ, ienado âzeguhoam  
midyly yrentoen-ro watay —kely.

<sup>10</sup>Jesus aguely:

—Âyrentoem inado âzeguhoam  
witaymba ise urâ! Deus itaumbry  
awo wâgâ iwenibyem:

“Kywymâry Deus enado lelâ  
âzeguhoam itaungâ.

Aguehobry ara lelâ aitaungâ” kely iwenibyem. Idâ, Satanás. Tarâpa ikâ —kely Jesus.

<sup>11</sup>Aituo Satanásram âjionly. Satanásram âjiompygueduo myani anju domodo saindyly, Jesus eydâ atoram xuahuze, idânârâ ize ato modo xuduze warâ.

**Jesus Galiléia eynynâ tâwanu  
nhaguhobry**

(Mc 1.14-15; Lc 4.14-15)

<sup>12</sup>João Batista kadeia oday kely tindatuo myani Jesus Galiléia yan-yam idâly. <sup>13</sup>Xidadâ Nazaréamba olâ myani odopâdondyly-ro warâ. Xidadâ Cafarnaumdâ myani âxidâdyly, Galiléia iwalu iwaguepa, saguhoem kydamudo Zebulom, Naftali warâ eonronruem xuduypy eynynâ. <sup>14-16</sup>Enanâgüewâdaungâ saguhoem Deus itaumbry egatuimbyry Isaiás inweniby:

“Kydamudo Zebulom, Naftali  
warâ eonronru  
Galiléia eynynâ ejiku, paru  
Jordão kuynâ,  
tuomareim kuru ise âmaemo  
judeu, judeu keba alelâ,  
mârâ anaym tâjikuneim modo,  
âdaralâ Deus itaumbry  
mâuntuba olâ âmaemo.  
Awylygue toenzepa âiguelymo  
mâyntadylymo,  
mâseguâdâdylymo warâ.  
Deus wâgâ âzenomedâoze olâ  
âmaemo,  
iajinu odano aramo lelâ ise,  
iamu odanopyryem”  
kewândymy.

<sup>17</sup>Deus xunâry egatuze myan-yam Jesus idâduo, Isaiás inweniby ara kehoem myani aidyly. Târâlâ myani Jesus unâ nhegatuly adaguly. Alâ myani aguezesedyly:

—Âjityendaungâ inakanhe amitomobry wâgâ. Inakanhe adâjidyly imowâdaungâ warâ. Arâ lelâ ise Deus âwymârymoem awyly —kezesedyly.

**Jesus kanra awâni modo  
tynnonroem ingâsedobry**

(Mc 1.16-20; Lc 5.1-11)

<sup>18</sup>Paru Galiléia emelay tadakobâday myani Jesus azagâ uguondo nhedyly, iwaigoru, iukono warâ; Simão Pedro, André warâ. Âedâgue kanra sawâni myani akaemo, vende tientoem. Âedâ paikaji nhamedaymo myani Jesusram âzeholyo. <sup>19</sup>Azakâlâram myani Jesus aguely:

—Âtâeungâ. Saguhoem kanra keankâ mawelymo; iwerâ kurâ domodo ynnonroem itoem unâry egaturin-em ise âmaemo —kely.

<sup>20</sup>Inepa kehoem myani âedâ kanra sawâto inmolymo, Jesus eynnonroem tâitomoem, Deus wâgâ tiuntuhoem.


<sup>21</sup>Tâtâday myani Jesus azagâ uguondo modo nhetondyly, Tiago, iukonolâ João warâ. Zebedeu imeombyry myani akaemo. Ekadybymoem myani tywepiry oday tunwym agâ. Âedâ kanra sawâto myani kua nhekylymo, kopaelâgâroem. Aituo myani Jesus akaemo ingâsedyly tynnonroem itoemoem. <sup>22</sup>Inepa kehoem tywepiry odayba idylymo. Tunwym tyânzemo myani, Jesus agâ tâtâhomoem.

**Jesus kurâ domodo  
nhenomedâdobry, tâwânuneim  
modo kua nhetobry warâ**

(Lc 6.17-19)

<sup>23</sup>Idânârâ Galiléia eynnonro âtâ anakâ myani Jesus sakadyly. Âtâdyguyhomodâ mykâinane Deus wâgâ nhenomedâdylymo. Deus iwy-mârymoem idyly wâgâ mykâinane





(Mateus 4.18-22)

unâ iwâkuru nhegatuly. Tâwânuneim modo, âsenagazeni modo warâ kua tyese mykâinane. <sup>24</sup>Tâinkâ lelâba myani anhekyly egary idâly Síria eynynâ. Aituo pylâ myani tâwâneim modo Jesusram nhadylymo-ro warâ. Âdaunlo tâzewânulâ kua nhekyly. Kadopâgue taseim modo kua nhetaynly. Ekomani modo kua nhetaynly. Adakobâdânry modo kua nhetaynly lâpylâ warâ myani. Idânârâ tâwâneim modo tyam idâypy kua tyese lelâ myani. <sup>25</sup>Toenzepa myani kurâ domodo nhapygue awyly, Galiléia eynynâba âetaymby modo, Dez Xidadâ anano modo, Jerusalém donro modo, Judéia eynynonro modo warâ, paru Jordão kuynonro modo lâpylâ warâ.

**Jesus kurâdo iwy wâgâ  
âtdygyby nhenomedâdobyry**  
(Mt caps. 5-7)

**5** <sup>1</sup>Toenzepa kehoem myani kurâ domodo Jesus eydâ atoram idâly. Arâ kurâdo tientuo myani iwy onwa âkuly, ekadyly warâ. Eynynonro modo iopaji idylymo myani. <sup>2</sup>Aituo myani kurâ domodo enomedâdily Jesus nhaguly.

**Âdara tojiomaru kuru awyly  
xutuho**  
(Lc 6.20-23)

<sup>3</sup>Aituo Jesus aguely kurâ domodoram:

—Tuomareim kuru mâkâ, Deuslâ idânârâ tâlâ tato xuduim awyly xuturim.

Imâemba lelâlâ wâne, Deus kaynonro olâ iwymâry, eni warâ.

<sup>4</sup>—Tuomareim kuru mâkâ iwerâ âjityeni.

Itynru ume, Deuslâ mawânkâ ise iomazeâni.

<sup>5</sup>—Tuomareim kuru mâkâ tâlâ tato modo wâgâ kulâ sawoem itânry.

Deus tynynonro modoram, “Xuduze urâ” kehobyry emakeze mawânkâ.

<sup>6</sup>—Tuomareim kuru mâkâ

Deus ize ato modo lelâ adiyndyse donro.

Kurâ tâwinzeim, tatuanzeim warâ wâne pyni, paru warâ lelâ ize ato, myara lâpylâ Deus ize ato lelâ adiyndyse awyly.

Idânârâ ize ato xuduze Deus,  
ton-honre lelâ tâinwântoem.

7—Tuomareim kuru mâkâ âkelo  
modo ityeni.

Deus mawânkâ ityenze lâpylâ.

8—Tuomareim kuru mâkâ Deus  
izepa ato aniempyra  
tâitoem Deus xurâ modo  
wâgâ lelâ âtynanâni,  
Deus eydâ atoram idâze  
mawânkâ.

9—Tuomareim kuru mâkâ,  
tâdâtuebadyly,  
tâdâsegyebyly warâ  
adain-hoem aini.

Tymery ara lelâ mawânkâ ise  
Deus nhedyly.

10—Tuomareim kuru mâkâ Deus  
ize ato ara aidylygue  
tânagazezeim.

Deus kaynonro mawânkâ ise  
iwymâry, eni warâ.

11—Ynyonro mawylymogue,  
ynynâbaom modoram âjiewiâse-  
oze âmaemo. Âunâguezemo.  
Inagazenehonze. Âwâgâmo kewâ-  
dylymo kulâ ise warâ. Arâ wâne ise  
amyguehonlymo, tuomare lelâ olâ  
ise âmaemo. <sup>12</sup>Tytywanzeba itaungâ,  
tuomare lelâ. Deus olâ eydâ tatodâ  
imâem âyanmo nhudulype, omaze-  
ânimo nhekanâdybybe. Deus izepaom  
modoram mâzenagazeolymo. Alâ  
mykâinane Deus xunâry egatuim  
modo nhenagazedilymo lâpylâ —kely  
Jesus.

**Jesus, “Peku, iajinu warâ  
emyenro âmaemo” kehobyry**  
(Mc 9.50; Lc 14.34-35)

<sup>13</sup>Aituo Jesus aguely:

—Peku pyni tâkubâzeânze, podô  
niwânzeânehomba warâ, myara  
âmaemo taunlo modo ywâgâ amygue-  
lymo, kurâ domodo yeinwântomoem,

inakanhe nâiehoba itomoem warâ.  
Peku onro agâ on-hoam ityby olâ pyni  
ikaji ietoem nudupa. Âdaitoem ânguy  
ize inkâba. Awylygue adameoly lelâ,  
adakabeoly warâ sakani modoram.

<sup>14</sup>—Iajinu, iamô oday kydadako-  
bâdo kiento nhesagonly myara ywâgâ  
mâuntuen-honlymo. Koendâ kehoem  
wâne xidadâ iwy angatay saunâ-  
tyby edyly myara ywâgâ totoenzeba  
aguewâtaungâ. <sup>15</sup>Lamparina kienmanâ-  
dyly watay, âdyly iaxi kioentaymba  
kurâ. Kayanlâ kianlokuândyly, idâ-  
nârâ âtâ odano modo nhesagon-hoem.  
<sup>16</sup>Lamparina kaynâ ekanâdyby ara ise  
koendâ amidilymo âzeholy idânârâam,  
Deus mâinwândylymo warâ. Koendâ  
amidilymo tientuo: “Koendonroem  
unwânmo Deus kaynonro awyly” ague-  
honze —kely Jesus.

**Jesus Moisés inweniby  
wâgâ aguehobyry**

<sup>17</sup>Jesus aguely:

—“Jesus aguehobyry lelâ iwerâ kyzein-  
wâne, âdaitoem saguhoem Moisés agâ,  
tunâry egatuwâni modo agâ warâ, Deus  
aguehobyry kienwântaymba kurâ”  
tâkezeba itaungâ. Deus Moisésram kêze-  
wenry inwenien-hoymby koendâ kuru  
mâuntuhomoem xirâ kêwelyly, mâin-  
mohomoem inkâba. <sup>18</sup>Kau, onro warâ  
tâlâ awyly ara, Moisés inweniby tâlâ lelâ  
lâpylâ ise; tugukewâduneba ise xypyry  
etaji kehoem. Iwenihobyry tokalâ  
letralâ tygakeduneba ise. Xirâ mawân-  
râ mâuntudyzemo kuru wato. <sup>19</sup>Moisés  
inweniby modo ewy einwântânry, kurâ  
domodo mârâ neinwâmpyra itoem  
aguenri watay âdy mâkeba ise mâkâ,  
Pymâ Deus nhekyly modo duay. Deus  
Moisésram kêzewenry inwenien-hoymby  
ara aini, kurâ domodo enomedâni  
waunlo watay, tywyneim ise mâkâ  
Pymâ Deus eydâ atodâ. <sup>20</sup>Warâ âyanmo

auguely. Fariseu domodo, Moisés inweniby wâgâ enomedâni modo warâma koendâ aini, tâkewâze kurâ. Kurâ domodo tynrentomoem kulâ olâ akaemo aidyly-ro warâ. Deusgue âwymâgumo ize mataymo, kurâ domodo ize ato ara kulâ aini modo takaze Deus ize ato aie-taungâ —kely Jesus.

### Ânguy kienwiâsebyra kine

<sup>21</sup>Jesus aguely:

—Tydaselâ âmaemo, Moisés kydamudoram aguehobyry: “Ânguy kâdyâwâtaundâ. Kyâimpyry pymâ domodo xyâen-honze lâpylâ” kewândymy Moisés. <sup>22</sup>Urâ olâ warâ âyanmo auguely. Deus enanaji, kagonro kienwiâsedyly, inakai kuru, ânguylâ kyânly aralâ lâpylâ. Awylygue kyewiâsenibe-ro watay, adaholy pymâdoram âzenagazehoem. Âkelo xunâguenibyry tribunalram sadyly lelâ, setenta pymâ tynreim modoram âzenagazehoem. “Tuândy kulâ âmâ” keypy watay, samely lelâ peto nhântânry onwanji. <sup>23-24</sup>Tâwâlâ lelâlâ wâne Deus etydâ mawylymo, âdylâ Deusram egameze, târâ mawylymo ume, mâdunâgueohomobyry mâenanâguelymo-ro watay, Deus xurâem mantybymo târâlâ wao nhânwâtaungâ, mâengamebamolâ. Waunroem mâkâ âewiâsenimobyry agâ âtunâguedaunda wao. Koendâ lelâ agâmo-ro watayma tâwâlâ Deus etyram modopâdylymo, Deus xurâem mantybymo egameze.

<sup>25</sup>—Ânguylâ tribunalram adysemo watay, waunroem wao eagâ koendâ âtunâguedaungâ, agâmo tyewiâseba itoem. Arâ amipyra âmaemo-ro watay, tribunalram asemo. Târâ ise; pymâ domodo polícia domodoram igrâeinmo-ro warâ mâzetadâohoem. <sup>26</sup>Dinheru mâempywadomoem

juiz aguehobyry idânârâ mâempywa-byra âmaemo-ro watay, igasewâbyra ise âmaemo târâpa. Arâ lâpylâ Deus agâ koendâ itaungâ koendâ mitomobe awyly umelâ. Xirâ mâuntudyzemo kuru wato —kely Jesus.

### “Eagâ mohogüin-homobyry keba kulâ kâdynanâdaundâ” Jesus kehobyry

<sup>27</sup>Jesus aguely:

—Tutuzelâ âmaemo Moisés inweniby: “Âwydymo keba kulâ kâdynanâdaundâ” kely myakâwândy inwenily. <sup>28</sup>Urâ olâ warâ âyanmo auguely: Uguondo pekodo enupegyugueni, tynanâdyze, iwydy keba olâ waunlo, inakanhe mâkâ xunâgu tyangahu oday. Nynanâbyra wâne, arâlâ olâ âzewentâ-oly Deusram. <sup>29</sup>Inwentânehoinmo Deus mâendysebamo ato kâzetaundâ. Koendâ tâise azakâlâ inumo etyly, Deus mâendysebamo ato mâempyra mitomoem. Koendonro kuru tânuembalâ Deus agâ tadawyly; idânârâ kodo peto nhântânry onwanxi adameoly mawânâ koendâpaom kuru. <sup>30</sup>Deus xurâem inwentânehoinmo akâie-daundâ imarymogue. Koendâ tâise imarymo satâly, samely warâ, Deus izepa ato amânhepyra mitomoem. Koendonro kuru tâmaguebalâ Deus agâ tadawyly; idânârâ kodo peto nhântânry onwanxi adameoly mawânâ koendâpaom kuru —kely Jesus.

### Jesus tâdâximoly wâgâ aguehobyry

(Mt 19.1-9; Mc 10.1-12; Lc 16.18)

<sup>31</sup>Jesus aguely:

—Tutuzelâ âmaemo Moisés inweniby: “Pekodo eagâ mohogüin-homobyry mâinmodyze âmaemo watay, tâwâlâ imowâdaungâ. Âdaituo mâinmolymo awyly xutuhoem pape mâinweniby

olâ eyam xuduwâtaungâ” kely myakâwândy inwenily. <sup>32</sup>Urâ olâ warâ âyanmo auguely. Âdaituoba kulâ âwydymo kâjimowâdaundâ. Eagonro uguondo agâ ituo lelâma pekodo imoly. Pekodo imoyby agâ ohogüimby watay Deus izepa ato ara kulâ lâpylâ aidyly. Deus xurâem, waunroem eagâ ohogüimbylâ mawânkâ iso kuru —kely Jesus.

**Jesus aguienkyly kykehobry  
wâgâ aguehobry**

<sup>33</sup>Jesus aguely:

—Tutuzelâ âmaemo Moisés inweniby: “Deusram amyguehomobry watay, aietaungâ lelâlâ; amyguehomobry amânhepyra tâiseba itaungâ” kely myakâwândy inwenily. <sup>34</sup>Urâ olâ warâ âyanmo auguely. Âdaunloenlâ Deus ezedy âwankuem kâietaundâ. “Mâkâ kaynonro tutuze âkealâ auguely awyly” tâkezeba itaungâ. “Mâkâ kaynonro” myguelymo-ro watay, Deusranlâ amyguelymo lâpylâ, kaynâ ejidy awylygue. <sup>35</sup>“Mâkâ onro xyganipyry âkealâ auguely awyly tutuze” tâkezeba itaungâ. Deusranlâ arâ amyguelymo. Deus mawânkâ onro anaynlâ lâpylâ. “Mâkâ Jerusalém donro âkealâ auguely awyly tutuze” tâkezeba itaungâ, Deusranlâ arâ amyguelymo, Deus Ijidadâry kelygue tâzekeim awylygue. <sup>36</sup>“Iangatolezeze urâ, uguewâdyly kulâ-ro watay” tâkezeba itaungâ. Tokalâ kyangahudu kiampekanânehonwâbyra kurâ, kienmygymanânehomba warâ, Deus nhygatyby awylygue. <sup>37</sup>“Aiese urâ” myguelymo watay, aietaungâ. “Agânhepyra ise urâ” myguelymo watay, akâiedaundâ. Amyguehomobry aralâ aitaungâ, Deus ezedy mâempâguebamolâ. Deus ezedy mâempâguelymo-ro watay, Diabulâ aienehonrim —kely Jesus.

**Tâdâpeândyly wâgâ Jesus  
aguehobry  
(Lc 6.29-30)**

<sup>38</sup>Jesus aguely:

—Tutuzelâ âmaemo Moisés inweniby: “Ânguylâ otoguylymo, inuxiguylymo warâ watay, enuxiguywâdaungâ lâpylâ. Âerymo nhukagâdyly watay, iery xukagâdaungâ lâpylâ” kely myakâwândy inwenily. <sup>39</sup>Urâ olâ warâ âyanmo auguely: “Ânguylâ âdalâ âetuomo, âpeânze tâkezeba itaungâ” uguely. Mâjiwapagainhoduomo, tâpeânzeba itaungâ. MYRYK itaungâ, iladune âwapagain-homoem lâpylâ. <sup>40</sup>Âdylâ amânhetomobry wâgâ mâzewentâolylymo watay, policiaram adahoze âmaemo. Târâ “Âgamizary merâ uguondoram xudugâ” myguehonduomo, tâwâlâ âwalitoru nadâ lâpylâ. <sup>41</sup>Sodadu Roma donro âyanmo “Ysejiguy sakâ tokalâ kilômetro” keduo, azagâ kilômetro lelâ sataungâ. <sup>42</sup>Âyanmo âdylâ ekanibyryram âunduwâtaungâ. Âdylâ tiempyraguylyem ekanibyryram âunduwâtaungâ lâpylâ —kely Jesus.

**Âizepanromo agâ koendâ lelâ  
itaungâ**

(Lc 6.27-28,32-36)

<sup>43</sup>Jesus aguely:

—Tutuzelâ âmaemo Moisés inweniby: “Âwynenimo lelâ iwynedaungâ. Âwynedânrymo kâjiwynedaundâ” kely myakâwândy inwenily. <sup>44</sup>Urâ olâ warâ âyanmo auguely. Âwynedânrymo agâ koendâ lelâ itaungâ, ataen-homo mâinwynegylylymo agâ matomo ara. Ânguylâ inakanhe âedylylymo watay, inakanhe aitobry wâgâ Deusram ekadaungâ, eagâ koendâ lelâ itoem. <sup>45</sup>Koendonro mawânkâ Deus, tynnonro modo agâ, tynynâbanro modo

agâ alelâ. Xixi tohobanâze mawânkâ koendonro modoem, inakai modoem alelâ. Kopâ tyihugueânze lâpylâ tâinwânni modoem, tâinwântânry modoem alelâ. Awylygue koendâ lelâ âmaemo ataen-homo, âduerymo alelâ agâ-ro watay, Deus kaynonro xurâem kuru mawylymolâ mânehonlymo. <sup>46</sup>Agâmo koendonro agâ kulelâ koendâ mawylymogue, “Deus koendonro kurâem xuduze, koendonro kydawylygue” tâkewâzeba itaungâ. Âdyem itaymba awârâ. Asaemo dinheru impostu epywadobryr emakewâni modo tataen-ho modo agâ koendâ lelâmo lâpylâ. Awylygue arâ amidlymo watay, âkelo modo takaze amidlymo mâkeba. <sup>47</sup>Âpemugudomo agâ lelâ, ataen-homo agâ lelâ warâ mâsedaengulymo, âunâgumo warâ lâpylâ watay, âkelo modo takaze amidlymo mâkeba. Deus eynynâbaom modo mawânkâ tataen-ho modo agâ koendâ lelâ lâpylâ. <sup>48</sup>Koendâ lelâ idânârâ kurâ domodo agâ itaungâ, Kunwym kaynonro ara, mâkâ idânârâ koendâ eni ara —kely Jesus.

**Jesus tâdâsemawyadâdily  
wâgâ aguehobryr**

**6** <sup>1</sup>Jesus aguely.  
—Xirâ âyanmo augueho. Tâmaynelâ itaungâ, tâzenanaym kehoem âdylâ amânhepyra mitomoem, amyguepa mitomoem warâ. Igaromoem kulâ âdylâ koendonro amânhedilymo-ro watay, Deus ipywaydaymbamo ise amânhetybymo wâgâ.

<sup>2</sup>—Awylygue kaikâ modo mâenmawyadâdilymo watay, amânhetybymo ânguyam kâzegae-taundâ. Koendonroem âdutuim modo aito araba aitaungâ. Kaikâ modo nhemawyadâdilymo watay, tâinkâ lelâba adientyby nhegatulymo, kurâ

domodo âtâdyguyho odakâ, xidadâ earuary oze warâ. Kurâ domodo tywâgâ koendâ aguehoem kulâ kaikâ modo nhemawyadâdilymo. Deus koendonro nuduwâpyra ise eyanmo. Aitomobryr ebyrylâ ise awârâ kurâdoram âzehogueolyo. <sup>3</sup>Awylygue âdy pebaom modo mâenmawyadâdilymo watay, ânguyam kâzegaetaundâ. Koendâ kehoem aietaungâ, ataen-homo kuru nhutulyemba kehoem, imarymo pâem eynynonro wâne, imarymo aho eynynonro anhekyly nutuba myara. <sup>4</sup>Awylygue kaikâ modo emawyadâ-daungâ, ânguy nutubalâ. Kunwym Deus olâ idânârâ aguienkyly tâense. Koendonro amânhekylymo tâense, ipywazemo-ro warâ —kely Jesus.

**Jesus Deus agâ aguykehoem  
konomedâdobyry  
(Lc 11.2-4)**

<sup>5</sup>Jesus aguely:

—Deus agâ amyguedaymo, koendonroem âdutuim modo ara inkâba itaungâ. Deus agâ adâkehomoem XYDYK idilymo, âtâ tâdâtâdyguyho oday, arua iskinarydâ warâ, kurâ domodo tâentoem kulâ. Deus koendonro nuduwâpyra ise eyanmo. Aitomobryr ebyrylâ awârâ kurâdoram âzehogueohomo. Xirâ mâuntudyzemo kuru wato. <sup>6</sup>Koendonro lelâlâ Deus agâ agueze kydâtâdyguyly. Koendonro lâpylâ olâ kurâ kulelâ eagâ aguykely. Awylygue âji ânguy âynanâbyramo atodâ eagâ aguewâtaungâ. Kunwym Deus awâtârâlâ ise agâmolâ. Mâempyra lelâlâ wâne âmaemo, alâ olâ eagâ aguewâtaungâ. Âmaemo kulelâ eagâ amyguelymo tydase mâkâ. Arâ amituomo koendonro âyanmo xuduze.

<sup>7</sup>—Deus agâ amyguedaymo, amyguehomobryrylâ adâkezezeba

itaungâ. Deus einwântânry modo ara inkâba aitaungâ. Deus tydadyly waunlo ara, enanajimo, imeâgâemba kehoem adâkelymogoe. <sup>8</sup> Aguehomo ara inkâba aguewâtaungâ. Tutuze mawânkâ Kunwym Deus âdy ize matomo, mâenkadylymo iraynâlâ. <sup>9</sup> Deus agâ amyguedaymo, warâ aguewâtaungâ:

“Pabai kaynonro, tynrenseim  
lelâlâ mawyly, ize dy  
awyly warâ idânârâ  
nhutudyzemo xina.

Ânguy âwankuem âpepyra nidâ.

<sup>10</sup> Tarâ xina iwymâryem ikâ.

Xina xirâ onro anano modo  
ize mato ara lelâ xina  
aiedyse awyly,  
târâ kaynâ agonro modo ize  
mato ara aito ara lelâ.

<sup>11</sup> Âmâlâ kopaelâgâembaba xina  
ipyniry âundugâ.

<sup>12</sup> Inakanhe xina aitobry  
xygakegâ,  
âkelomo inakanhe

tynynâ aitobry xina  
nhenanânehon-ho ara.

<sup>13</sup> Satanâs izepa mato aienehonze  
keduo, xina agâlâ ikâ,  
izepa mato xina aniempyra  
itoem.

[Xina iwymârye âmâ.

Ton-honre kehoem âmâ,  
amânhedyse mato aiese.

Tynrenseim âmâ.

Aunlolâ ise âmâ, typygueim  
keba. Arâlâ ise”]<sup>a</sup>

—warâ aguewâtaungâ Deusram.

<sup>14</sup> —Inakanhe âetomobry  
mâenanânehonlymo-ro watay,  
Kunwym kaynonro xygakeze lâpylâ  
inakanhe amitomobry. <sup>15</sup> Inakanhe  
âetomobry mâenanânehomba

âmaemo-ro watay, Kunwym kay-  
nonro nygakeba lâpylâ ise inakanhe  
amitomobry —kely Jesus.

### Tâdâwinduaprya tâjidyly wâgâ Jesus aguehobry

<sup>16</sup> Jesus aguely:

Tâjityenzeba itaungâ, Deus agâ amy-  
guehomoem mâwinduaprya midylymo  
watay. Koendonro emyenro modo ara  
inkâba itaungâ. Deus agâ adâkeho-  
moem nâwinduaprya tâise tawyly  
xutudyzemo. Awylygue tytyreim ara  
idylymo. Nâzemelagogueba, nâzeka-  
gâimba warâ awylymo. Kurâ domodo  
tywâgâ koendâ aguehoem kulâ arâ  
aidylymo. Âdy koendonro nuduwâ-  
pyra ise Deus eyanmo. Aitomobry  
ebyrylâ awârâ kurâdoram âzehogue-  
olyo. <sup>17-18</sup> Âmaemo olâ, Deus agâ  
amyguehomoem mâwinduapryamo  
mituomo, tuomare lelâ itaungâ.  
Âzemelagoguewâdaungâ lelâ, âze-  
kagâinwâdaungâ lelâ warâ, ânguy  
mâwinduaprya mawylymo nutuba  
itoem. Kunwym kaynonro agâmolâ.  
Amidylymo tutuze mâkâ. Mâkâlâ ise  
âyanmo koendonro xudunri —kely  
Jesus.

### Koendonro kaynâ ekanâdyby

(Lc 12.33-34)

<sup>19</sup> Jesus aguely:

—Tarâ onro anaym âdydo imeom  
tâwâentuneim modo kâzekanâ-  
daundâ, potogo, tuonro warâ inakanhe  
nhetodâ, âzemagazeohodâ warâ.  
<sup>20</sup> Awylygue âzeon-hondâdaungâ, Deus  
ize ato amânhetomoem. Arâ ise koen-  
donro ekanâdybybe mawylymo târâ  
kaynâ. Âdaunloenlâ tuonro, potogo  
warâ inakanhe nhetânry. Tâmagazeim  
modo nemagazebyra ise. <sup>21</sup> Xirâ

<sup>a</sup> 6.13 Idânârâ livru saguho modo wâgâ iwenibyemba xirâ.

anano tâenseim wâgâ kulâ mâpaunze-  
dylymo watay, mârâ wâgâ kulâma  
âwaunkymo. Deus xurâ toenzepa ize  
matomo-ro watay olâ ise, ize ato ara  
lelâ ise amidilymo —kely Jesus.

**Kodo iajimanâni**

(Lc 11.34-36)

<sup>22</sup>Jesus aguely:

—Kânugue mawânâni kytâho kien-  
dyly, iajino oze kytâly. Koendâ  
kiendily-ro watay, ânwa iozeno  
oze lelâ kytâly. <sup>23</sup>Koendâ kiempyra  
kurâ-ro watay, tuzase kurâ, iamu duay  
tâduzato ara. Epy xurâem toenzepa  
lelâlâ iamu —kely Jesus.

{“Kânu agâlâ mawânâni kyangahu âse-  
wanily” keze Jesus aguely. Deus ize ato  
aguiendyse kurâ-ro watay, iozeno lelâ  
aguienkyly. Arâ aguiendyseba kurâ-ro  
watay, iozeno keba kulâ aguienkyly.  
Toenzepa ise kydâsenagazedily, agueho-  
byry kienwâmpyra kurâ-ro watay.}^b

**Deus lelâ kienwântaymba kurâ,  
toenzepa âdydo imeom ize lâpylâ  
kurâ watay**

(Lc 16.13; 12.22-31)

<sup>24</sup>Jesus aguely:

—Azagâ tywymâgueim kurâ watay,  
nuduwâpyra azakâlâ agueho aguien-  
toem; tokalâ âdylâ aguiendyse,  
eagonro âdylâ aguiendyse lâpylâ. Aituo  
tokalâ aguehobyry lelâ aguienkyly. Arâ  
lâpylâ Deus ize, toenzepa tydinherugu  
ize waunlo modo Deusgue lelâ iwymâ-  
goem nudupa awyly —kely Jesus.

<sup>25</sup>—Warâ âyanmo auguely.  
Tâseguâdâzeba itaungâ pyni wâgâ,  
okumo wâgâ warâ, âiguepa mito-  
moem. Itymo owogonromo wâgâ  
tâseguâdâzeba itaungâ. Pyni keba,  
okumo keba, âtâ tâjiwogonro keba

warâ tywyneim kuru. Deus ize  
matomo xuduze lelâ âpynirymo, itymo  
owogonromo warâ. <sup>26</sup>Etaungâ atâingâ  
konopio modo. Typiembamo. Typyniry  
netâbyramo, nekaunâbyramo, netadâ-  
byramo etary odaji warâ wâne. Deus  
olâ ipynirymo tuduze. Deus xurâ  
âmaemo. Tawâguneim modo ipy-  
niry tiunduho ara, âyanmo xuduze  
lâpylâ. <sup>27</sup>Mâungukedânrymo wâgâ  
tâseguâdâzeba itaungâ. Âdara âigue-  
lymo wâgâ tâseguâdâzeba itaungâ.  
Kyigueho odaji ituo, kyiguepa kitoem  
aguientaymba kurâ. Deuslâ kyigueho  
xutuim.

<sup>28</sup>—Mâzetydâdomogue, mâpâ-  
gudâdomogue warâ tâseguâdâzeba  
itaungâ. Etaungâ poji anano tadawanku.  
Nâsewanibamo, tâty tywogonro  
tianâtomoem. Kâdâkerâ nawâpyramo  
tâty tywogonro adientomoem warâ  
wâne. Deuslâ olâ iwâkudâni. <sup>29</sup>Kydamu  
Salomão toenzepa âdypeom myakâ-  
wândy, toenzepa lelâlâ. Iwâkuru  
modo myakâwândy ety iwogonro. Poji  
anano sawanku olâ Salomão ety iwo-  
gonro takaze kuru tywâkurein-ro  
warâ. <sup>30</sup>Iweâpa nipyra olâ awârâ poji  
anano sawanku. Iwerâ koendâ, tywâ-  
kure warâ, kopaelâgâem ipa, iladybyem  
lelâ, peto emanâdoem âieholy lelâ warâ.  
Awârâ sawanku tâense Deus; nhesemo  
lâpylâ. Itymo owogonromo xuduze.  
Mâinwâmpyra olâ âmaemo!

<sup>31</sup>—Tâseguâdâzeba itaungâ. “Âdykâ  
kaise xina typyniry, toku, tâty tywo-  
gonro warâ nhedyly?” tâkezeba  
itaungâ. <sup>32</sup>Deus einwântânry modo  
typynirymo, tokumo, tâty tywogonro  
modo wâgâ warâ kulâ inanry âtynanâ-  
dylymo. Âmaemo olâ, awârâ wâgâ  
tâtynanâzeba itaungâ. Tunwyn-em  
âmaemo Deus kaynonroque. Tutuze

<sup>b</sup> 6.23 Xirâ { } odano gregüem ipa. Iweniby koendâ xutuhoem kulâ aieholy.

mâkâ idânârâ ize matomo. Âpynirimo, okumo, itymo owogonromo, awârâ modo xuduze lelâ. <sup>33</sup>Awylygue âwymârymo Deus ize ato modo waunroem aietaungâ. Mâkâ ize ato wâgâ waunroem mâpaunzeduromo, idânârâ ize matomo xuduze Deus —kely Jesus.

<sup>34</sup>—Tâseguâdâzeba itaungâ kopaelâgâ ainigue. Kopaelâgâembaba mawânkâ Deus tynynonro modo nhedyly. Mâseguâdâdomogue kulâ mâpaunzedylymo watay, adakaladâze âmaemo —kely Jesus.

### Ânguy kienwentâbyra kine

(Lc 6.37-38,41-42)

**7** <sup>1</sup>Jesus aguely:  
—Ânguy kâzewentâdaundâ, Deus iwentâbyramo itoem lâpylâ. <sup>2</sup>Âkelomorom mâundulymo ara lâpylâ ise Deus âyanmo nhuduly. Imâem mâundulymo watay, imâem lâpylâ ise Deus nhuduly. Imâemba watay, imâembalâ ise nhuduly warâ. <sup>3</sup>Agonromo tâwentâze âmaemo, âdiempa inakanhe aitobyry wâgâ kulâ, âmaemo olâ inakanhe kuru aini. Koendonro mâkeba awârâ. Agonro âzenupialodobyry lelâ mâenkylymo, inumo odano se iwatary imâsedo pylâ mâempyra âmaemo-ro myara. <sup>4</sup>Agonromo âzenupialodobyry etyze mygüewâdylymo, inumo oday se iwatarybe awyly umelâ. <sup>5</sup>Sagühoem wao inumo odano se iwatary etywâdaungâ, koendâ agonromo âzenupialodobyry mâentyhomoem. Koendonro emyenro wâne âmaemo, inakanhe kulâ olâ amidylymo! Sagühoem kuru wao inakanhe amidylymo imowâdaungâ. Inakanhe amidylymo mâinmopygueduomoma ise tâwâlâ agonrodo mâunrudylymo, inakanhe anipyra itoem.

<sup>6</sup>—Deus itaumbry egatuly izepaom modo tindadyseba awyly umelâ ague-

honly watay, tindadyseba inkâba, Deus itaumbry iweniby kaxoroam samely waunlo ara kulâ. Amyguelymo watay, kaxoro ara otoguyzemo, nhâsemo warâ. Tuhu tâwânseim pâsega nhakabehoem samely myara kulâ ise amyguehomobyry —kely Jesus.

### Ize kydato Deusram kyzekane

(Lc 11.9-13)

<sup>7</sup>Jesus aguely:

—Ekadaungâ. Mâenkaduromo, emakeze lelâ âmaemo. Xuiwâtaungâ. Mâwinduromo, soenkeze lelâ âmaemo. Pyantaylâ âtâ sodo igâsedaungâ, enahungueze lelâ mawânkâ. <sup>8</sup>Idânârâ ekanibyry modo emakeze. Xuirimpyry modo soenkeze. Âtâ sodo pyantay tygâsenibyryram enahungueze. <sup>9</sup>Âmerymo turu nhekaduo, tuhu mâunduwâpyra âmaemo. <sup>10</sup>Kanra âjihuyby nhekaduo, âgâu mâunduwâpyra âmaemo eoduem. <sup>11</sup>Inakai wâne âmaemo, iwâkuru modo olâ âmerymoram mâundulymo. Kunwym kaynonroma kuru koendonro-ro; koendonro modo xuduze ekanibyry modoram!

<sup>12</sup>—Âkelomo agâ koendâ itaungâ, agâmo koendâ awyse matomo ara. Xirâ aguely mawânâ Moisés inweniby, akaemo Deus wâgâ agüewâni modo konomedâdobyry warâ —kely Jesus.

### Aguipa kulâ ise Deus eydâ atoram idâwâni modo

(Lc 13.24)

<sup>13</sup>Jesus aguely:

—Agui lelâ yeinwândysebaom modo tâwâlâ ize tato ara kulâ adâidyse awylymo; Deus ize ato ara adâidysebamo. Pyanta tâtaydygueim oze tâgawândyse awylymo, ânwa tâtaydygueim oze tâtâdyze awylymo warâ. Awylygue ise tâdâsenagazedoram kulâ idâlymo, Satanás eydâ atoram.





(Mateus 5-7)

Akaemo araba itaungâ. Yeinwântaungâ, pyanta tâtabigueim oze egawânni ara. <sup>14</sup>Ton-honreim olâ awârâ ânwa tâtabigueim oze tâdâtâly, pyanta tâtabigueim oze tâzegawândyly warâ, myara lâpylâ aguipa kulâ Deus eydâ atoram idâwâni modo, tâwâlâ âjize tawly imowâni modo, Deus ize ato ara lelâ aitaynrim modo warâ —kely Jesus.

**Konokuze kulâ “Deus itaumbyry egatuim xina” kewâni modo**  
(Lc 6.43-44)

<sup>15</sup>Jesus aguely:

—Tonomegulâ itaungâ, “Deus itaumbyry egatuim xina” kewâni modo agâ. Udodo kaneru xuhudugue âzetydâdyby emyenro kulâ akaemo. <sup>16</sup>Inakanhe aidylymogue olâ ise Deus eynynonro keba awylymo mâuntulymo. Tyguyreim, uvague tâwituneba; kazainwam, figugue tâwiseba warâ. Tâwilygue lelâ mawânâ nady modo ewitu.

<sup>17-18</sup>Se takyguenry, koendâ lelâ ewily, ein-hoem tuduze. Se takygueim, inakanhe lâpylâ ewily, ein-hoem nudupa. <sup>19</sup>Se koendâ tâwisenry satâly lelâ. Peto onwanji samely-ro warâ. <sup>20</sup>Warâ ise ânguy Deus wâgâ koendâ aguenri, ânguy konokuni warâ awyly, mâuntulymo aidyly wâgâlâ —kely Jesus.

**Idânârâ inkâba ise Deus pymâem atoram tâdâtâly**  
(Lc 13.25-27)

<sup>21</sup>Jesus aguely:

—Deus aguehobyry ara aini modo lelâ ise Deus eydâ atoram idânri. Toenzepa kurâ domodo yam, “Pymâ, pymâ” kewâni modo, kewâdylymo kulâ olâ. Pabai kaynonro eydâ atoram nâtâwâbyramo ise, Deus aguehobyry ara anipyra awylymogue. <sup>22</sup>Xypyry etay, “Jesus eynynonro xina” kewâtyby modo warâ ise yam aguelymo: “Pymâ, Deus itaumbyry xina egatuwâm

on-honrugue. Toenzepa kadopâ modo xina egaseânâ, toenzepa adyosenry modo warâ xina aiemâ on-honrugue” kezemo yam. <sup>23</sup>Warâ olâ ise eyanmo auguely: “Âtuwâbyramo urâ. Ydâpa itaungâ, âmaemo inakanhe aitaynrim modo!” keze lelâ urâ —kely Jesus.

**Deus aguehobyry ara lelâ aini,  
aguehobyry araba aini warâ**  
(Lc 6.47-49)

<sup>24</sup>Jesus aguely:

—Deus itaumbry indadyly, aguehobyry ara aidyly waunlo uguondo tonomegueim, tuhu wâgâ tâty itâni-byry emyenro. <sup>25</sup>Toenzepa kopâ ihugueduo, paru inwenly. Sapezenru ton-honre kehoem âtâ onwa idâly. Mârâ âtâ olâ nihugueba, tâhugane kehoem tuhu wâgâ itâdyby awylygue.

<sup>26</sup>—Deus itaumbry idani, aguehobyry ara aniempyra olâ waunlo uguondo sagunu wâgâ tâty itâni emyenro kulâ. <sup>27</sup>Toenzepa kopâ ihugueduo, paru inwenly. Ton-honre kehoem adapezeinylly âtâ onwa. Aituo âtâ ihuguely. Idânârâ kehoem adakalaguely, tâhuganeba itâdyby awylygue —kely Jesus.

**Adâkeho tutuze lelâlâ Jesus**

<sup>28</sup>Jesus aguepygueduo, toenzepa myani kurâ domodo âsewânily, arâ tâzenomedâoduomo. <sup>29</sup>Aguelymo:

—Adâkeho tutuze lelâlâ awâkâ uguondo! Ton-honruguelâ awâkâ aguely, akaemo Moisés inweniby wâgâ enomedâni modo ara inkâba —kelymo.

**Jesus uguondo tâjimituguelygue  
tâwâneim kua nhetobyry**  
(Mc 1.40-45; Lc 5.12-16)

**8** <sup>1</sup>Iwy wâgâpa Jesus xytâgyuly. Toenzepa myani kurâ domodo nhapygue awyly. <sup>2</sup>Aituo myani uguondo iopaji saindyly. Jesus enado âzeguhoam

idyly, tynrense tawyly tienehon-hoem. Tâjimituguelygue tâwâneim myani mâkâ. Aituo Jesusram aguely:

—Pymâ, kua yese ton-honre mawyly, xutuanze. Kua yedyse âmâ watay, kua yekâ wao —kely.

<sup>3</sup>Jesus tâmarygue MÂ’ nhedyly. Eyam aguely:

—Kua âedyse urâ. Tâwânepa âmâ iweâma. Kua âetai —kely.

Ilâenlâ kehoem kua idyly. Iwâgâ pinuri peba idyly, itugoenzely warâ.

<sup>4</sup>Eyam aguely:

—Idakâ. Iweâma tâwâlâ idâ. Ânguyran-ne xirâ kua âetobyry kâzegatu —kely.

—Kurâdo eynynâ Deus agâ agueinram âzehora, kua itybyem mawyly nhetoem. Kua itybyem mawyly kurâdo nhetoem, Deusram âdylâ xudugâ, kâzewenryem Moisés inweniby agueho ara —kely Jesus.

**Jesus sodadu domodo iwymâry  
agâ tâwaneim ewânu ume kua  
nhetobyry**  
(Lc 7.1-10)

<sup>5-6</sup>Jesus idâly xidadâ Cafarnaumram. Saimpygueduolâ kehoem myani sodadu domodo iwymâry idâly eyam. Aituo aguely:

—Pymâ, târâ ietydâ yagâ tâwaneim toenzepa ewânu. LYK itoenlâ nudupa. Toenzepa âpyneândyly. Kua mânhedysse wâne urâ —kely.

<sup>7</sup>—Idâze urâ itynra, kua iese —kely Jesus.

<sup>8</sup>Târâ endaylâ Jesus mâkâ tâwâneim kua iese ton-honre awyly tâinwânse olâ myani mâkâ uguondo. Aituo myani aguely:

—Pymâ, âdy mâkeba urâ, ietyram mâwântoem. Toenzepa ton-honreim âmâ. Iwague endaylâ yagâ tâwaneim kua itoem amyguely watay, kua ise

lelâ mâkâ —kely sodadu iwymâry.  
 9—Ywymâry modo aguely tâinwânse urâ. Tyzodadugue lâpylâ urâ, yeinwânni modogue warâ. Kâingonotuo, tâtâze lelâ. Eagonro kâingâseduo, tâese lelâ warâ. Yagâ tâwaneinram “Xirâ aiekâ” ugeduo, inepa adyese lelâ warâ —kely myani cem sodadu domodo iwymâry.

10Awârâ tindatuo myani Jesus toenzepa kehoem âsewânily, mâkâ sodadu domodo iwymâry toenzepa tâinwândyly tiuntuduo. Aguely mâkâ kurâdo tyampygueni modoram:

—Eagâ tâwaneim kua kânhedily tâinwânse mynra merâ uguondo. Ânguy yeinwânni kâentaymba urâ merâ Roma donro yeinwânto ara kehoem. Kypemugudo israelita domodo duay kuru ânguy yeinwânni lâpeba merâ ara! —kely.

11—Enanâguedwâdaungâ xirâ. Toenzepa ise israelita domodo keba ewy Deus pymâem atoram idâim. Xixi egaseho eynnonro modo, egawânto eynnonro modo warâ kehoem ise âtâdyguylymo Deus pymâem atodâ. Toenzepa ise âzetyguedylymo, iomarumo warâ, kydamudo Abraão, Isaque, Jacó akaemo agâ. 12Tâlâ olâ ise toenzepa kypemugudo israelita domodo ewy Deus pymâem atoram idâdânry, yeinwâmpyra awylymogue. Iamu odaxi ise adameolyo, toenzepa kehoem âsenagazedomoem. Toenzepa ohogüenzemo, tyery saguzemo warâ, tâsenagazedylymogue —kely Jesus.

13Jesus aguely sodadu iwymâryam:  
 —Idâ ityam. Agâ tâwaneim kua kânhedily; meinwântaima. Aituo enra kua kânhedily —kely.

Jesus aguely umelâ myani sodadu iwymâry agâ tâwaneim kua idyly lelâ târâ.

### Jesus tâwânuneim modo kua nhetobyry

(Mc 1.29-34; Lc 4.38-41)

14Sodadu modo iwymâry agâ âtunâguedybyem myani Jesus idâly Simão Pedro etyram. Saintrybyem myani Simão imenhundu tâwâne, toenzepa kehoem iaturu kely indadyly. 15Jesus tâwânuneim eguetonra idâly. Emary wâgâ nhawâdyly. Ilâ umelâ kehoem myani kua idyly; tyatureba idyly, pekodo saudyly, ipynirymyo aiese, âwinduatomoem.

16Iguampygueduo myani kurâ domodo kadopâgue taseim modo, tâwânuneim modo warâ Jesusram nhadylymo. Kadopâ kurâ domodo odaypa egasehoem, tâwânuneim modo kua itoem warâ aguely. Aituo kadopâ modo egasewâdyly, idânârâ tâwânuneim modo kua itaynly warâ. 17Warâ myakâwândy Deus itaumbry egatuimbyry Isaías aguely iwâgâ:

“Mâkâlâ kâwânu kua ieni,  
 kydâpyneândo etynri warâ”  
 kewândymy.

Jesus kurâ domodo kua nhetuo, Isaías aguehobyry aralâ aidyly.

### Jesus kieinwândyly-ro watay, kieinwândyly kinmopa kine

(Lc 9.57-62)

18Alâ myani Jesus toenzepa kurâ domodo nhedyly, taynâ, tâynâ warâ kehoem. Tynnonro modo agâ kulelâ tidyse lâwâne myani. Aituo eyanmo aguely:

—Kydâzekuâne paru kuyam —kely.

19Egaselymo iraynâ kehoem olâ myani Moisés inweniby wâgâ enomedâni saindyly. Jesusram aguely:

—Pymâ, âynnonroem widyse urâ. Âdyam mydâhobyryram idâze lelâ urâ, agâ kâsenomedâdoem —kely myani.

20Jesus aguely:

—Ton-honre ise enra. Idânârâ ânguydo imeom tâjikune lelâ xykyhobe warâ; poroho, tawâguneim modo warâ tâjikune lelâ. Urâ, Uguondo Kaynâpa Âtyby olâ, iekobyzeguehoenlâ tâtyemba —kely.

<sup>21</sup>Aituo eagonro uguondo koendâ kehoem Jesus aguely idanipyry aguely:

—Pymâ, saguhoem pabai ugueho wao ise kâenkyly, niguepa awyly ara. Igueduo, epyâbygueduo ise âynynonroem widyly —kely.

<sup>22</sup>Jesus olâ eyam aguely:

—Iweâ lelâlâ âekâ ynynonroem. Yeinwântânry modo igueypy ara kulâ, iazeontoem Deus aniempyra awylygue. Xirâ anano wâgâ kulâ âtynanâdylymo. Xirâ onro anano modo wâgâ âtynanâni modolâ igueypy nepyâdâ —kely myani.

**Jesus sapezenru ton-honreim,  
kopâ tyelugueim agonro  
nhepagunâdobyry**

(Mc 4.35-41; Lc 8.22-25)

<sup>23</sup>Akaemo azagâ uguondo agâ agueypyem myani Jesus tynynonro modo agâ paruam idâly. Pepi odaxi âxiedyly, paru tienkuâdomoem. <sup>24</sup>Mârâ paru imâsedo tuotagueze ataymo kehoem myani kopâ sapezenru ton-honreim agonro adaguly. Ton-honre kehoem myani sapezenru paru nhahugânily. Parugue pepi adapadyly warâ. Jesus olâ myani xykyly lelâ. <sup>25</sup>Aituo eynynonro modo nhuagueândyly, adaenkelymo warâ:

—Pymâ, âwaguegâ! Aukâ! Kâmakegârâ. Kyiguely ise xirâ! Pepi xytyzeaji xirâ! —kelymo.

<sup>26</sup>Aituo myani tuagueântuo, Jesus eyanmo aguely:

—Tâseanezeba itaungâ. Imakezemo ton-honre wawyly mâinwâmpyra lâgâlâ ianumo —kely.

Aituo saudyly. Ton-honre kehoem aguely:

—Arâ kehoem tadapezeinzeba ikâ!

—kely sapezenruram.

—Tahugâneba ikâ! Ipagugâ! —kely paru sahugânuram warâ.

Agueduo, tapezenremba idyly, paru tahugâneba idyly warâ. <sup>27</sup>Toenzepa myani âsewânilymo, âseguâdâdylymo warâ. Aituo aguelymo:

—Etaungâ! Sapezenru nadapezeimba itoem adyese. Paru tahugâneba itoem adyese warâ. Ânguy kuruka awâkâ eon-honru xudunri, awârâ modo anhe-toem? —kelymo.

**Jesus azagâ uguondo kadopâgue  
taseim modo kua nhetobyry**

(Mc 5.1-20; Lc 8.26-39)

<sup>28</sup>Jesus tynynonro modo agâ saindyly paru Galiléia kuyam, Gadararam<sup>c</sup>. Târâ myani azagâ uguondo kadopâbeom modo agâ oxiodylymo. Tâdâzepyâdodâpa myani idâlymo, târâlâ âxidâdybyem tawylymogue. Kâmayno, tytazeim warâ myani akaemo. Mârâ âji einkâ sakani modoram tâdytaozemo mykâinane.

<sup>29</sup>Jesus tientuo myani ago kehoem adaenkelymo:

—Xina kâdynanâdâ, Deus imery. Xina âsenagazedo naimpyralâka xina enagazeze mâewyly? —kelymo.

<sup>30</sup>Tâlâ myani târâ iwaguepa toenzepa pâsega âwinduani modo. <sup>31</sup>Aituo kadopâdo aguely Jesusram:

—Xina mânhânkyduo, awâkâ pâsega modo iodaxilâ xina igonokâ —kelymo.

<sup>32</sup>Aituo Jesus aguely:

—Tâwâlâ, idâwâtaungâ —kely.

Agueduo, kadopâ modo akaemo uguondo modo odaypa egasewâdyly. Pâsega modo iodaxi egawândylymo.

<sup>c</sup> 8.28 Gerasa lâpylâ myani mârâ âji ezekeho.

Kadopâbe tâituo myani pâsega modo enuimbadaynly. Egatudylymo. Iwy wâgâpa paikaji adamunedylymo. Idânârâ kehoem tyense, iguwâdyly.

<sup>33</sup>Pâsega eni modo iwy wâgâpa pâsega paikaji adamunedyly tâensemo myani. Mârâ aidyly tientuo, âwenkelymo. Inepa kehoem idâlymo xidadâram. Xidadâ odaxi taintuo tonlo modoram tientyby nhegatulylymo. Tâgatuzemo lâpylâ myani Jesus kadopâ modo nhânkyhobyry. <sup>34</sup>Arâ egary tindatuomo, idânârâ kehoem mârâ xidadâ odano modo Jesus agâ oxioze idâlymo. Toxioduomo, aguelymo eyam: —Âxigwegâ xina ety anaymba. Taynynâ inkâba ikâ —kelymo Jesusram, tâguy pâsega nhaindyseba tawylmogue.

#### Jesus adakobâdânry kua nhetobyry

(Mc 2.1-12; Lc 5.17-26)

**9** <sup>1</sup>Ilâpygueduo myani Jesus tynnonro modo agâ paruum idâly. Pepi imâsedo odaxi âxiedylymo, paru tienkuâdomoem. Âzekuâdybyem, tyjidâry Cafarnaumram saindyly. <sup>2</sup>Tonlo modo ewy uguondo adakobâdânry nhadylymo sawo wâgâ, Jesus kua nhetoem. Kua nhedyly tâinwânsemo awyly tiuntuduo myani Jesus aguely tâwâneinra:

—Ton-honre ikâ. Idânârâ inakanhe amitobyry modo xygakeagui —kely.

<sup>3</sup>Moisés inweniby wâgâ enomedâni modo Jesus aguely tindatuo, tâpaunzezemo myani.

—Koendâpa awâkâ Jesus aguely! Deus nhunâguedyly kulâ awâkâ! Deus agâ âzekiba tâidyse awyly kulâ! —kelymo.

<sup>4</sup>Tutuze olâ Jesus âdy nhangahumo oday xunârymo awyly-ro warâ. Aituo aguely:

—Arâ ywâgâ tâpaunzezeba itaungâ. Unâguedaundâ —kely. <sup>5</sup>—Merâ adakobâdânryam: “Idânârâ inakanhe

amitobyry modo xygakeagui” uguely-ro watay, mâuntuwâbyra ise âmaemo âkealâ, âkealâba warâ auguely awyly. “Aukâ. Adakobâgâ” ugueduo, adakobâdyly-ro watay olâ xutuze âmaemo ton-honre wawyly! <sup>6</sup>Merâ koendâ adakobâdyly mâentuomo, xutuze âmaemo, kurâ domodo inakanhe aito xygakeze ton-honre wawyly urâ Uguondo Kaynâpa Âetyby —kely Jesus.

Aituo adakobâdânryam aguely:

—Aukâ. Iguetudobyry sanâkâ; adakobâgâ; idâ itynra —kely.

<sup>7</sup>Aguely umelâ kehoem kua idyly. Saudyly. XYDYK idyly. Adakobâdyly. Tâtyram idâly. <sup>8</sup>Mâkâ aidyly tientuo kurâ domodo âsewânilymo, âseanedylymo warâ. Aituo myani aguelymo:

—Koendonro, ton-honreim warâ Deus, awâkâ uguondo tâwânuneim modo kua nhetoem eon-honru nhuduhobyry wâgâ! —kelymo.

#### Jesus Mateus tynnonroem itoem ingâsedobyry

(Mc 2.13-17; Lc 5.27-32)

<sup>9</sup>Adakobâdânry kua tiempygueduo myani Jesus târâpa âxiguely. Tadakobâday myani Jesus iedyly, urâ Mateus. Pymâ Roma donro xurâem dinheru impostu epywadobyry emakerim urâ. Târâ dinheru kâenmakezedodâ ekadybyem wawyly ume ani Jesus yam aguely:

—Yagâ âekâ. Nynnonroem ikâ, yagâ mâsenomedâdoem —kely.

Aituo yaudyly. Jesus agâ udâly, eynnonroem witoem. <sup>10</sup>Kopae ietydâ âwinduatoem kâingâsedyly. Aituo Jesus ietyram idâly. Xina âwinduadyly ume, yataen-ho modo ewy saindylymo, impostu epywado emakewâni modo. Kurâ domodo saindylymo lâpylâ, inakanhe tâgaruneim modo. Xina agâ ekadylymo, tâwinduatoem.

<sup>11</sup> Fariseu domodo ewy Jesus xina agâ âwinduadyly tientuomo, Jesus eynynonro modoram aguelymo:

—Kâzewenry araba kulâ awâkâ âwymârymo Jesus aidyly! Dinheru impostu epywado emakewâni modo agâ, kurâdo inakai modo agâ warâ nâwinduapyra tâise awâkâ! —kelymo.

<sup>12</sup> Aguelymo tindatuo Jesus eyanmo aguely:

—Deus wâgâ auguehoem uirimpyrilâ asaemo. Tâwânuneim modo mawânkâ kua tyeni xuirim, tâwânunenry modo keba. <sup>13</sup> Deus itaumbryry awo wâgâ iweniby mâuntuba lelâ kuruka âmaemo: “Ânguydo imeom xyâyly, iaduândyly mâkeba ize kuru wato, kurâ domodo âjigüe koendâ awyly” kewândy Deus. Koendâ âpaunzedaungâ, âdakeze aguely awyly mâuntuhoem. Inakanhe aitaynrim modo igâseze kâewyly. Inakanhe aitânry modo igâseze inkâba xirâ kâewyly —kely Jesus.

**Saguhø kiuntuyby kyjimonre,  
iwelo kiuntuhoem**

(Mc 2.18-22; Lc 5.33-39)

<sup>14</sup> Aituo João Batista eynynonro modo ewy saindylymo, Jesusram aguelymo:

—Xina João Batista eynynonro modo, fariseu domodo warâ xina nâwinduapyra tâise inanry, Deus agâ adâkehoem. Ânynonro modo olâ nâwinduapyra nipyramo, Deus agâ adâkehomoem. Âdaituoka xina aito ara anipyra awylymo kâzewenry agueho ara? —kelymo.

<sup>15</sup> Aituo Jesus eyanmo aguely:

—Eagâmo watay, nâwinduapyra nitaymbamo ise. Eagâmopa wituo olâ nâwinduapyra isemo, Deus agâ adâkehomoem. Todohogüin-horam igâsedaymby modo ohogüinrim agâ tatay, nâwinduapyra nitaymbamo, ety-

gumo lelâ. Ohogüinrim tuduaypa ituo lelâ nâwinduapyra idylymo myara —kely.

<sup>16</sup> Jesus aguely:

—Âtâbâ adauguehobyry tawentâzeba âtâ iwelo sapidubygüe. Âtâ sawentâdobyry tukuiduo, odopâduo, tadaugueze mawânâ âtâbâ. <sup>17</sup> Tâjituby vinhu etaryem xygatyby iwelo keba odaxi vinhu iwelo tâkanâduneba. Tâjituby iwelo keba odaxi ekanâduo, etary tadaugueze mawânâ. Aituo vinhu apâdyly. Aypa olâ, vinhu iwelo etaryem tâjituby iwelo xygatyby odaxilâ ekanâdyly watay, vinhu nhewantuo, imâem ituo warâ, tâjituby iwelo tâzepâgueze. Etary, vinhu alelâ nâxiuemyra —kely Jesus.

{Jesus aguely, saguhø konomedâdobyry kinmohoem, iwelo konomedâdo kieiwnântoem warâ. Saguhøbyry mawânâ nâseinwâmbyra iwelo agâ.}

**Jesus pekodo tâwâneim kua  
nhetobyry, âwynsaundo igueypy  
kurâem nhetondobyry warâ**

(Mc 5.21-43; Lc 8.40-56)

<sup>18</sup> Jesus eyanmo aguely ume myani uguondo âtâ tâdâtâdygyho iwymâry Jesus iopaji saindyly; âzeguhøam idyly enado. Aguely:

—Inoro wao ietyam. Iexiryze nigueaki. Nhonwa imary MÂ' ieta wao, kurâem itondoem —kely.

<sup>19</sup> Aituo Jesus eagâ idâly. Xina Jesus eynynonro modo tâtâze lâpylâ ani eagâ.

<sup>20</sup> Pymâ etyram xina idâly ume, pekodo tâwâneim Jesus ikaynâ saindyly. Imery etary myani âunkeim; kuapa idyly agâ toenzepa myani iunu ihuguely, toenzepa lelâlâ. Doze anupe myani mâkâ arâ ewânu. Eyam taintuo, ety MÂ' nhedyly, ikaynâlâ. <sup>21</sup> Warâ tâpaunzeduo myani aidyly.

—Etylâ MÂ' kânhetuo, kua yese lelâ —tâkeduo.

<sup>22</sup>Tâty tywogonro MÂ' ietuo, Jesus MYRYK idyly. Pekodo nhedyly. Eyam aguely:

—Tyanepa ikâ. Kua ietybyem âmâ, kua kyetâ wawlyl mâinwântobyry wâgâ —kely.

Aguely umelâ kehoem myani pekodo kua idyly lelâlâ.

<sup>23</sup>Ilâpygueduo ani xina idâly lelâ. Pymâ etyram xina saindyly. Saintrybyem, âguedy tuhu esagueyby odaxi etadâdo eremu xina indadyly. Idânârâ ani tonlo modo eogunrumo, âpyneândylymo warâ, âwynsaundo igueypyem lelâlâ awylygue. <sup>24</sup>Aituo ani Jesus eyanmo aguely:

—Igasewâdaungâ wao. Nigewâpyra awâkâ âwynsaundo; xkyly kulâ —kely.

{Arâ aguely, kurâem tientondyly tiuntuduo.}

Arâ aguely tindatuomo, nheinldylymo. Igueypyem lelâlâ awyly tiuntuduo, nâepaigueba awylygue. <sup>25</sup>Egasebygueduo, Jesus idâly igueypy eguetunâdobyryram. Egawântybyem Jesus âguedy emary wâgâ nhawâdyly. Ilâenlâ kehoem kurâem nhetondyly, kama wâgâpa saudyly idyly. <sup>26</sup>Idânârâ âtâ anary iwaguepaom modo Jesus âwynsaundo kurâem nhetondobyry egary tydase mo myani.

#### Jesus azagâ epy kua nhetobyry

<sup>27</sup>Jesus agâ târâpa xina âxiguelly ume, azagâ epy xina nhapygue idâly. Warâ adaenkelymo:

—Xina tytyenzelâ ikâ, Jesus. Pymâ ton-honreim âmâ, âdamu Davi ara! —kelymo.

<sup>28</sup>Jesus âtâ tâxidâdobyryram saintuo azagâ epy modo eagâ egawândyly. Iopaji saindylymo. Jesusram adapâigueoly mo:

—Tâinwânse lelâlâka âmaemo, kua âenimoem wawlyl? —kely.

—Tâinwânse xina, Pymâ —kelymo.

<sup>29</sup>Aituo Jesus enumo onwa tâmary MÂ' nhedyly, kua tientomoem.

—Kua âedyly; tâinwânse mawlymogue kua midylymo —kely.

<sup>30</sup>Aguely umelâ kehoem epyemba idylymo. Kua tiempygueduomo, Jesus eyanmo aguely:

—Awitobyry ânguyram kâzegatuwâdaundâne! —kely.

<sup>31</sup>Tâtâdaymo olâ mâkânra lelâba nhegatuly mo Jesus kua tyetobyry.

#### Jesus tytarenry kua nhetobyry

<sup>32</sup>Azagâ epy kua ityby idâpygueduomo, kurâ domodo ewy uguondo tytarenry nhadylymo. Nâjitaimba mâkâ uguondo, kadopâram nâjitaimba âiehoibyem awylygue. <sup>33</sup>Jesus mâkâ iodano kadopâ egasehoem agueduo, uguondo koendâ âjitaingly adaguly. Idânârâ kurâ domodo âsewânily mo. Aituo aguelymo:

—Âdykâ Israeldâ uguondo kadopâbeom kua ieni xina netaymba, Jesus anheto ara! —kelymo.

<sup>34</sup>Fariseu domodo enanaji olâ Jesus aidyly Deus eon-honrugueba.

—Kadopâ modo iwymâry eon-honrugue kulâ awâkâ kadopâ modo nhegaseândyly —kelymo; kewâdylymo kulâ olâ.

#### Jesus kurâ domodo intyendobyry

<sup>35</sup>Idânârâ âtâ anakâ ani Jesus adakobâdyly. Âtâ tâtâtdygyuho odakâ kurâ domodo nhenomedâdyly. Unâ iwâkuru nhegatuly, âdara Deus idânârâ kurâ domodo iwymâryem idyly wâgâ. Âdaunlo tâzewânugue tâwâneim modo kua tyese lelâ ani.

<sup>36</sup>Tadakobâdodâ Jesus toenzepa kurâ domodo nhedyly, kaikâem kulâ. Tientuo, toenzepa intyendylymo, âseguâdâdylymogue, itynrumogue

warâ, kaneru todonenry ara kulâ awylymogue.

<sup>37-38</sup>Aituo xinaram aguely:

—Etaungâ kurâ domodo. Koendâ tâise Deus itaumbryry nhutulymo. Agui pa kulâ olâ egatuim modo. Deusram ekadaungâ, agui kurâ ingonotoem tywâgâ agueze. Urâem, asaemo kurâ domodo mârâ etâdyby sahuadyby tâkaunâzeim ara, ekau-nâni modo olâ ipa myara —kely Jesus.

**Jesus tynynonro modo eon-honru  
nhuduhobyry**

(Mc 3.13-19; Lc 6.12-16)

**10** <sup>1</sup>Aituo Jesus xina doze lelâ tinduakeyby modo indâ-tyguely. Xinaram aguely:

—On-honrumo kâunduly, kadopâ mânhânkyhomoem, tâwânuneim modo kua mânhetomoem warâ —kely.

<sup>2-4</sup>Induakeyby modo ezedy xirâ, tywâgâ aguenriem:

Waueno Simão (Pedro  
kelygue tâzekeim)

André (Simão iukono)

Tiago, João warâ (Zebedeu  
imeombyry)

Filipe

Bartolomeu

Tomé

Mateus (Levigue tâzekeim  
lâpylâ urâ, saguhoem  
dinheru impostu epywado  
emakerimbyry)

Tiago (Alfeu imerybyry)

Tadeu

Simão (tâty anary izetonro  
lelâlâ tawylygue, Roma  
donrogoe tywymâgu  
izepaom)

Judas (Queriotte donro, Jesus  
egamenribyry izepaom  
modoran-ro warâ)

Warâ ani xina doze lelâ, Jesus induakeyby modo.

**Jesus tynynonro modo Deus  
wâgâ unâ iwâkuru egatuze  
ingonotobyry**

(Mc 6.7-13; Lc 9.1-6)

<sup>5</sup>Deus xunâry egatuze ani xina âjigonoholy. Xina idâly iraynâ, Jesus aguely:

—Judeu keba modo ety anaxi tâtâzebane itaungâ. Samaria eynynonro modo ety anaxi tâtâzeba itaungâ warâ. <sup>6</sup>Kypemugudoram lelâ Deus itaumbryry egatuwâdaunda, Israelita modoram. Kaneru xuzatyby ara kulâ akaemo. <sup>7</sup>Warâ ise amyguelymo: “Inepa ise Deus kurâ domodo iwymâryem idyly” myguelymo. <sup>8</sup>Tâwâneim modo kua ietaungâ. Tâjimitugueygue tâwâneim modo kua ietaungâ. Igueypy modo kurâem ietondaungâ. Kurâ domodo kadopâ-beom modo kua ietaungâ warâ. Awârâ modo amânhetomoem tâbyguepa on-honrumo kâunduly. Awylygue kadopâbeom modo, tâwânuneim modo warâ kua ietaungâ, tâbyguepalâ. <sup>9</sup>Mydâdaymo âdylâ manâtomoe ouru, prata, dinheru, awârâ modo kadataundâ. <sup>10</sup>Owosarymo kadataundâ. Âgamizarymo, âhurumo etary warâ mâungukehomo kadataundâ. Amatagorumo ânwa oze mâtêsebydâdomoem kadataundâ lâpylâ warâ. Tâwaneim mawânkâ âdy ize tato tâmakeze lelâ tâzetoem. Awylygue idânârâ ize matomo ara âdydo imeom âduduoze lelâ.

<sup>11</sup>—Âtâ anaxi aintuomo, âdaunlo uguondo koendonro awyly etaungâ, târâ eagâlâ mitomoem. Mâkâ ety-dâlâ itaungâ, eagonro âtâ anaryam mydâlymo ara. <sup>12</sup>Âdaunlolâ âtâ odaji igawândylymo watay, tonlo modo agâ



âsedaenguwâdaungâ. “Deus koendâ nhese” kewâtaungâ eyanmo. <sup>13</sup>Tonlo âtâ odano modo koendâ idaenkulymo, mâengatulymo tindadysemo warâ watay, koendâ ise Deus akaemo agâ awyly. Koendâ idaenkubamo, unâ mâengatulymo tindadysebamo warâ watay olâ Deus eagâmo koendâ itoem kâzekadaundâ.

<sup>14</sup>—Mârâ âtâ odano modo, xidadâ odano modo koendâ idaenkubamo, mâengatulymo tindadysebamo warâ watay, inepa târâpa âxiguwâdaungâ. Igasedaymo, âhurumo etary etywâdaungâ, xutoleguguwâdaungâ warâ, Deusram tânagazezeim awylymo xutuhoem, ize ato ara anipyra awylymogue, yeinwâmpyra awylymogue warâ. <sup>15</sup>Sodoma donro modo, Gomorra donro modo warâ myakâwândy ânguydo kulâ. Awylygue myakâwândy Deus peto in-hugueândyly nhonwamo adain-homoem. Xypyryem, idânârâ tynynâbanro modo enagazeze. Deus itaumbryrâ mâengatulymo izepanro modo olâ ise Sodoma donro modo, Gomorra donro modo warâ âsenagazedobryrâ takaze kehoem kuru âsenagazezeni. Xirâ mâuntudyzemo kuru wato —kely.

**Jesus tâdâsenagazedily wâgâ  
aguehobryr**

(Mc 13.9-13; Lc 21.12-19)

<sup>16</sup>Jesus aguely:

—Ydataungâ. Deus xunâry egatuze ogonodylymo kâmayno modo duaxi, auwa tâwinzeim modo duaxi kaneru igonodyly ara. Âgâu ara, tonomegue itaungâ, kâmaynodâpa tâdâsema-guely mâuntuhomoem. Koendâ olâ itaungâ, papa ara, âdanimomân-hewiâpanânehomba mitomoem. <sup>17</sup>Tonomeguelâ itaungâ. Yizepaom

modo awâsemo, yeinwândylymogue. Adahoze âmaemo pymâ modo enadoram, mâzenagazeohomoem. Apiogüen-honzemo âtâ tâdâtâdyguyho oday. <sup>18</sup>Yeinwândylymogue, idânârâ pymâ domodoram adahoze âmaemo. “Tumunreim âmaemo” keze akaemo pymâdo, inagazedomoem. Pymâ domodo enado mataymo tâwâlâ ise unâ iwâkuru mâengatulymo âdara imakehomobryrâ wâgâ judeu domodo iwymâryam, judeu keba modo iwymâryam warâ. <sup>19</sup>Amyguehomo wâgâ tadahulizeba olâ itaungâ, pymâ domodo enadoram madahoduomo. Deus agâmolâ ise. Âurusemo amyguehomoem. <sup>20</sup>Âunârymo wâgâ kulâ inkâba ise amyguelymo, Deus Ispirityrâ xunâry wâgâ.

<sup>21</sup>—Ipemugudomoanlâ ise yeinwânni modo âzenagazeoly. Ipemugumolâ ise pymâdoram egamenrimo, âdyohomoem. Âjiukonoem, âjiwaigoruem warâlâ ise âsegame-lymo. Tâjiunwym, tymery agâlâ ise âsegame-lymo lâpylâ, âdyohomoem. <sup>22</sup>Ynynonroem mawlymogue, toenzepa ise mâjiewiâseoly. Âmaemo yeinwândyly imodânry modo olâ âsemagueze, aunloenlâ Deus agâ mitomoem. <sup>23</sup>Mârâ xidadâ eydâ matomodâ ynynonroem mawlymogue mâzenagazeoduomo, eagonro âtâ anaxi âwientaungâ, târâ ywâgâ amyguehomoem. Auguely âyanmo. Urâ Uguondo Kaynâpa Âetyby odopâze urâ, idânârâ Israel eynynâ âtâ anakâ ywâgâ amyguelymo iraynâ.

<sup>24</sup>—Enomedâni mawânkâ tonomedâzeim takazeno. Pymâ mawânkâ tâwaneim takazeno. <sup>25</sup>Tonomedâni eto ara lâpylâ ise âsenomedâni âzeholy. Âwanu sodo ara lâpylâ tâwaneim âzeholy. Ayetomo ara lâpylâ ise amâieholymo. Inakanhe aguezemo ywâgâ. Belzebu

eon-honrugue kulâ iewanu nhegae-dylymo. Ânâguezemo lâpylâ; inakanhe aguezemo âwâgâmo —kely Jesus.

(Belzebu, Satanás ezedy eagonro).

### Deus lelâ kydynrene

(Lc 12.2-7)

<sup>26</sup>Aituo Jesus aguely:

—Ânguy kâdytadaundâ, ywâgâ inagazedylmogue kulâ. Idânârâ soentaymby âjjeapanâgueowâze lelâ. Idânârâ koendâ tydasenrybyry MON warâ âjidahoze. <sup>27</sup>Âyanmo kulelâ auguehobyry idânârâ kurâ domodoram egatuwâdaungâ. Âmaemo kulelâ mâindatybymogue kurâ domodo xurutaungâ.

<sup>28</sup>—Ârinmo kâdytadaundâ; igado-pyrymo âdaunloenlâ adaindânry tyân-hoem ton-honremba mawânkâ. Tâwâlâ lelâlâ wâne inagazedylmo. Ton-honremba olâ Satanás eydâ tatoram ogonosemo. Deus anhekyly xytadaungâ. Awâkâ kulelâ mawânkâ âigueduomo, Satanás eydâ atoram ogonosemo ton-honreim. <sup>29</sup>Idânârâ tâense awâkâ Deus. Etaungâ konopio. Imâem tâwâentuneba konopio. Tokalâ moeda imeimbyry tâwâensenrygue azagâ konopio tadanâhoze. Onro onwa igueypyem nihuguebamo olâ Deus aguehobyry odayba kulâ. <sup>30</sup>Nhetâmo lâpylâ Deus. Âdara lelâ angahumo wâgâ angahudumo awyly tutuze. <sup>31</sup>Awylygue tâseguâdâzeba itaungâ. Deus konopio tâense watay, âmaemoma kuru nhesemo lâpylâ. Xurâem, âmaemo tywyneim kuru, konopio modo takaze —kely Jesus.

“Jesus eynnonro urâ” keze

tyanenry modo

(Lc 12.8-9)

<sup>32</sup>Jesus aguely:

—Tâjidiuay, “Jesus eynnonro urâ” myguelymo-ro watay, “Ynnonrolâ

asaemo” keze lâpylâ urâ Pabai kaynon-roam, enado mawylmo ume. <sup>33</sup>Tâjidiuay, “Jesus eynnonro keba urâ” myguelymo-ro watay olâ, Pabai kaynonroam, “Ynnonro mâkeba asaemo” keze lâpylâ urâ, enado mawylmo ume —kely Jesus.

### Jesus wâgâ âewiâmunezemo

tagonro agâ

(Lc 12.51-53; 14.26-27)

<sup>34</sup>Jesus aguely:

—Kâetuo, inakanhe tadawyly, tâdâ-seguebyly warâ adainly keanra keankâ, inanajimo. Arâpa olâ. Espada iemaym kâenewyly waunlo ara urâ. Ynnonro kebaom modo ynnonro modo agâ âseguebyzemo. <sup>35</sup>Yeinwândylmogue, âpemugudomolâ ise âewiâsenimo. Tâjimeom tunwym iewiâseze. Tâzexiry tyze iewiâseze. Tâjiweise tymenhundu iewiâseze. <sup>36</sup>Warâ ise âpemugudomolâ âewiâsedylmo, âkelomo agâmo iewiâky takaze kehoem yeinwândylmogue.

<sup>37</sup>—Ynnonroem midyse mataymo, unwânmo, âzemo, âmerymo, ixiry mo warâ takaze kehoem ywynedaungâ. Yakadâ âdaunlo kurâdo kulâ mâin-wynguylymo-ro watay, ynnonroemba ise âutulymo. <sup>38</sup>Ynnonroem lelâlâ midyse mataymo, ize matomo ara kulâ amidylmo imowâdaungâ. Mâsenagazedylmo umelâ auguely idataungâ, yeinwântaungâ warâ, âiguehomo odaji kehoem, kruz manâ-dylmo-ro waunlo ara. Arâpa-ro watay, ynnonroemba ise mataunaze. <sup>39</sup>Tyâzeza mitomoem kulâ, “Jesus eynnonro keba urâ” myguelymo watay, Deus eydâ atoram mydâpa ise âmaemo. “Âdykâ ‘Jesus eynnonro mâkeba urâ’ uguewâpyra ise urâ, tâwâlâ ise kâdyoly” myguelymo watay, Deus eydâ atoram idâze âmaemo, aunloenlâ eagâ mitomoem —kely Jesus.

**Koendonro modo Deus xuduze  
tynnonro modoram**

(Mc 9.41)

<sup>40</sup>Jesus aguely:

—Koendâ nhenimo, koendâ iedyly lâpylâ. Koendâ ieni, ugononibry Deuslâ koendâ nhekyly. <sup>41</sup>Koendonro xuduze Deus tunâry egatuwâni modoram. Koendonro xuduze lâpylâ olâ tunâry egatuwâni modo emawyadâni modoram. Koendonro xuduze Deus, koendâ aitaynrim modoram. Xirâ koendonro lâpylâ xuduze Deus, koendâ aitaynrim modo emawyadâni modoram, koendâ aidylymogue.

<sup>42</sup>—Âdylâ amânhekyly ynnonro modo emawyadâdoen-ro watay, tâwâlâ wâne parugue kulâ mankuilymo, alâ olâ ise Deusram mâzepywaolyo. Tâwâlâ lelâlâ wâne ynnonro modo âdy keba awyly, alâ olâ Deusram âzeholyo. Xirâ mâuntudyzemo kuru wato —kely.

**João Batista tynnonro modo  
Jesus agâ agueze ingonotobyry**

(Lc 7.18-35)

**11** <sup>1</sup>Jesus xina doze lelá tindua-keyby modo xurudyly ewanikeimbyryem, târâpa idâly, xidadâ modo anakâ Deus wâgâ unâ iwâkuru egatuze.

<sup>2</sup>Kadeia oday myani João Batista, Jesus Cristo egary indadyly. Egary tindatuo, azagâ tynnonro modo ewy ingonodyly Jesusram. <sup>3</sup>Jesusram taintuo, aguely indadylymo aidyly nhedylymo warâ. João aguehobyry ara Jesus nhapâiguelymo:

—“Deus Ingonotyby âese” keho-byrylâ âmâ? Eagonro ise xina inwânwânkyly? —kelymo.

<sup>4</sup>Aituo Jesus in-hoguly:

—Odopâdaungâ. Mâentybymo, mâindatybymo warâ Joãoram ega-

tuwâdaunda. <sup>5</sup>“Jesus tâwâneim modo kua nhedyly xina nedâ. Epybyry modo koendâ tâense. Adakobâdânrybyry modo tadakobâzemo iwerâ. Tâjimituguelygue tâwânuneimbyry modo itugoenzeybyem. Kydatânrybyry modo koendâ tydasemo. Iguewâtyby modo kurâem tyetonze. Kaikâ modoram Deus xunâry iwâkuru Jesus nhegatuly xina nidadâ lâpylâ. <sup>6</sup>“Tuomareim ise yeinwândyly imodânry modo!” nygue Jesus” myguelymo ise Joãoram —kely Jesus.

<sup>7</sup>Aituo João eynnonro modo azakâlâ odopâdylymo. Idâpygueduomo Jesus aguely João wâgâ kurâ domodoram:

—Agui âmaemo ewy tâtâze âji âdy peba atoram, João aguely idase. Âdaunloka mâkâ, inanajimo? Etaungâ adapezeinly-ro watay, poji wayam wayam warâ tâzekânize. Myara keankâ João, inanajimo? Âdy pebaom modoram âkelo unâ nhegatuly, âdy-peom modoram âkelo unâ nhegatuly warâ keankâ aguely, inanajimo? Ainkâba, tokalelâ mâkâ xunâry. Âdypebaom agâ, âdypeom agâ alelâ mâkâ Deus wâgâ aguely. <sup>8</sup>Medâmolâ ety iwogonro iwâkuru keba awyly. Âdypeom xidadâ odano, âtâ imâsedo iwâkurugue tâtyreim warâ mawânkâ âtâ tâjiwogonro tâwânenseim ieni. Âdypeom mâkeba mâkâ.

<sup>9</sup>—Âdaunlo kuruka mâkâ, âmaemoem? Deus itaumbryry egatuim? Mâkâlâ mâkâ Deus itaumbryry egaturinlâ. Warâ olâ auguely âyanmo. Deus itaumbryry egatuim âdaunlo kulâ mâkeba mâkâ. Idânârâ Deus itaumbryry egatuim modo takaze tynreim mâkâ. <sup>10</sup>Warâ iwenibyem awyly Deus itaumbryry awo wâgâ: “Anra unâry egatuim. Waunroenlâ ise merâ kâingonodyly, kurâ domodo nhonse

Messias saintodâ” kewândy Deus. Kurâ domodo yaintodâ nhoniem kehobyry mâkâ João. <sup>11</sup>Uguondo âdaunlo kulâ mâkeba mâkâ João. Tynreim mâkâ, idânârâ saguhoem Deus itaumbry egatuwâni modo takaze. Mâkâlâ keankâ “Inepa ise Deus Ingonotyby âewyly” keim. Âdara Deus kurâ domodo iwymâryem idyly awyly koendâ nutuba olâ mâkâ. Iwerâ Deus Ingonotybygue tywymâgueim watay, mâkâ takaze ise xynru. Tâwâlâ lelâlâ wâne âdaunlo kulâ awyly. Xirâ mâuntudyzemo kuru wato.

<sup>12</sup>—João Deus wâgâ unâ egatuly nhagupygueduolâ keankâ kurâ domodo Deus tywymâryem izetonro modo âzenagazeoly Deus eynnonro keba modoram. Inakai modoram adainhoze kelymo, Deusgue iwymâgumogue. <sup>13-14</sup>Saguhoem Moisés iweniwândymy âdara Deus pymâem idyly awyly wâgâ. Deus eynynâ aguewâni modo iweniwânmo lâpylâmy warâ. “Elias emyenro sainse, Deus itaumbry egatuim, Deus Ingonotyby saindyly iraynâ” kelymo. Aguehomo-byrylâ mawânkâ mâkâ João. Aguely mâinwâmpyra olâ keankâ âmaemo. <sup>15</sup>Augueho mâuntudyze âmaemo watay, koendâ idataungâ.

<sup>16</sup>—Âdaunloem mawylymo wâgâ agueze urâ, âmaemo xirâ umeno modo. Iamimeom tagonrodo taseray âzenanâdogue tâzenanâdyzebaom ara kulâ âmaemo. <sup>17</sup>Tataen-hodo tugoru indyduo, tâidysebamo. Tataen-hodo itynru ume, tytyrembamo. <sup>18</sup>Âdiempa kulâ João Batista âwinduadyly, vinhu nenypa. Warâ awylygue, “Kadopâbeom awâkâ” myguelymo. Urâ Uguondo Kaynâpa Âetyby kâwinduadylygue, kadakuilygue warâ, “Idolai awâkâ. Nhuduypymo tâinze, tânyze alelâ. Impostu epywado emakewâni modo,

kurâdo inakai modo eataen-ho warâ awâkâ” myguelymo. <sup>19</sup>Aguitobyry, aguykehobyry warâ wâgâlâ Deus nhutuly xurâem, xurâempa warâ kydâzeholy —kely Jesus.

**Jesus einwântânry modo  
âsenagazedo  
(Lc 10.13-15)**

<sup>20</sup>Xidadâ Corazimdâ, Betsaidadâ, Cafarnaumdâ warâ Jesus Deus eon-honrugue toenzepa adyesenry modo aiemâ. Tâenselâ wâne akaemo Jesus aidyly; alâ olâ neinwâmpyra awylymo. Inakanhe adâidylymogue nâjityembyramo lâgâlâ. Adâidyly timodyzebamo. Aituo Jesus ton-honre kehoem iwâgâmo aguely adaguly:

<sup>21</sup>—Warâ auguedyse wawyly unâry izepaom modoram. Toenzepa kehoem ise mâsenagazedilymo, âmaemo Corazim donro modo, Betsaida donro modo warâ. Toenzepa adyesenry modo kehoem ajiedâ âjidadâry-modâ, Deus eon-honru kâenehohoem. Yeinwândyseba olâ mataunaguynre. Tumunruneim modo akâwândy Tiro, Sidom warâ donro modo. Deus eon-honru enehonze âjidadâry-modâ awitobyry ara ânguylâ aidyly-ro watay, inakanhe adâidyly tumozemo tâise, Deus tâinwânsemo warâ. Tâzetydzemo tâise âtâem saku tyxieim sakâjibygue, pelupâ tyangahumo onwa tyeseemo tâise warâ, inakanhe adâitomobyry wâgâ tâjityendyly tienehon-homoem, imoimbyryem tawyly tienehon-homoem warâ. Deus eon-honrugue awidyly tâense lelâlâ wâne âmaemo. Inakanhe amidilymo mâinmopa olâ âmaemo.

<sup>22</sup>—Corazim donro modo, Betsaida donro modo warâ, tâdâsenagazedo saintuo, âmaemo yynâbaom modo toenzepa ise mâsenagazedilymo,

Tiro, Sidom warâ donro modo âsenagazedo takaze kehoem. Xirâ mâuntudyzemo kuru wato. Medâmolâ Deus eon-honrugue awidyly. Akaemo olâ nepyra.

<sup>23</sup>—Âmaemo Cafarnaum donro modo koendonro, tynreim warâ âmaemo, inanajimo. Deus eydâ atoram mydâlymo warâ wâne, inanajimo. Arâpa olâ. Satanás eydâ atoram ise mâjigonoholyo. Inakai kehoem akâwândy Sodoma donro modo. Deus eon-honru enehonze Cafarnaumdâ awitobyry nhedylymo-ro watay, inakanhe adâidyly tumozemo tâise, Deus tâinwânsemo warâ. Ijidadârymo tainzepa tâise. Deus eon-honrugue awidyly tâense lelâlâ wâne âmaemo. Inakanhe amidlymo mâinmopa olâ âmaemo. <sup>24</sup>Cafarnaum donro modo, xypyry etay, tâdâsenagazedo saintuo, âmaemo ynyndâbaom modo toenzepa ise mâsenagazedlymo, Sodoma donro modo âsenagazedo takaze kehoem. Xirâ mâuntudyzemo kuru wato. Tâenselâ âmaemo Deus eon-honrugue awidyly. Akaemo olâ nepyra —kely Jesus.

**Âmaemo mâsemaguedyzedo  
modo Jesusram âetaungâ**

*(Lc 10.21-22)*

<sup>25</sup>Ilâpyryem Jesus aguely Deusram: —Kau odano modo, onro wogonro modo warâ sodo âmâ, Pabai! Âdaunlo modoanlâ âunârybyry mutuen-ho, tonomegueim modoram lelâ inkâba, enomedâdaymby modoram lelâ inkâba warâ. <sup>26</sup>Amânhedyse mato aralâ ise aidyly —kely.

<sup>27</sup>Deus agâ adâkebygueduo, Jesus agueondyly tonlo modo agâ:

—Pabai idânârâ won-honru, ienomery warâ xuduim. Mâkâ kulelâ koendâ kuru utunri. Urâ lelâ lâpylâ Pabai Deus koendâ kuru xuturim

warâ. Eyam kâuntuen-hoymby lâpylâ olâ koendâ Deus xutuze.

<sup>28</sup>—Mâkâ tâmânreingue tyekeim wâne ekozely, myara ekozeybyem mawylymo. Yeinwântaungâ, ikuâdânimo, ahulirinmo warâ kâentyhoem. Âkarymo wogonro tâmânreingue âekelymo waunlo ara ise, ikobyzegelymo. <sup>29</sup>Ynyonroem itaungâ. Âsenomedâdaungâ ywâgâ. Ikobyzeguehomo ese âmaemo. Koendonro urâ, tyewiâseim mâkeba. Imakerinmoem ise urâ. <sup>30</sup>Kâenomedâdo ara amitomoem ton-honruneba, agâmolâma ise urâ, on-hondâzemolâ. Tâmânreim sanâni emawydâni emyenro urâ —kely Jesus.

**Jesus eynynonro modo  
tâzekobyzegueho oday trigu  
ewily nhasewâdomobyry**

*(Mc 2.23-28; Lc 6.1-5)*

**12** <sup>1</sup>Tâzekobyzegueho oday ani Jesus agâ xina trigu ejidy ezakâ sakadyly. Toenzepa ani xina ewindy. Sahuadybyem ani trigu ewily. Awylygue xina nhasewâdyly, tâmarygue xina nhaturguely, xina nhaguly warâ. <sup>2</sup>Fariseu domodo ewy xina aidyly tientuo ani Jesusram aguelymo: —Egâ âynynonro modo aidyly! Trigu ewily nhasewâdylymo, nhaturguelymo warâ. Tutuzelâ âmâ, kâzewenry eynynâ kokobyzegueho oday kydâsewaniba kydawyly —kelymo.

<sup>3</sup>Aituo Jesus aguely:

—Enanâguewâdaungâ typynigueba tâituumo, kydamu Davi, eagonro modo warâ aitomobyry, toenzepa tâwindymogue. <sup>4</sup>Deus ety odaji myakâwândy Davi egawândyly. Târâ myakâwândy Deusram xuduypy pão modo nhanâdyly, nhedawynlymo tagonrodo agâ. Kâzewenry eynynâ olâ tâise akaemo pão nedawympa. Kurâdo eynynâ Deus agâ aguewâni modo lelâ tâise mârâ pão edawynrim, âkelo modo lâpylâ

warâpa. Deus xurâem olâ myakâwândy akaemo inakanhe aidyly keba. <sup>5</sup>Kurâdo eynynâ Deus agâ aguewâni modo kokobyzegueho oday âsewaniduo, inakanhe aidylymo mâkeba lâpylâ.

<sup>6</sup>—Deus ety takaze mâynrenkylymo pe tarâ âduaymo awyly olâ mâuntudyzemo kuru wato. <sup>7</sup>Warâ Deus aguehobyry iwenibyem awyly: “Ânguydo imeom xyâly, iaduândyly mâkeba ize wato kuru, kurâ domodo âjigüe koendâ awyly” kewândy Deus. Xirâ mâuntuba olâ âmaemo. Âdakeze xirâ aguely awyly mâuntulymo watay, ynyonro modo âdaituoba kulâ mâenwentâdaymba tâise âmaemo. <sup>8</sup>Uguondo Kaynâpa Âetyby urâ. Âdy iwâkuru adyeseim, adyenyry warâ tâzekobyzegueho oday xuturim urâ —kely Jesus.

**Jesus uguondo  
âzemapiluguedânry kua  
nhetobyry**

(Mc 3.1-6; Lc 6.6-11)

<sup>9</sup>Târâpa âxigüeybyem Jesus idâly âtâ tâdâtâdyguyhoram. <sup>10</sup>Uguondo âzemapiluguedânrybe ani târâ. Tâlâ pylâ ani kurâdo ewy Jesus izepaom modo. Jesus tiunâguedomoem kulâ aidyly enuagaeni modo. Xunâzelymo: —Tâzekobyzegueho oday Jesus, awâkâ uguondo emary kua nhedyly watay, Moisés inweniby araba aidyly awyly aguykenre. “Deus aiedyseba ato amientai” kykenre —kelymo.

<sup>11</sup>Aituo Jesus in-hoguly:

—Tâzekobyzegueho oday iguymo kaneru tâtagueim odaxi ihugüely-ro watay, kopaelâgâem mânhenhonwâbyra âmaemo, mâentyhomoem. Kydâsewaniho keba awyly umelâ, tâzekobyzegueho oday iguymo tâtyze âmaemo. <sup>12</sup>Kaneru takaze kywynu! Awylygue, tâzekobyzegueho oday

koendonro aguiendyly watay, Deus ize atolâ aguienkyly —kely Jesus.

<sup>13</sup>Aituo Jesus uguondo âzemapiluguedânryram aguely:

—Âzemapilugügâ —kely.

Jesus agueduo, uguondo âzemapilugüely, emary kua ienipyryem awylygue. Koendâ idyly; emaduno ara idyly.

<sup>14</sup>Fariseu domodo olâ târâpa egaselymo, Jesus tyâen-hon-hoem tâtunâguedomoem.

**Saguhoenlâ Isaiás Jesus  
wâgâ aguehobyry**

<sup>15</sup>Tyâly kelymo tiuntuduo ani Jesus târâpa âxigüely. Toenzepa ani kurâ domodo nhapygue idâlymo. Akaemo duano tâwânuneim modo idânârâ kua nhetaynly. <sup>16</sup>Aituo ani eyanmo aguely: —Ânguyran-ne awitobyry kâzegatuwâdaundâ —kely.

<sup>17</sup>Saguhuem iweniwânlâmy Isaiás Deus Ingonotyby arâ aidyly wâgâ. Deus aguehobyry aralâ kehoem Jesus wâgâ aidyly.

<sup>18</sup> “ ‘Etaungâ! Anra merâ iemary kâinduakeyby.

Toenzepa kâinwyneguyly merâ, toenzepa womazeâni warâ.

Yispiritury nhonwa iese urâ.

Judeu domodoram, judeu keba modoram alelâ ise unâry koendonro nhegatuly.

<sup>19</sup> Kurâ domodoram tyewiâse aguepa ise, nadaenkeba ise warâ.

Arua oze nâseubyra ise.

<sup>20</sup> Toenzepa ise kytyendyly.

Awylygue ise kurâ domodo âdiempa tâinwânni modo koendâ lelâ nhedyly.

Peto nhâseajiom wâne tyânlanehonzeba myara ise

âdiempa tâinwâni  
 nitywanânehomba awyly.  
 Inakai modo adain-ho odaxi  
 alâ ise aisezedyly.  
 Kurâ domodo inakanhe  
 tâentuneim modo koendâ  
 lelâ nhedyly,  
 se iwatary âdukagâdyby  
 saseudyly wâne myara.

<sup>21</sup> Einwânse akaemo idânârâ,  
 tâmakehomoem' kely  
 Deus,"

itaumbryry Isaías iweniby.

**“Satanás eon-honru kainly lakuru  
 Deus eon-honrugue” Jesus  
 kehobyry**

(Mc 3.20-30; Lc 11.14-23)

<sup>22</sup> Ilâpygueduo ani Jesusram uguondo  
 nhadylymo, tytarembe, kâempyra warâ  
 âiehoiby kadopâram. Jesus mâkâ kua  
 nhedyly. Kadopâ egaseduo uguondo  
 koendâ âjítainly idyly, epyemba idyly  
 warâ. <sup>23</sup> Awârâ tientuo, tonlo modo toen-  
 zepa âsewânilymo. Âjigüe aguelymo:

—Davi kydamudo iwymâryem awyly  
 myakâwândy myara keanra ise Jesus  
 kywymâryem awyly —kelymo.

<sup>24</sup> Awârâ tindatuo fariseu domodo  
 aguely:

—Kadopâ modo iwymâry Belzebu<sup>d</sup>  
 eon-honrugue kulâ awâkâ kadopâ  
 modo nhankyly —kelymo; kewâ-  
 dylymo kulâ olâ.

<sup>25</sup> Âdara xunâgumo awyly tutuze  
 myani Jesus. Aituo aguely:

—Âjigüe âzety anano modo âse-  
 guebyly-ro watay, mârâ âtâ anary  
 tadainze. Âjiukonoem, âjiwaigoruem  
 warâ âjigüe âseguelyly-ro watay,  
 tunwyndo sodokewâzemo. Koendâ nâze-  
 pyramo, âjidiuryem tâisemo mawânkâ.

<sup>26</sup> Kadopâ modo iwymâry mawânkâ

Satanás. Kadopâ modo âjigüe âseguely-  
 lymo, tygue tygue idylymo warâ watay,  
 ton-honrembe tâise Satanás. <sup>27</sup> “Jesus  
 kadopâ nhankyly olâ, Belzebu mawânkâ  
 aitoem eon-honru xudunri” tâkeze  
 âmaemo. “Belzebu eon-honrugue kulâ  
 kadopâ mânhankylymo” myguepa olâ  
 âmaemo âynynonromoam. Arâ âyny-  
 nonromoram amyguepa âmaemo-ro  
 watay, arâ yam adâkezebe lâpylâ  
 itaungâ. <sup>28</sup> Deus eon-honruguelâ kadopâ  
 modo kânhankyly. Won-honru tiun-  
 dullygue, tutuen-honze mâkâ, tarâ  
 pymâem wawyly —kely Jesus.

<sup>29</sup>—Uguondo ton-honreim ety odaji  
 ânguy negawântaymbe, emagaduze,  
 tâkâjizeba mâkâ watay. Ekâjiduo  
 lelâ isejiguy emagazedlyly. Satanás  
 eon-honrugue aini mâkeba urâ,  
 eon-honru sainrim lâkuru —kely.

<sup>30</sup>—Ynynâba âmaemo-ro watay,  
 ynynonroem inkâba âmaemo. Kurâ  
 domodo Deus nheinwântoem  
 iemawyadâbyra âmaemo watay,  
 neinwâmpyra itomoem amânhe-  
 nehonlymo lakuru. Ydâ iwague  
 mânhenonlymo; mâindâtyguelymo  
 tâise koendonro kuru —kely Jesus.

<sup>31</sup>—Deus izepa ato amânhedlymo,  
 amyguelymo, mâunâguedlylymo warâ  
 watay, idânârâ awârâ modo xygakeze  
 Deus, mâenkadylymo-ro watay. Deus  
 Ispirityry ewanu wâgâ inakanhe kulâ  
 amyguehomobyry olâ ise Deus nyga-  
 keba. <sup>32</sup> Urâ Uguondo Kaynâpa Âetyby  
 wâgâ inakanhe amyguelymo-ro watay,  
 idânârâ yam inakanhe amygue-  
 homobyry xygakeze Deus, Deusram  
 mâenkadylymo nhygakehoem watay.  
 Deus Ispirityry ewanu wâgâ inakanhe  
 kulâ amyguehomobyry olâ ise Deus  
 nygakeba. Xirâ mawânâ mâuntu-  
 dyzemo kuru wato —kely Jesus.

<sup>d</sup> 12.24 Satanás ezedy eagonro awârâ “Belzebu.”

**Ewily wâgâlâ nady âdaunlo  
awily xutuly**  
(Lc 6.43-45)

<sup>33</sup>Jesus aguely:

—Se takyguenry koendâ lelâ ewisely; kiein-hoem tuduze. Se takygueim inakanhe kulâ ewisely; kiein-hoem nudupa. Ewily wâgâlâ se âdaunlo awily xutuly, koendonro, inakai warâ awily —kely Jesus.

{Koendâ aguidyly, aguykely wâgâlâ koendonro kydawyly âdutuoly. Inakanhe aguidyly, aguykely warâ wâgâlâ inakai kydawyly âdutuoly. Warâ Jesus konomedâze aguely.}

<sup>34</sup>Jesus aguely:

—Âgâu ara kâmayno kulâ myaze âmaemo! Awilygue koendonro modo wâgâ amyguepa mawilymo. Kyangahu odanolâ mawânâ aguykeho. <sup>35</sup>Âdylâ ekanâdo oday koendonro ekanâdyby watay, koendonrolâ tâtyzeim. Inakai ekanâdyby watay, inakailâ lâpylâ tâtyzeim. Arâ lâpylâ kunâry kyangahu oday kydâpaunzedo kienkanâdyby. Koendonro watay, koendonrolâ aguykeho. Inakai watay, inakailâ aguykeho warâ.

<sup>36</sup>—Xypyry etay, Deus enadoram mâepanâgueduomo, inakanhe amygehobryry ara ise mâkâ idânâra inagazedilymo. Xirâ mawânâ mâuntudyzemo kuru wato. <sup>37</sup>Âunârymo wâgâlâ âdaunlo mawilymo tutuen-honze âmaemo. Âunârymo wâgâlâ ise Deus tâwentâzeinhe, tâwentâzein-emba warâ mawilymo nhutuly —kely Jesus.

**“Adyenesry aiekâ” kehomobryry  
Jesusram**

(Mc 8.11-12; Lc 11.29-32)

<sup>38</sup>Ilâpygueduo Moisés inweniby wâgâ enomedâni modo, fariseu domodo warâ Jesus iopaji idâlymo, aguelymo:

—Âdylâ adyenesry amânhedily tien-dyse xina, Deuslâ ogononi, on-honru xuduim warâ awily xina nhutuhoem —kelymo.

<sup>39</sup>Aituo Jesus eyanmo aguely:

—Iumunrumi âmaemo xirâ umeno modo! Deus tumoze âmaemo, pekodo tuso inmoho ara. “Adyenesry aiekâ, Deus Ingonotyby mawily xina tiuntuhoem” tâkeze âmaemo. Deus itaumbryry egatuumbyry Jonas aito-bryry enanâguedaungâ. <sup>40</sup>Kanra imâsedoram xuoympyem, azagâ<sup>e</sup> emedyly idily ara myakâwândy mâkâ ioday awily, Niguepa olâ myakâwândy; kanra imâsedo âjitaguguely ara. Alâpylâ ise, yigueduo, ieguepybyry etadâdybyem awily. Azagâ emedyly idily wâgâ olâ ise kurâem witondyly. Mâenanâgueduomo ise, Deus Ingonotybylâ wawily, mâuntulymo. <sup>41</sup>Kanra adyry odanopyryem myakâwândy Jonas idâly Niniveram, Deus itaumbryry egatuze. Jonas aguely tindatuomo myakâwândy, mârâ xidadâ odano modo Deus nheinwândylymo. Âjityendylymo inakanhe tawily inmolymy warâ. Akaemo emyenro keba olâ âmaemo. Urâ, Jonas takaze won-honru. Auguely mâinda-dysebamo, mâinwândysebamo warâ

<sup>e</sup> 12.40 Judeu domodo emedyly nhapâgueho ara, azagâ tokalâ warâ myakâwândy, tokalâ iguandyly aralâ mawânâ kogoneyam watay, nhapâguelymy. Awilygue karaiwaem, “azagâ tokalâ” kely, “azagâ emedyly” kely keba awily. Ânguy Pakuenraram sexta-feira kopae nove horas saindyly. Sábado oday târâlâ. Domingo pealâ duas horas pylâ tâty anaxi odopâdyly-ro warâ watay, “Azagâ tokalâ warâ emedyly ara Pakuenradâ wakyntre” kepa. Bakairi domodo xurâem azagâ emedyly ara kulâ. Awilygue xirâ versiculu wâgâ koendâ itoem, “azagâ emedyly idily ara” kely iwenily.



olâ âmaemo. Awlylgue ise xypyry etay, Deus enadoram mâepanâgueduomo, warâ ise Nínive donro modo Deusram aguelymo: “Tâwâlâ akaemo kurâ domodo Jesus aidyly, aguely warâ einwântânrybyry modo nâse-nagazedâmo” kezemo.

<sup>42</sup>—Enanâguedwâdaungâ mâkâ pekodo Sabádâ pymâpyry. Taypa myakâwândy mâkâ idâly, eagonro anaymba, Salomão enomery idase. Ienomery olâ Salomão enomery takaze kehoem. Tarâ âduaymo lelâlâ wâne urâ, arâlâ olâ inomedâdomo mâindadyseba, mâuntudyzeba warâ mawlylymo. Awlylgue ise xypyry etay Deus enadoram mâepanâgueduomo, warâ ise mâkâ pekodo pymâ aguely Deusram: “Tâwâlâ akaemo kurâ domodo Jesus tonomedâdyly tindadysebamo atomobyry ara nâse-nagazedâmo” keze —kely Jesus fariseu domodoram, Moisés inweniby wâgâ enomedâni modoram warâ.

### **Kadopâ odopâdobyry**

*(Lc 11.24-26)*

<sup>43</sup>Jesus aguely:

—Tâlâ myani kadopâ kurâ odaypa nhânkyby. Mâkâ kadopâ adakobâdyly myani paru peba ato einkâ, tâjidy xuize. Tâjidy nepyra olâ myani. <sup>44</sup>Aituo mâkâ kadopâ tâwâlâ aguely: “Iegasehobyryanlâ ise kodopâdyly mâkâ saguhoem inakanhe kânhybyanlâ” kely. Adâkeduo, odopâdyly. Nodopâbyra awyly ara, koendâ myani mâkâ uguondo, eagonro kadopâram nâdynanâoba, âtâ koendâ kehoem nhontyby, taxiembra wâne myara. <sup>45</sup>Aituo myani mâkâ kadopâ sete lelâ tataen-hodo inakai modo kuru ese idâly, mâkâ uguondo odaxi tâxiedomoem. Aituo mâkâ uguondo

ago kehoem kuru inakanhe itondyly, tokalâ kadopâbe tatobyry takaze kehoem. Arâ lâpylâ ise inakanhe misezedylymo, yeinwâmpyra âmaemo watay —kely Jesus.

### **Jesus tyze, tukonodo warâ wâgâ aguehobyry**

*(Mc 3.31-35; Lc 8.19-21)*

<sup>46</sup>Jesus aguely ume ise, iukonodo warâ saindylymo eydâ atoram. Kuoholâ ingâsenehonlymo. <sup>47</sup>Aituo Jesusram aguenri aguely:

—Âze, âukonodo warâ tarâ kuo-homo. Agâ adâkedyzemo —kely.

<sup>48</sup>Aituo Jesus aguely:

—Yze lelâlâ mâkâ pekodo. Konodo lelâlâ akaemo uguondo modo warâ. Tâlâ lâpylâ olâ yze ara lelâ, konodo ara lelâ warâ kâenkyly kuru —kely.

<sup>49</sup>—Etaungâ ynynonro modo. Asaemo mawânkâ yze ara, konodo ara warâ kâenkyly, kâinwynegyly warâ. <sup>50</sup>Idânârâ mâkâ Pabai kaynonro ize ato ara aitaynrim modo mawânkâ konodo ara, koudo ara, yze ara warâ kâenkyly —kely Jesus.

### **Jesus trigu ewy tamuizze etâni wâgâ unâ nhegatuhoobyry**

*(Mc 4.1-9; Lc 8.4-8)*

**13** <sup>1</sup>Ilâ iguandyly umelâ Jesus âtâ odayba egasely. Paru Galiléia emelaji idâly. Târâ ekadyly, kurâ domodo enomedâze. <sup>2</sup>Toenzepa kurâ domodo eydâ awyly tânâmize kehoem. Awlylgue pepi imeimbyry târâ ekâjiby odaxi idyly, târâ enday kurâ domodo tienomedâdoem. Kurâ domodo tâpagune lelâ paru emelay, Jesus xunâry idase. <sup>3</sup>Unâ ani nhegatu-ly, kurâ domodo tienomedâdoem. Aguely:

—Xirâ idataungâ. Tâlâ myani uguondo trigu tamuizze etâni typi

ezay. <sup>4</sup>Nhamuinday, tâlâ myani ânwa oze ihugueim. Mârâ myani konopio modoram tadaguoze. <sup>5</sup>Tâlâ pylâ myani toenzepa tuhube atoram ihugueim, onro tâsanigueba atoram. Inepa kehoem myani târâ iazely wâne, tydâetâgueba olâ mârâ ago idyly. <sup>6</sup>Xixi myani nady tyaduânse, iwindy ago ondaxi nâtâba awylygue. <sup>7</sup>Tâlâ myani tyguyreimpe atoram ihugueim. Tyguyreim modo, trigu modo warâ âzekiba ago idyly myani. Tyguyreim olâ ago ini kuru, trigu takaze kehoem. Aituo kopâ ihugueyby nikuiba. Mârâ duay tawylygue trigu newiseba. <sup>8</sup>Tâlâ myani onro iwâkuru onwa ihugueim. Awylygue koendâ kehoem ago itaynly. Toenzepa myani mârâ nady modo ewitunu. Koendâ kehoem myani ekaunâdyly ewy modo wâgâ cem, sessenta, trinta alelâ kehoem —kely.

<sup>9</sup>Warâ Jesus nhगतuly eyanmo.

—Xirâ unâ koendâ mâuntudyze mataymo, koendâne angahumo odaji ietaungâ —kely Jesus.

**Âdaituo unâ tâgatuzeingue kulelâ tienomedâdyly Jesus aguehobyry**  
(Mc 4.10-12; Lc 8.9-10)

<sup>10</sup>Aituo xina Jesus eynonro modo kuru nhapâiguely:

—Âdaituoka mâenomedâday unâ mâengatuly, ago lelâ amyguepa mawly? —xina kely.

<sup>11</sup>Aituo Jesus in-hoguly:

—Saguhuem mykâinane Deus kaynonro nutuen-homba âdara idânârâ iwymâryem tâidyly. Urâlâ olâ xutuen-hoim âyanmo. Koendâ ise âyanmo auguely. Deus koendâ tiuntudyzebaom modo olâ unâ tâgatuzeingue lelâ kâenomedâdyly; ago lelâ auguepa. <sup>12</sup>Imâm ywâgâ mâuntudyze âmaemo watay, Deuslâ ise mâuntuhomoem aieni. Ânguy ywâgâ tiuntudyzeba watay olâ,

âdiempa ywâgâ tiuntuyby enanânehonze, utuba ise warâ. <sup>13</sup>Awylygue, kurâ domodo kâenomedâday, unâ kâengatuly, tahule kâenomedâdomo nutuba itomoem. Agânhekyly tâensemolâ wâne, nutubamo olâ, nepyramo-ro waunlo ara kulelâ. Auguely tydasemolâ wâne, âdakeze auguely nutubamo olâ ise, nidapyra waunlo ara lelâmo. <sup>14</sup>Deus aguehobyry Isaías inweniby ara aidyly iwerâ:

“Idase wâne âmaemo,  
âdakeze aguely awyly  
mâuntuba olâ ise  
âmaemo.

Ese wâne âmaemo,  
âdy mâenkylymo awyly  
mâuntuba olâ ise  
âmaemo.

<sup>15</sup>Auguely mâindadyseba,  
yeinwândyseba warâ  
âmaemo.

Mâpaunzebyramo itybyem,  
âzenuahuybyem,  
âjiwantahuybyem waunlo  
ara lelâ âmaemo,  
inomedâdomo mâuntuba  
mawlymogue.

Ywâgâ mâuntudyze lelâlâ  
âmaemo watay, auguely  
tydase,  
tâinwânse warâ tâise  
âmaemo.

Tâpaunzeze tâise âmaemo,  
âjiwantahudânry ara,  
âzenuahudânry ara warâ.  
Inakanhe amitomobyry  
tygakeze tâise urâ,  
ynynonroem mitomoem’  
nygue Deus”

kely myakâwândy Isaías inwenily —kely Jesus.

<sup>16</sup>Jesus xinaram agueondyly:

—Tutuze olâ âmaemo, awylygue omarumo. Mâenkylymo tutuze lelâ âmaemo. Mâindatyby tâinwânse

lelâ âmaemo warâ. <sup>17</sup>Saguho Deus eynynâ aguewâni modo, kurâdo Deus eynynonro modo warâ toenzepa mâenkylymo tiendyse tâisemo myakâwândy, nhetomoem anipyra olâ myakâwândy. Mâindakylymo tindadyse tâisemo myakâwândy, nidapyramo olâ myakâwândy. Xirâ mawânâ mâuntudyzemo kuru wato —kely.

**Jesus âdakeze nady wâgâ adâkely  
awyly aguehobyry**

(Mc 4.13-20; Lc 8.11-15)

<sup>18</sup>Aituo Jesus aguely:

—Ydataungâ wao. Inomedâzemo nady ewy wâgâ auguehobyry ise âyanmo koendâ kêngatuly. <sup>19</sup>Mârâ nady ewy ânwa oze tamuizze etâdyby tadaguoze. Aituo âdy niazepa myani târâ samuin-hobyrydâ. Tâlâ lâpylâ arâ Deus itaumbry idataynrim modo. Tydasemo wâne. Inepa olâ Satanâs idânârâ indatybymo nhanga-humo odayba nhetyly. Aituo pylâ Deus neinwâmpyra awylymo-ro warâ.

<sup>20-21</sup>—Mârâ nady ewy onro tuhubeom onwa ihuguewâdyby inepa kehoem iazely. Iwindy modo ago ondaxi nâtâba awylygue olâ, inepa iladaynly, iguewâdyly warâ. Tâlâ lâpylâ arâ Deus itaumbry idataynrim modo. Tindatyby modo tâinwânsemo wâne tuomare kehoem. Tâzenagazeoduo olâ inepa kehoem Deus neinwâmpyra idylymo.

<sup>22</sup>—Mârâ nady ewy tygyreim duaxi ihuguewâdyby; ago tâise wâne, newiseba olâ, tuahuze mârâ tygyreim awylygue. Tâlâ lâpylâ arâ Deus itaumbry idataynrim modo, Deus tâinwânse wâne. Xirâ onro anaym adienkyly modo wâgâ kulâ olâ âseguâdâdylymo. Toenzepa âdype tâidyly kulâ, toen-

zepa tydinherugadyly kulâ warâ olâ ize atomo. Awylygue Deus nhenanânehonlymo. Deus itaumbry nidapyra, iwâgâ nâpaunzebyra warâ idylymo. Deus wâgâ ânguy agâ aguepa idylymo.

<sup>23</sup>—Mârâ nady ewy onro iwâkuru onwa ihuguewâdyby olâ koendâ iazely, ago idyly warâ. Toenzepa ewisely. Tâlâ myani ewy wâgâ cem lelâ ewily xuduim, sessenta lelâ ewily xuduim, trinta lelâ ewily xuduim warâ. Tâlâ lâpylâ arâ Deus itaumbry idataynrim modo tindakylymo lelâ nheinwânkylymo. Deus lelâ nheinwânkylymo. Ize ato lelâ anhekylymo. Iwâgâ aguelymo toenzepa kurâ domodo nheinwântoem warâ —kely Jesus.

**Jesus joiu wâgâ unâ  
nhegatuhoobyry**

<sup>24</sup>Ilâpygueduo, Jesus âkelo unâ nhegatuondyly tienomedâdomoem. Aguely:

—Unâ segatuji wao, âdara Deus kaynonro kywymâryem lelâlâ idyly awyly wâgâ mâuntuhomoem. Tâlâ myani uguondo typi ezay trigu ewy tamuizze etâni. <sup>25</sup>Nhamuimbygueduo myani, kopae xykylymo ume, iduery ipi ezaji idâly. Trigu ewy samuin-hobyrydâ myani joiu<sup>f</sup> keho ewy nhamuinly. Samuinrimbyryem myani idâly. <sup>26</sup>Aituo myani trigu ewy, joiu ewy warâ samuimby iazewâdyly, ago itaynly, âzekiba kehoem ewisewâdyly warâ. Aituo myani sodo agâ tâwanuneim modo mârâ joiu, trigu-empa awyly nhedylymo. <sup>27</sup>Aituo myani âpa ezary sodoram idâlymo. Aguelymo eyam: “Trigu ewy kulelâma keankâ mamuinly târâ âpa ezay; toenzepa olâ joiu, trigu duakâ. Ânguyka keankâ joiu ewy mârâ ezaxi samuinrim?” kelymo.

<sup>f</sup>13.25 Trigu ipery ara iazeim joiu keho. Newiseba kulâ, nuduwâpyra âdaunlo joiu, âdaunlo trigu warâ awyly xutuhoem.

<sup>28</sup>—Aituo âpa ezary sodo in-hoguly: “Uduery keanra keankâ samuinrim” kely.

—Eagâ tâwamuneim modo ague-lymo: “Joiu xina nhonkedyzeka âmâ iweâ lelâlâ?” kelymo.

<sup>29</sup>—Warâ olâ âpa ezary sodo aguely eyanmo: “Alâ nidâ. Joiu monho-kelymo-ro watay, trigu nhonkeze lâpylâ mataunaze. <sup>30</sup>Tâwâlâ trigu, joiu alelâ âzekiba ago nidâ. ‘Ekaunâdo odaji ituo joiu ise waunroem kuru monhokelymo, mâintugâjilymo, iaduhoem, peto onwanji manmelymo warâ. Ilâpygueduo ise trigu mâenkaunâdilymo. Kâenka-nâdo odaxi mâenkanâdilymo-ro warâ’ keze urâ ekaunâni modoram” kely myani sodo —kely Jesus.

**Jesus mostarda ewy wâgâ  
aguehobyry**

(Mc 4.30-32; Lc 13.18-19)

<sup>31</sup> Jesus âkelo unâ nhegatuondyly eyanmo tienomedâdomoem. Aguely:

—Unâ segatuji wao âdara Deus kay-nonro kywymâryem lelâlâ idyly awyly mâuntuhomoem. Tutuzelâ âmaemo, idânârâ nady ewy modo takaze kehoem mostarda ewy imeimbyryem awyly. <sup>32</sup>Tâtâduo olâ tyazeze, eagonro modo etâdaymby modo takaze kehoem ago tâise, imâsedo modoem kehoem tywatazeze warâ. Awylygue tawâguneim modo iwatary wâgâ tâty anhotoem nhuduly —kely Jesus.

{“Myara lâpylâ saguhoem kuru aguipa kurâdo kulâ Deus tywymâryem awyly einwânni modo. Ilâpygueduo olâ agui idilymo” keze Jesus aguely.}

**Jesus fermentu wâgâ aguehobyry**

(Lc 13.20-21)

<sup>33</sup> Jesus âkelo unâ nhegatuondyly, tienomedâdomoem. Aguely:

—Xirâ unâ lâpylâ segatuji wao, âdara Deus kaynonro kywymâryem lelâlâ idyly

awyly mâuntuhomoem. Pekodo pão aieni imãem trigu nhedyly; fermentu olâ âdiempa kulâ nhedyly. Mârâ fermentu pão ioliho âdiempaombyry olâ trigu tuolize imãem kehoem —kely Jesus.

**Jesus unâgue lelâ  
tienomedâdaymo aguehobyry**

(Mc 4.33-34)

<sup>34</sup> Unãem lelâ ani Jesus kurâ domodo nhenomedâdily. <sup>35</sup> Warâ myakâwandy Deus itaumbyry ega-tuimbyry Asafe inwenily:

“Unã ise kãengatuly,  
eagãmo augueday.

Adaguday tutuzenrybyry wãgã  
augueday”

kely myakâwandy.

Aituo Jesus unã kurã domodo tienomedãdoem nhegatuodo, Deus itaumbyry egatuimbyry aguehobyry ara kehoem aidily.

**Jesus âdakeze joiu wãgã  
adãkely awyly aguehobyry**

<sup>36</sup> Agueypyem Jesus kurã domodo nhodokely. Xina agã âtãnra idãly. Saintrybyem iopaji xina idãly, sapãiguzee:

—Kurã domodo agã kydatay, joiu trigu duano wãgã amygueaki. Âdyka enra awãrã unãgue mâenomedã-dyzemo mato? —xina kely.

<sup>37</sup> Aituo xinaram aguely:

—Urã Uguondo Kaynãpa Âetyby trigu ewy tamuinze etãni emyenro urã.

<sup>38</sup> Trigu ewy, joiu ewy alelã âpa ezay etãdyby ara mawãnkã kurã domodo tarã onro anaym awyly, ynynonro modo, ynynãbaom modo alelã. Ynynonro modo, Deusgue tywymãgueim, trigu ewy aramo. Satanãs eynynonro modo pylã joiu emyenro-ro warã. <sup>39-40</sup> Âpa ezary sodo iduery emyenro mawãnkã Satanãs. Nady ekaunãdily umeno ara lâpylã ise xypyry etay aidily. Tãwaneim

modo joiu iaduhoem peto onwanji nnamehomo, ara lâpylâ ise xypyry etay anju domodo, Deus eynynâbaom modo eydâpa nhamelymo. <sup>41</sup>Pymâem kuru wituo, iemary modo igonose urâ târâ kaynâpa, kurâdo inakanhe aityby modo, idânârâ kurâdo inakanhe kulâ aitoem aienibyry modo warâ idâtyguyze. Mâkâ modo duaypa ynyonro modo iese iemary modo. <sup>42</sup>Peto nhântânry onwanji ise inakai modo nhamelymo. Târâ ise eogunrunumo, tyery nhagulymo warâ tâpyneândylymogue. <sup>43</sup>Awârâ ume ise ânguy Deus eynynonro kuru awyly edyly. Xixi wâne eunu duaypa idyly myara ise Deus eynynonro modo, tynakaiguneim modo duaypa idylymo. Pabai Deus pymâem atodâ ise ejikummo. Xirâ koendâ mâuntudyze mataymo, koendâ idataungâ —kely Jesus.

**Jesus tâwânseim soentyby  
wâgâ aguehobyry**

<sup>44</sup>Aituo Jesus aguely:

—Unâ segatuji wao âdara Deus kaynonro kywymâryem lelâlâ idyly awyly mâuntuhomoem. Tâlâ myani uguondo âpa ezay tâtagueim esagueim. Tiensa-gueday myani tâwânseim epyâdyby nhoenkely. Toenzepa kehoem mârâ tientuo, iomazely. Âpa ezary sodo keba olâ myani mâkâ. Aituo mârâ tâwânseim tiempyâgueyby, nhepyâdondyly. Ilâpygueduo, idâly. Idânârâ tâlâ tato modo vende nhedyly. Ebyry tienmakeybygue, mârâ tâwânseim tiempyâdobyry onro nhanâdyly —kely Jesus.

**Jesus pérola wâgâ unâ  
nhegatuhybyry**

<sup>45</sup>Jesus aguely:

—Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani uguondo

pérola vende ieni, sanâni warâ. <sup>46</sup>“Xirâ pérola toenzepa tâwânseim, tâwânseim lelâlâ, sanâkâ” kehonly myani. Aituo idânârâ tâlâ tato modo vende nhedyly. Ebyry tienmakeybygue mârâ pérola tâwânseim lelâlâ nhanâdyly —kely Jesus.

{“Koendonro kuru Deugue kywymâgu, idânârâ tâlâ kydato takaze kehoem” keze Jesus aguely.}

**Jesus âedâ kanra sawâto  
wâgâ nhenomedâdobyry**

<sup>47</sup>Jesus aguely:

—Unâ segatuji wao, âdara Deus kaynonro kywymâryem lelâlâ idyly awyly, mâuntuhomoem. Tâlâ myani uguondo modo ewy âedâgue kanra sawâni. Agui kehoem myani âedâ oday kanra inwynly, tâseim, tâsenry alelâ. <sup>48</sup>Âedâ kanrague xumyduo myani paru emelaji nhuxidylymo. Sagunu wâgâ ekadybyem, kanra iduakelymo. Cestu modo odaxi tâseim nhedylymo. Tâsenry nhamelymo lelâ warâ. <sup>49</sup>Arâ lâpylâ ise xypyry ume kurâ domodo âjaiduakeoly. Anju domodo âese; kurâ domodo iduakeze. Kurâ inakai modo etyzemo Deus eynynonro modo duaypa. <sup>50</sup>Deus eynynâbaom modo tâdâsenagazedo peto nhântânry onwanxi adameozemo. Târâ ise eogunrumo, tyery nhagulymo warâ, tâsenagazedylymogue —kely Jesus.

**Iwelo konomedâdo, saguhybyry  
konomedâdo warâ**

<sup>51</sup>Jesusram xina adapâigueoly:

—Idânârâ aguehobyry tutuze wâne âmaemo? —kely.

Aituo xina in-hoguly:

—Tutuze —xina kely.

<sup>52</sup>Aituo Jesus aguely:

—Koendâ lelâlâ Moisés inweniby wâgâ enomedâni modo yeinwândylymo

watay. Tâwâlâ Moisés inweniby wâgâ, âdara Deus kaynonro kywymâryem idyly awyly wâgâ alelâ nhenomedâ-dylymo, uguondo wâne koendonro modo tienkanâdyby saguhobyry, iwelo alelâ nhoenkely myara —kely Jesus.

**Nazaré donro modo Jesus  
neinwâmpyra atomobyry**  
(Mc 6.1-6; Lc 4.16-30)

<sup>53</sup>Unâ tiengatubygueduo ani Jesus târâpa âxiguely. <sup>54</sup>Xidadâ Nazaréram odopâdyly, tânamadobryanlâ. Târâ tâdâtâdyguyhodâ kurâ domodo nhenomedâdyly. Aguely idani-pyry modo toenzepa âsêwânilymo nhenomedâdo wâgâ. Aituo âjigüe aguelymo:

—Toenzepa awâkâ enomegu; kiuntuba olâ kurâ ânguy enomedânibyry awyly. Adyesenry modo adyese lelâlâ; kiuntuba olâ kurâ âdara awârâ anhedily awyly. <sup>55</sup>Segue âdydo imeom xygani Maria agâ imery kulâ mawânkâ; Tiago, José, Simão, Judas warâ iwaigoru kulâ awâkâ. <sup>56</sup>Eaundudo tarâ kuduaylâ inanry kyjidadârydâlâ. Kiuntuba olâ kurâ âdykâ awâkâ awârâ nhutuhobyry awyly —kelymo.

<sup>57</sup>Jesus iamugâry enipyry tawyly-mogue, Deus Ingonotyby mâkâ awyly neinwâmpyra awylymo. Aguely tinda-dyseba awylymo warâ. Warâ olâ Jesus eyanmo aguely:

—Unâ egatuim tâty anaym, unâ nhegatuduo ipemugudoram nâzeinwân-honwâbyra. Ety odano modoram, ety anano modoram warâ tâinwântuneba, âkelo kulâ einwânni —kely Jesus.

<sup>58</sup>Neinwâmpyra tawylymogue tonlo modo Jesusram nâtâba awylymo. Aituo myani âdiempa kulâ adyesenry modo târâ anhedily.

**João Batista nhangasagâdobyry**  
(Mc 6.14-29; Lc 9.7-9)

**14** <sup>1</sup>Mârâ ume Herodes Galiléia eynonro modo iwymâry. Jesus anhekyly egary indadyly. <sup>2</sup>Aituo tagâ tâwanuneim modoram aguely:  
—João Batista kurâem itondyby keanra awâkâ Jesus. Awylygüe mawânkâ eon-honru adyesenry modo aiese —kely.

<sup>3-4</sup>João igueypyem awyly tutuze olâ myani Herodes, mâkâlâ lelâlâ nhanga-sagânehoimbyry tawylygüe. Âdara João xyâhobyry awyly ise kêngatuly wao. Herodes myani Herodias agâ tohogüindyze, tukono Filipe iwydyem awyly umelâ. Alâ mykâinane João aguezesedyly eyam:

—“Kukono iwydy agâ todohogüinly lâpeba” kelype Moisés inweniby wâgâ —kezesedyly.

Awylygüe myani Herodes tyzodadury modoram aguely:

—João Batista sawâtaunda. Emakâjiwâdaungâ, etadâdaungâ warâ —kely.

<sup>5</sup>Herodes wâne myani João tyâen-hondyze, tyangahu oday xunâzely olâ:

—Kâyâen-honly-ro watay, kurâdo iewiâpaze yagâ —kely.

Kurâdo enanaji Deus itaumbry ega-tuim mawânkâ myani João.

<sup>6</sup>João kadeia oday awyly umelâ myani Herodes iazehobyry etyguedo saindyly. Alâ myani Herodias âdara João tyâen-honly awyly nhutuly. Mârâ âty ume Herodias exiry myani igâse-daymby modo nhetoem âini. Âidyly tientuo myani Herodes toenzepa kehoem nhehoguedyly. <sup>7</sup>Aituo âwynsaundoram aguely:

—Tâwâlâ âdylâ ize mato ekagâ; xuduze lelâ urâ. Tâwâlâ ise Deus

ienagazedily, mâenkadyby kâundupa wituu —kely.

<sup>8</sup>Âdy nhekaguly awyly agueim-pyryem olâ myani ise. Awylygue myani Herodesram aguely:

—João Batista mânhangasagâ-nehonly ize wato. Iweâma ise nhangahubyry mâenenehonly prato oday xarâ-ro warâ —kely.

<sup>9</sup>Awârâ tindatuo myani pymâ Herodes toenzepa kehoem itywandyly. Adâkehobyry awylygue olâ myani anhenehonly lelâlâ, tingâsedaymby modo, “Tâwâlâ ise Deus ienagazedily, mâenkadyby kâundupa wituu” kely idanipyrymoem awylygue. <sup>10</sup>Aituo sodadu ingâsedily. Eyam aguely:

—João nhangasagâda. Nhangahubyry xarâ enekâ-ro warâ —kely.

<sup>11</sup>Aituo sodadu idâly, João etadâdo-byryram nhangasagâze. Ilâpyryem nhangahubyry prato odaxi nhedyly, nhadyly âwynsaundoram. Âwynsaundo tyzeram xuduim. <sup>12</sup>Aituo myani João eynonrobyry modo xyâhobyry egary indadylymo. Tiuntuduomo myani eguepybyry ese idâlymo. Nhadylymo. Tuhu esagueyby odaxi nhetadâdilymo warâ. Jesusram, egatuze tâtâzemo myani. Warâ myani João âdyoly, awylygue myani Herodes tutuze lelâ awyly, João igueypyem awyly.

**Jesus cinco mil uguondo modo cinco pão, azagâ kanra âjihuyby warâgue nhuantobyry**

(Mc 6.30-44; Lc 9.10-17; Jo 6.1-14)

<sup>13</sup>João xyâhobyry egary tindatuo ani Jesus pepi odaxi âxiedily. Paru ozelâ xina âxiguelly. Âji âdy peba atoram xina idâly. Kurâ domodo olâ âdyam idâhobyry tutuze. Xidadâ odano modo, âtâ anary iwaguepaom odano modo warâ myani tuhuru wâgâ Jesus agâ oxioze idâwâni modo. <sup>14</sup>Pepi

odayba itybyem Jesus toenzepa kurâ domodo tynwânwâni modo nhedyly. Akaemo ityenmâ Jesus. Iduaymo tâwânuneim modo kua iemâ.

<sup>15</sup>Iguandyly ume Jesus iopaji xina idâly. Eyam xina aguely:

—Iguandyly enra. Âdykâ pyni xuiho lâpeba tarâ. Asaemo igonokâ, âtâ anary iwaguepaonram, typyniry xuize —xina kely.

<sup>16</sup>Jesus olâ warâ xinaram aguely:

—Nâtâwâbyramo ise. Âmaemolâ ipynirymô âunduwâtaungâ —kely.

<sup>17</sup>Aituo xina aguely:

—Nuduwâpyra xina nhuantomoem! Cinco pão, azagâ kanra âjihuyby alâ kulâ taunlo —xina kely.

<sup>18</sup>—Enetaungâ pão, kanra âjihuyby warâ yam —kely Jesus.

<sup>19</sup>Aituo aguely:

—Tâwâlâ kurâ domodo nekadâ âji koendonrodâ —kely.

Aituo ani Jesus cinco pão, azagâ kanra âjihuyby warâ nhanâdily. Sanânibyryem, kayam MYK idily. Deus agâ aguely:

—Koendonro lelâlâ âmâ, Pabai, awylygue xinaem xirâ pão, merâ kanra warâ mâunduly —kely.

Ilâpyryem pão nhepajiwâdily. Xinaram nhuduly, kurâdoram xina nhepâdoem. Xina nhepâdaynly umelâ kehoem Jesus pão epajiwâdyby, kanra âjihuyby warâ agui nhenehonly.

<sup>20</sup>Ize tato ara kehoem ani idânârâ kurâdo âwinduadyly; kanra âjihuyby nhâdilymo, pão nhedawynlymo warâ. Koendâ kehoem iolataynlymo. Ilâpygueduo pão, kanra âjihuyby warâ âsegubydâdaymby xina nhekanâdily cestu imâsedo modo odaji. Doze cestu tummyke ani xina nhekanâdily.

<sup>21</sup>Toenzepa âwinduani modo, cinco mil uguondo modo lelâ, pekodo modo, iamimeom warâ tapâguezebamo.

**Jesus paru wâgâ adakobâdobyry***(Mc 6.45-52; Jo 6.15-21)*

<sup>22</sup>Ilâpyryem Jesus aguely xinaram:  
—Âxiedaunda pepi odaxi.  
Idâwâtaungâ Galiléia iwalu kuyam.  
Tarâ asaemoram âsedaengübybem ise  
oiosemo udâly —kely.

Aituo xina idâly. <sup>23</sup>Tonlo modoram  
tâsedaengubygueduo Jesus iwya onwa  
âkuly, mâkâ kulelâ Deus agâ adâke-  
hoem. Iguampygueduo, mâkâ kulelâ  
ani Jesus târâ awyly. <sup>24</sup>Ilâem pepi  
oday ani xina paru iotay. Toenzepa  
ani xina yan-yam adapezeinly; awy-  
lygue toenzepa paru adahugânily  
xina iwepiry onwa. <sup>25</sup>Emedylylâ, au-  
kuma igâtudyly ume ani, Jesus idâly  
xinaram paru wâgâlâ. <sup>26</sup>Jesus paru  
wâgâ adakobâdylly tientuo, toenzepa  
xina âseanedylly.

—Etaungâ! Kadopâ mâkâ! —tâke-  
wâduo, xina adaenkely tyanugue.

<sup>27</sup>Warâ olâ ani Jesus aguely xinaram:  
—Âzeon-hondâdaungâ! Tâseanezebe  
itaungâ! Jesuslâ urâ! —kely.

<sup>28</sup>Aituo Pedro aguely eyam:  
—Pymâ, âkealâ kuru âmâlâ matay,  
âyam paru wâgâ udâhoem aguekâ  
—kely.

<sup>29</sup>—Âekâ —kely Jesus.

Aituo Pedro pepi odayba idyly. Paru  
wâgâ SE SE warâ idâly Jesus XYDYK  
warâ atoram. Koendâ lelâ Pedro idâly.  
<sup>30</sup>Sapezenru eon-honru tiuntuduo  
olâ âseanedylly, xytyly adaguly. Aituo  
adaenkely:

—Pymâ, iemakegâ! —kely.

<sup>31</sup>Inepa kehoem Jesus tâmary IUK  
nhedyly Pedro adawâtoem, nytyba  
itoem. Jesus aguely eyam:

—Pedro, imâem yeinwâmpyralâ  
myanze âmâ! Inepa kehoem ima-  
keinhe wawyly mâinwâmpyra mitai!  
—kely.

<sup>32</sup>Aituo azakâlâ pepiram idâlymo,  
âxiedylymo, sapezenru epagudyly warâ.

<sup>33</sup>Aituo xina Jesus nehoguedyly:

—Âkealâ Deus imery lelâlâ âmâ!  
—xina kely.

**Jesus Genesaré donro  
tâwânuneim modo kua  
nhetobyry**

*(Mc 6.53-56)*

<sup>34</sup>Jesus agâlâ xina paru nhekuâdylly.  
Genesaréram xina saindyly. <sup>35</sup>Jesus  
saintybyem awyly tiuntuduomo tonlo  
modo aguely:

—Etaungâ. Awâkâ mawânkâ Jesus!  
—kelymo.

Âji iwaguepaom donro modoram  
aguelymo, tâwânuneim modo nhato-  
moem. Aituo toenzepa kehoem  
tâwânuneim modo adaholy Jesusram.

<sup>36</sup>Eyam nehakadylymo:

—Ity owogonro wao MÂ' ienehongâ  
asaemo tâwânuneim modoram, kua  
itomoem —kelymo.

Idânârâ tâty tywogonro MÂ' ieni-  
pyry modo ara kua tyese ani.

**Deus agueho ara kine, saguho  
modo agueho ara inkâba**

*(Mc 7.1-13)*

**15** <sup>1</sup>Aituo fariseu domodo  
ewy, Moisés inweniby wâgâ  
enomedâni modo ewy warâ idâlymo  
Jerusalémdâpa, Jesus agâ âtunâgueze.  
Aituo aguelymo:

<sup>2</sup>—Kydamudo ezewenrypyry ara  
inkâba âynynonro modo aidyly.  
Tâwinduatomoem nâzemaunguewâ-  
byramo, kâzewenry ara. Kâzewenry  
nhakadylymo. Koendâpa akaemo  
awârâ modo inmoly —kelymo.

<sup>3</sup>Aituo Jesus eyanmo aguely:

—Âmaemolâ Deus aguehobyry aie-  
tânry. Izewenrymolâ mâinwânkyllymo,  
Deus aguehobyry mâkeba. <sup>4</sup>“Unwânmo,





(Mateus 14.22-33)

âzemo warâ einwântaungâ. Ize atomo eyanmo âunduwâtaungâ” kewândy Deus. “Tunwym, tyze warâ âsenagaze-doem Deusram ekani xyâwâtaungâ” kewândy lâpylâmy warâ. <sup>5-6</sup>Âmaemo olâ aypa mâenomedâdylimo. “Unwânmo, âzemo warâ âdylâ nhekadylymo watay, ‘Tâlâ wato Deusram ise kâunduly. Awylygue âdy âyanmo kâundupa wawyly’ kewâtaungâ” myguelymo. Alâ kulâ mâenomedâdylimo, amidylimo warâ. Deus aguehobyry âwankuem mânhekylymo, amyguehomobyry lelâ mâinwântomoem. <sup>7</sup>Koendonro emyenro wâne âmaemo. Izewenrymo kulâ olâ amyguehomo. Âwâgâmo Deus aguehobyry iweniwânmy Isaiás:

<sup>8</sup> “Tytanrugue ywâgâ koendâ adâkezemo,

Tuodaxi niepyramo olâ.

<sup>9</sup> Ywâgâ koendâ adâkezemo wâne, tâzewenke kulâ olâ kurâdo nhenomedâdylimo, augueho araba”

kehobyry —kely Jesus.

**Deus izepa ato wâgâ Jesus  
aguehobyry  
(Mc 7.14-23)**

<sup>10</sup> Aituo Jesus kurâ domodo ingâ-sedondyly, eyanmo adâkehoem:

—Idataungâ, xutuwâdaungâ xirâ augueho. <sup>11</sup> Mâimpymo mâkeba Deus agueho mankadomoem aieni; mâimpymo tâgaseze mawânâ. Deus izepa ato amânhedyse mawylymo mawânâ Deus xurâem inakai; angahumo odaylâ mawânâ awârâ âtugudyly —kely Jesus.

<sup>12</sup> Aituo Jesus opaji xina saindyly. Xina aguely:

—Fariseu domodo tutuze iwâgâmo amyguely awyly, awylygue akaemo agâ iewiâky —xina kely.

<sup>13</sup> Jesus xinaram aguely:

—Nady inakai ojionkeoly, adameoly alelâ. Arâ lâpylâ ise idânârâ Pabai kay-nonro eynynâbaom modo adameoly eydâpa. <sup>14</sup> Tâseguâdâzeba itaungâ

fariseu domodo kywâgâ aguelygue. Epy wâne eagonro epy nhakobâdily myara akaemo. Deus aguehobyry koendâ nutuba tawylimo umelâ, kurâdo enomedâze kewâdilymo, Epy, epy alelâ adakobâdilymo watay, azakâlâ tyihuguezemo tâtagueim odaxi —kely.

<sup>15</sup>Aituo Pedro aguely eyam:

—“Mâimpymo mâkeba Deus agueho mankadomoem aieni; mâimpymo tâgaseze mawânâ. Deus izepa ato amânhedise mawylimo mawânâ Deus xurâem inakai; angahumo odaylâ mawânâ awârâ âtugudyly” myguely enra. Koendâ wao awârâ wâgâ aguekâ —kely.

<sup>16</sup>Aituo Jesus aguely:

—Iweâpa lelâlâ wâne yagâ mawylimo; inomedâdomo wato mâuntuba lelâ olâ âmaemo! <sup>17</sup>Âpynirymo mâkeba Deus izepa ato amânhetomoem aienhoim. Eimpy mawânâ kuwe odaxi idâly, ilâpyryem pylâ kokomiry odaxi-ro warâ. Awârâ modo odakâ sakadybyenma egasely lelâ-ro warâ.

<sup>18</sup>—Kyangahu oday mawânâ kydâpaunzedo, aguiendyse kydato, aguykeho warâ âtugudyly. Awyligye angahumo odayba âeni Deus izepa ato aienhonrim awyly. <sup>19</sup>Angahumo oday Deus izepa ato amânhedilymo wâgâ tunâgue âmaemo, kurâ mâyândyse midilymo; âkelo iwydy mâynanâdyze midilymo; eagâ mohogüin-homobyry keba kulâ mâynanâdyze midilymo; uguondo, uguondo agâ tâidyse awyly âewyly; pekodo, pekodo agâ tidyse awyly âewyly; imagadudyze midilymo; tâdâsenogudyly myguedyse midilymo; âkelo mâunâguedyse midilymo warâ. <sup>20</sup>Awârâ modo mawânâ Deus xurâem âwykanânehoinmo. Tâdâzemaunguebalâ tâdâwinduadylyma Deus xurâem inakai mâkeba-ro —kely Jesus.

### Jesus pekodo Fenícia donro exiry odaypa kadopâ nhânkyhobyry

(Mc 7.24-30)

<sup>21</sup>Jesus agâ xina târâpa idâly, xidadâ Tiro, Sidom warâ iwaguepaonram. <sup>22</sup>Târâ xina awyly ume pekodo Jesusram saindyly. Judeu keba mâkâ pekodo, idamudo cananéu awylygue. Aituo adaenkely:

—Ytyendâlâ ikâ. Âdamu Davi ara pymâ ton-honreim âmâ! Iexiry kadopâgue taseim; kua iekârâ wao. Toenzepa mâkâ âsenagazedily —kely.

<sup>23</sup>Jesus olâ âdakepa. Aituo Jesus opaji xina idâly. Eyam xina aguely:

—Igonokâ awâkâ pekodo. Kyampyguedily kulâ awâkâ. Kâkuâdâdily kulâ awâkâ saenlu —xina kely.

<sup>24</sup>Jesus xinaram aguely:

—Kypemugudo judeu domodo eniem keankâ kâjigonoholy; kaneru xuzatyby wâne myara awylymogye —kely.

<sup>25</sup>Aguely tindatuo mâkâ pekodo iwaguepa kehoem Jesusram saindyly. Âzeguhoam idily. Enado âzeguhoam itybyem aguely:

—Pymâ, iexiry odayba kadopâ nhânkygâ —kely.

<sup>26</sup>Aituo Jesus aguely:

—Koendâ inkâba iamudo ipyniry emakely, kaxorodoam xuduhoem —kely.

{Awârâ adâkehogye, koendâ inkâba judeu keba modoram, judeu domodo xurâ xuduly. “Judeu domodo kua kânhetu iwerâ. Judeu keba modo kua kânhedily-ro watay, iamimeom pãogyê kâenmakely, kaxorodoam kâunduhoen-ro waunlo ara ise” keze aguely.}

<sup>27</sup>Âdakeze aguely awyly xutuwâm olâmy mâkâ pekodo. Aituo aguely:

—Arâlâ, Pymâ. Sodo modo mesa iaxi pyni in-hugueânehoymy tâinze olâ kaxoro imeomyry —kely.

<sup>28</sup>Jesus aguely:

—Yeinwântâ mawlylygue olâ ise ixiry kua kânhedily. Mâkâ odaypa kadopâ kânhânkyly, mâenkadobyry ara —kely.

Aguely umelâ kehoem myani mâkâ pekodo exiry koendâ idily, kadopâ tuodaypa egaseduo.

**Jesus toenzepa tâwânuneim  
modo kua nhetobyry**

<sup>29</sup>Tonlopyryem Jesus agâ xina idâly, paru Galileiaram. Aituo Jesus iwy angataji âkuly. Târâ ekadyly.

<sup>30</sup>Toenzepa kehoem kurâdo eyam idâly. Nhakylimo ezeumpadyby modo, tywyke iazepy modo, epy modo, tytarenry modo, âkelogue tâwânuneim modo lâpylâ warâ. Enadoram nhakylimo. Idânârâ kehoem kua nhetaynly.

<sup>31</sup>Tytarenrybyry modo koendâ kehoem âjítainlymo. Tywyke iazepy koendâ idilymo. Adakobâdânrybyry modo koendâ adakobâdilymo idily. Epybyry modo koendâ nhedylymo warâ. Awârâ tientuo tonlo modo toenzepa kehoem âsewânilymo. Aituo israelita domodo iDeusry nhehoguedilymo:

—Koendonro, ton-honreim warâ âmâ, Deus —kelymo.

**Jesus quatro mil kurâdo sete pão,  
aguipa kanra âjihuyby warâgue  
nhuantobyry  
(Mc 8.1-10)**

<sup>32</sup>Jesus xina ingâsedily. Aguely xinaram:

—Ytynroem enra asaemo kurâdo. Kopaelâgâbygueduolâ asaemo yagâ awyly. Tappa âetybybe asaemo duay. Âdy nheinlymo peba-ro warâ. Ipyniry kâundupa kulâ kâingonodysebamo urâ, tâtyram todopâdaymo ânwa oze ihuguezemo mawânkâ tokozelymogue —kely.

<sup>33</sup>Aituo xina aguely Jesusram:

—Kuantomoem nudupa lâpylâ olâ, iwague xidadâdâ kydawlylygue. Asaemo xuato âdykâ imâem pyni kiempyra ise kurâ —xina kely.

<sup>34</sup>—Âdara pãobeka âmaemo? —kely.

—Sete lelâ, PU warâ kanra âjihuyby warâ —xina kely.

<sup>35</sup>Aituo kurâdoram aguely:

—Ikadaungâ —kely.

<sup>36</sup>Mârâ sete pão, kanra âjihuwâdyby warâ nhanâdily. Tianâpygueduo Deus agâ aguely:

—Koendonro lelâlâ âmâ, Pabai. Awylygue xirâ pão, merâ kanra âjihuyby warâ mâunduly —kely.

Deus agâ agueypyem nhepajiwâdily. Xinaram nhuduly, kurâdoram xina nhepâdoem. Xina nhepâdily umelâ kehoem Jesus pão, kanra âjihuyby warâ agui nhenehonly. <sup>37</sup>Idânârâ âwinduadilymo ize tato ara kehoem; koendâ kehoem ioladylymo warâ. Ilâpyryem xina cestu imâsedo modo odaxi âsegubydâdyby modo nhekanâdily. Sete cestu tummyke lelâ xina nhekanâdily.

<sup>38</sup>Toenzepa âwinduani modo, quatro mil uguondo modo lelâ, pekodo modo, iamimeom warâ tapâguezeba.

<sup>39</sup>Ilâpyryem Jesus aguely kurâdoram:

—Tâwâlâ itymoram idâwâtaungâ —kely.

Agueypyem xina agâ pepi odaji âxieze idâly. Magadâ keho yan-yam ani xina idâly.

**Jesus adyesenry anhetoem  
aguehomobyry**

(Mc 8.11-13; Lc 12.54-56)

**16** <sup>1</sup>Iweâpa ipygueduo fariseu domodo ewy, saduceu domodo ewy warâ idâlymo Jesusram. Tienwentâdomoem wâne inakanhe kulâ aguedyse awylymo. Aituo eyam aguelymo:

—Deus lelâ anhekyly aiekâ, mâkâlâ ogononi, on-honru xuduim warâ awyly xina nhutuoem —kelymo.

<sup>2</sup>Aituo Jesus eyanmo aguely:

—Iguandyly ume, kau sabiladyly watay, “Koendâ isenra kopaelâgâ emedyly, kopâ peba” tâkeze âmaemo. Adâise inanry amyguehomobry ara kehoem. <sup>3</sup>Emetybyem, tyame, eunu tâmyguyne warâ watay, “Kopâ ihugueze iwerâ” myguelymo. Amyguehomobry ara adâise lelâlâ. Tutuze âmaemo, kau mâendylymo watay, kopâ ihugueze, nihugueba warâ awyly. Agânhekyly modo Deus eon-honruguelâ agânhedyly awyly mâuntuba lelâ olâ âmaemo. <sup>4</sup>Ânguydoem kulâ âmaemo xirâ umeno modo iwerâ! Deus einwandyly mâinmolymo, pekodo tuso inmoho ara. “Adyesenry aiekâ, Deus ingonotyby mawyly xina nhutuoem” mygueakimo yam. Deus unâry egatuimbyry Jonas aitobry enanâ-guewâdaungâ. Jonas kanra imâsedo tuompygueduo egasehobry ara, igueypyem kurâem witondyly watay, xutuze âmaemo Deus Ingonotyby lelâlâ wawyly —kely.

Agueypyem Jesus akaemo nhodokely, idâly.

**“Fariseu domodo, saduceu domodo warâ ifermenturygue tâmaynelâne itaungâ” Jesus kehobry**  
(Mc 8.14-21)

<sup>5</sup>Paru tienkuâday pão sadyly xina enanânehonwâm. <sup>6</sup>Aituo Jesus xinaram aguely:

—Idaungâ. Tâmaynelâne itaungâ fariseu domodo, saduceu domodo warâ ifermenturygue —kely.

<sup>7</sup>Âdakeze Jesus arâ aguely awyly xina nutuba olâ. Aituo âjigie xina aguely:

—Âdaituoka awâkâ arâ aguely? Pão kienepyra kydatobry wâgâ? —xina kely.

<sup>8</sup>Jesus olâ xina aguely idamâ. Aituo xinaram aguely:

—Âdaugewâpyra urâ, pão mâenanânehon-homobry wâgâ. Pão wâgâ inkâba auguely. Mâinwâmpyra olâ âmaemo, idânârâ ize matomo ara tuduze wawyly. Âdiempa kulâ mawânârâ yeinwândylymo —kely.

<sup>9</sup>—Âdaituoka ton-honreim wawyly mâinwâmpyra mawylymo! Saguhom cinco mil uguondo modo xudâ cinco pãogue. Idânârâ âwinduatyby modo nioladâmo. Toenzepa cestu modo mumytâdâmo âsegubydâdybygue warâ. Tânanâguezêlâ keanra âmaemo. <sup>10</sup>Iwerâ quatro mil uguondo modo xuatai lâpylâ sete pãogue. Idânârâ âwinduatyby modo niolataimo. Toenzepa cestu modo mumytâdaimo âsegubydâdybygue. Tânanâguezêlâ keanra âmaemo lâpylâ. <sup>11</sup>Pão wâgâpa aguely awyly mâuntuba gâlâ olâ keanra âmaemo, “Tâmaynelâne itaungâ fariseu domodo, saduceu domodo warâ ifermenturygue” ugue-duo —kely.

<sup>12</sup>Tahuleba kehoem xina fermentu pão ioliho keba agueho awyly xina nhutuly. Fariseu domodo, saduceu domodo warâ nhenomedâdo wâgâ olâ myani Jesus aguely.

**Pedro, “Messias âmâ” Jesusram kehobry**  
(Mc 8.27-30; Lc 9.18-21)

<sup>13</sup>Ilâpygueduo Jesus idâly xina agâ âtâ anary modo Cesaréia de Filipe iwaguepa. Aituo xinaram aguely:

—Ânguy tâkezeka inanry kurâdo yam, urâ Uguondo Kaynâpa Âetybyam? —kely.

<sup>14</sup>Aituo xina in-hoguly:

—Tâlâ inanry, “João Batista kurâem itondyby awâkâ Jesus” kewâni modo.

Tâlâ inanry, “Elias kurâem itondyby awâkâ” keim modo warâ. Tâlâ lâpylâ inanry, “Deus eynynâ aguenripyry Jeremias kurâem itondyby awâkâ” keim modo. Tâlâ lâpylâ inanry, “Deus eynynâ aguwâtyby modo ewy kurâem itondyby awâkâ” keim modo warâ —xina kely.

<sup>15</sup>Aituo xinaram aguely:

—Âmaemo-ro? Ânguy tâkeze âmaemo yam? —kely.

<sup>16</sup>Aituo Simão Pedro in-hoguly:

—Messiaslâ âmâ, Deus iguedânry imery —kely. (“Deus Kâmakeze Ingonotyby” keze “Messias” kely.)

<sup>17</sup>Jesus eyam aguely:

—Mâkâlâ urâ. Tuomareim kuru âmâ, Simão, João imery. Ânguy awârâ mâuntuhoem inomedâdaymba. Pabai kaynonrolâ âyam xutuen-hoim.

<sup>18</sup>Âmâ Pedrogue tâzekeim. “Tuhu imâsedo” keze xirâ âze aguely. Amyguehobry ara Deus Ingonotybylâ wawyly einwânni watay, ynynonrolâ. Âtâ tuhu wâgâ itâdyby wâne alâ kulâ nihugueba myara ise ynynonro modo âda tyeseba awyly. Tâwâlâ wâne iguelymo, idâzemo olâ yam, yagâ aunloenlâ itomoem. Xirâ mâuntudyze wato kuru. <sup>19</sup>Ynynonro modo mâentoem aiese urâ, pymâ âtâ ijawerygue tâmaseim wâne, âtâ tânahungueze, tânahunze warâ myara ise âmâ. Tarâ onro anaym aiedyseba matobe watay, Deus anie-nehonwâbyra ise. Tarâ onro anaym aiedyse matobe watay, Deus aie-nehonze warâ —kely Pedroram.

<sup>20</sup>Aituo Jesus aguely idânârâ xinaram:

—Mâkâlâ urâ, Deus Ingonotyby. Iwerâ kuru wao olâ Messiaslâ wawyly kâzegatuwâdaundâ —kely.

**Jesus tyiguely wâgâ, kurâem  
tâitondyly wâgâ warâ  
aguehobry**

(Mc 8.31–9.1; Lc 9.22-27)

<sup>21</sup>Ilâenlâ Jesus nhegatyly xinaram âda tyedyly awyly.

—Jerusalémram idâze urâ. Kywymâry modo toenzepa târâ ienagazenehonzemo. Kurâdo eynynâ Deus agâ aguwâni modo iwymârydo, Moisés inweniby wâgâ enomedâni modo warâ ienagazenehonzemo. Akaemo ise yiguehoem aienehonrim. Yigueduo, azagâ emedyly<sup>s</sup> idyly wâgâ olâ ise kurâem witondyly —kely.

<sup>22</sup>Pedro olâ neinwâmpyra arâ Deus Ingonotyby âdyoly awyly. Awylygue nhejikely, eagâ adâkehoem:

—Pymâ, arâ adâkezeba ikâ. Âtyenze Deus. Inagazenehonwâbyra ise warâ —kely.

<sup>23</sup>Aituo Jesus MYK idyly xinaram. Pedro aguehobry nehoguebyra tawylygue aguely eyam:

—Satanás arâ amyguehoem aieni, Pedro. Satanás aguely kâindataymba ise urâ. Ânwa ozeno tuhu wâne kuhodaigâdyly myara Deus ize ato agânhedyseba mawyly. Deus xunâry ara inkâba âunâgu, uguondo modo xunâry ara kulâ —kely Pedroram.

<sup>24</sup>Aituo Jesus aguely xinaram:

—Ynynonroem ize mataymo, augueho ara aitaungâ. Kopaelgâembaba ise wato aietaungâ; amânhedyse matomo mâkeba aietaungâ. Kurâ tyâzeim kruz nhadyly tyâhoram myara, ynynonro modo on-hondybyem nidâ igueze. <sup>25</sup>“Jesus eynynonro keba urâ” myguelymo, tyâzepa mitomoem kulâ watay, âdiempa kulâ ise xirâ anaym kurâem mawylymo. Âigueduomo Deus

<sup>s</sup> 16.21 Nota de pé Mateus 12.40dâ egâ.

enadoram mydâwâpyra ise âmaemo. Yeinwândylymogue mâdyolymo watay olâ, Deus enadoram idâze âmaemo; aunloenlâ ise eagâ mawlylmo. <sup>26</sup>Tâwâlâ wâne âdydo imeom sodoem mawlylmo, ize matomobe mawlylmo warâ, Deus eydâ atoram mydâhomoem nepywabyra olâ awârâ modo. Deus agonro keba âmaemo watay, âdype matomo âdy mâkeba. Ânguy niguepa tâitoem nepywadaymba. Tâdâsenagazedo amaxi ise mydâlmo.

<sup>27</sup>—Uguondo Kaynâpa Âetyby urâ. Idâze urâ Deus eydâ atoram; odpâze olâ urâ Deus dompyryem anju domodo agâ. Kodopâdyly ise Kunwym eon-honro tânehonze. Pymâ tynrenseinhe lelâlâ ise urâ. Yeinwânni modo yagâlâ ienehonze urâ. Yeinwântânrybyry modo tâdâsenagazedoram igonose urâ. <sup>28</sup>Iwerâ ydataynrin modo ewy esemo Deus eon-honrugue pymâem widyly adaguly. Xirâ mâuntudyzemo kuru wato —kely Jesus.

### Iwy wâgâ Jesus âkeloem itobyry

(Mc 9.2-13; Lc 9.28-36)

**17** <sup>1</sup>Seis iguandyly ipygueduo ani Jesus iwy onwa âkuly. Pedro, Tiago, Tiago iukono João warâ tagâ nhaklyly. <sup>2</sup>Târâ Jesus âkeloem idyly nhedylymo myani. Xixi ara kehoem emydy ehazeladyly; esagoymyby ara kehoem ety iwogonro sapekadyly warâ nhedylymo. <sup>3</sup>Moisés, Elias warâ nhedylymo lâpylâ, Jesus agâ xunâgumo ume. <sup>4</sup>Aituo Pedro aguely Jesusram:

—Koendâ kehoem tarâ kydawyly, Pymâ. Ize matay, azagâ tokalâ warâ âtâ imeimbyry aiese urâ, âmâem, Moisés-em, Elias-em warâ —kely.

<sup>5</sup>Pedro aguely umelâ eunu tohozeleim xytâguyly nhonwamo. Eunu duay Deus aguely indadylymo:

—Ymery toenzepa kâinwynegyly merâ, toenzepa womazeâni. Aguely idataungâ —kely.

<sup>6</sup>Pedro, Tiago, João warâ tâjitanru tindatuo, tâseanezemo myani. Awylygue âzeguhoam idylymo onwâgâ.

<sup>7</sup>Aituo Jesus eyanmo idâly. MÂ' nhedylymo. Eyanmo aguely:

—Autaungâ. Tyanepa itaungâ! —kely.

<sup>8</sup>Adâkehonduo iwykaudylymo enuaguynrumo. Jesus kulelâ olâ nhekylymo; Moisés, Elias warâ netombyramo.

<sup>9</sup>Aituo xytâguylymo iwy wâgâpa. Tytâguylymo ume Jesus aguely Pedro, Tiago, João warâam:

—Mâentybymone iweâkuru ânguyram kâzegatuwâdaundâ. Yiguely, kurâem witondyly wituo maise tâwâlâ mângatulymo —kely.

<sup>10</sup>Aituo aguelymo:

—Moisés inweniby wâgâ enomedâni modo adâkeze: “Elias âese, Messias Deus Ingonotyby iraynâ” tâkezemo. Âdaituoka arâ aguelymo? —kelymo.

<sup>11</sup>Aituo Jesus in-hoguly:

—Âkealâ aguelymo; Eliaslâ mawânkâ Messias saindyly wâgâ agueim. <sup>12</sup>Warâ olâ âyanmo auguely: “Elias ara ini nâedâ” uguely. Deus eynynâbaom modo olâ ize tato ara kehoem nenagazedâ. Myara lâpylâ ise ienagazenehonlymo, urâ Uguondo Kaynâpa Âetyby —kely.

<sup>13</sup>Aguely tindatuomo Pedro, Tiago, João warâ tutuzemo lelâ João Batista wâgâ aguely awyly.

### Jesus salokuzenomo odano

kadopâ nhânkylhobyry

(Mc 9.14-29; Lc 9.37-43)

<sup>14</sup>Jesus, Pedro, Tiago, João warâ agâ iwy wâgâpa xytâguybygueduomo, toenzepa kurâdo târâ âtâdyguybyem awyly. Uguondo kurâ domodo duay

Jesus iopaji saindyly, enado âzeguhoam idyly, eyam aguely:

<sup>15</sup>—Pymâ, ymery wao ityengâ! Kua iekâ! Tokomaze inanry merâ; toenzepa inanry âsenagazedily. Tokomaduo, peto onwanji tyihugueze inanry, paikaji atay warâ. <sup>16</sup>Âynynonro modoram sekadai wâne, kua nheto-moem. Kua niepyramo olâ enra —kely.

<sup>17</sup>Aituo Jesus aguely:

—Âdy einwânî kebalâ myanze âmaemo! Ânguydo kulâ âmaemo! Agâmolâ wâne urâ, yeinwâmpyra olâ âmaemo. Ynadaize yeinwâmpyra lelâ mawlymogue. Enetaungâ awâkâ salokuzenomo xarâ —kely.

<sup>18</sup>Jesusram nhadylymo. Tyam nhatuomo ton-honre kehoem Jesus mâkâ salokuzenomo iodano kadopâram aguely:

—Igasegâ iweâ lelâlâ merâ salokuzenomo odaypa, kadopâ! Todopâzeba ikâ-ro warâ! —kely Jesus.

Agueduo kadopâ egasely. Salokuzenomo kua idyly.

<sup>19</sup>Mârâ aipygueduo xina Jesus iopaji saindyly. Mâkâ kulelâ awyly ume xina nhapâiguely:

—Ton-honre lâwâne enra xina aidyly, kadopâ tiânkyhoem. Âda xina niepyra olâ enra. Âdaituo kukeanra? —xina kely.

<sup>20</sup>Aituo Jesus in-hoguly:

—Deus koendâ mâinwâmpyra mawlymogue enra mâkâ kadopâ mâingonopyra mawlymo. Mostarda ewy imeimbyry aralâ âdiempalâ yeinwântâ âmaemo watay, adyesenry adyese lelâ tâise âmaemo. Xirâ mâuntudyzemo kuru wato. Yeinwântâ lelâlâ âmaemo-ro watay, xirâ iwyrâm “Âxiguegâ; tarâpa ikâ” myguelymo-ro watay, tâxigueze tâise. Adyesenry

amânhetomoem ton-honre lelâ tâise âmaemo. <sup>21</sup>[Ton-honreim lelâlâ mâkâ kadopâ salokuzenomo iodanopyry. Deus eon-honru kienkadoem, kydâ-winduapyra kidyly wao warâ lelâ mâkâ igonodyly]<sup>h</sup> —kely Jesus.

**Jesus tyiguely wâgâ agueontobyry**

(Mc 9.30-32; Lc 9.43-45)

<sup>22</sup>Galiléia eynynâ xina adakobâday Jesus xinaram agueondily tyiguely wâgâ:

—Urâ Uguondo Kaynâpa Âetyby yizepaom modo emaxi âzega-moze urâ. <sup>23</sup>Akaemo ise yâen-honri. Yigueduo, azagâ emedyly<sup>i</sup> idyly wâgâ olâ ise kurâem witondily —kely.

Jesus tyiguely wâgâ aguely tindatuo, toenzepa kehoem ani xina itynwandily.

**Deus ety impostury epywado**

<sup>24</sup>Cafarnaumram xina saim-pygueduo aunlo keba uguondo modo âewyly xina eydâ atoram. Deus ety impostury epywado emakeim myani akaemo. Pedroram idâlymo sapâigueze:

—Âwymâry Deus ety impostury epywaze? —kelymo.

<sup>25</sup>Aituo Pedro in-hoguly:

—Epywaze mâkâ —kely.

Ilâpygueduo Pedro egawândily Jesus eydâ atoram. Deus ety Impostury epywado wâgâ Pedro aguely iraynâ, Jesus Pedroram aguely:

—Ânguyka tâise pymâdoram impostu epywani? Xirâ anano modolâ? Âkelo anano modo? Âdara mâuntuly, Simão? —kely.

<sup>26</sup>Aituo Pedro in-hoguly:

—Âkelo anano modo tâise epywani —kely.

<sup>h</sup> 17.21 Idânârâ livru saguho modo wâgâ iwenibyemba xirâ. <sup>i</sup> 17.23 Nota de pé Mateus 12.40dâ egâ.

Aituo Jesus aguely:

—Iozelâ amyguely —kely. —Pymâ ety anano modo tâise nepywabyra. Alâpylâ urâ Deus ety impostury epywani keba wawyly tâise, Deus eydâpa âetyby wawylygue. <sup>27</sup>Alâ olâ ise kâempywadyly, Deus ety impostury epywado emakewâni modo newiâpabyra itomoem. Paruam idâ. Atâry samegâ. Saguho mawepyy ikaguegâ. Mâkâ kanra itay moedape ise. Mârâ moeda ise Deus ety impostury epywado emakeim modoram mâunduly. Xuduze lelâ mârâ, urâ, âmâ warâ impostu kiempywadoem —kely.

**Ânguyka tynrenseim kuru?**

(Mc 9.33-37; Lc 9.46-48)

**18** <sup>1</sup>Ilâpygueduo kehoem xina Jesus iopaji idâly, sapâigueze:

—Ânguyka xina enday tynrenseim kuru Deus kaynonro pymâem atodâ? —xina kely.

<sup>2</sup>Aituo Jesus iamudo tonlo ingâsedily tyam. Iamudo saintuo, Jesus xina ontaji iamudo nhedyly. <sup>3</sup>Aituo aguely:

—Merâ iamudo ara itaungâ. Âwâlâ kulâ mâzehoguedilymo tâiseba itaungâ. Iamudo arâpa âmaemo-ro watay, mydâpa ise âmaemo Deus pymâem atoram. Xirâ mâuntudyzemo kuru wato. <sup>4</sup>Merâ iamudo ara mâdutuduomoma toenzepa ise âynrumo Deus nhekyly modo duay. <sup>5</sup>Pymâem xynru waunlo keba merâ iamudo. Mâkâ nynnonro xurâem koendâ amânhedilymo, tynrenseim keba awyly umelâ warâ watay, urâenlâ amânhedilymo. Mâkâ nynnonro xurâem koendâ amidilymo, tynrenseim keba awyly umelâ warâ watay, urâenlâ amidilymo —kely Jesus.

**Deus einwânnipyryem  
neinwâmpyra ienehoim toenzepa  
ise âsenagazedily**

(Mc 9.42-48; Lc 17.1-2)

<sup>6</sup>Jesus aguely:

—Merâ iamudo yeinwânto ara yeinwânni yeinwâmpyra ienehoim koendâ tâise tuhu imâsedo iwymy wâgâ ekâjily, parutabâ ikaji samely, iguehoem, yeinwâmpyra nhenehonly iraynâlâ. <sup>7</sup>Kurâ domodo Deus izepa ato aiedily imodânry modo mawânkâ toenzepa âsenagazezemo. Yeinwâmpyra itomoem aienehoim olâ ise toenzepa kuru âsenagazeni.

<sup>8</sup>—Imarymogue Deus izepa ato akâiedaundâ; mydâdysebamo atoram tâtâzeba itaungâ warâ. Koendâ tâise imarymo atay, âhurumo atay warâ satâly, samely warâ, Deus izepa ato amânhepyra mitomoem. Koendonro kuru tâmaguebalâ, tuhuguebalâ warâ Deus agâ aunloenlâ mawylymo; idâ-nârâ kodo peto nhântânry onwanji adameoly mawânâ koendâpaom kuru. <sup>9</sup>Deus mâendysebamo ato kâze-taundâ. Koendâ tâise inumo etyly, samely warâ, Deus mâendysebamo ato mâempyra mitomoem. Koendonro kuru tânuembalâ Deus agâ aunloenlâ mawylymo; idânârâ kodo peto nhântânry onwanji adameoly mawânâ koendâpaom kuru —kely Jesus.

**Jesus enomedâzemo, kaneru  
xuzatyby wâgâ aguehobyry**

(Lc 15.3-7)

<sup>10</sup>Jesus aguely:

—Imâemba yeinwânni izepa tâiseba itaungâ. Deus anju domodo tugonose akaemo eniem. <sup>11</sup>[Kaneru eni wâne tâguy xuzatyby xuize tâtâze, myara lâpylâ nynâbaom modo kâwinly, inakanhe awylymo kânygakehoem,



kâenmakehomoem warâ.]<sup>12</sup> Cem kaneru ewy tokalâ xuzatuo, âdai-dylyka sodo, inanjimo? Noventa e nove tyânze âwinduatodâlâ, mâkâ xuzatyby xuize tâtâhoem. <sup>13</sup>Nhuinly, nhedyly. Tientuo, toenzepa kehoem iomazely, noventa e nove âwinduani tionmaendyly takaze kehoem iomaru. Xirâ mâuntudyzemo kuru wato. <sup>14</sup>Kaneru sodo tokalâ tâguy xuzadyseba awyly ara lâpylâ Kunwym Deus kaynonro tokalâ kurâ ewy Satanás ejidyram idâdyseba awyly; tâwâlâ lelâlâ wâne tynrenseim keba awyly —kely Jesus.

**Kurâem inakanhe ityby  
agâ kydatunâguene**

<sup>15</sup>Jesus xinaram aguely:

—Ynyonro ewy inakanhe idyly agâmo-ro watay, idâwâtaungâ eagâ agueze. Inakanhe itobyry wâgâ aguewâtaungâ; âmâ, mâkâ warâ âtunâguedaungâ. Amyguelymo koendâ tindatuo, “Aetobyry enanânehongâ” kely âyanmo watay, aitobyry enanânehonwâdaungâ. Eataen-hoem itondaungâ. <sup>16</sup>Amyguelymo tindadyseba watay olâ tokalâ atay, azagâ atay warâ agâmo antaungâ, eagâ amygueontomoem. Wakely iwenibybe mawânâ Deus itaumbry awo wâgâ: “Ânguy tânagazezeba ise, azagâ, azagâ tokalâ warâ ewentâni peba watay” kely iwenibybe. <sup>17</sup>Akaemo aguely tindadyseba watay olâ idânârâ yeinwânni modoram anhetyby modo wâgâ aguewâtaungâ, mâkâ agâ aguehomoem. Turudyly tindadyseba watay olâ, Deus einwântânry modo ewyenlâ mâkâ nidâ; impostu epywado emakewâni modo aralâ etaungâ warâ —kely.

**“Pabai agâ amyguedaymo,  
agâmolâ urâ” Jesus kehobyry**

<sup>18</sup>Jesus aguely:

—Tarâ onro anaym aiedyseba matomobyrybe watay, Deus aiedyseba lâpylâ ise târâ kaynâ; tarâ onro anaym aiedyseba matomobyrybe watay, Deus aiedyseba lâpylâ târâ kaynâ. Xirâ mâuntudyzemo kuru wato.

<sup>19</sup>—Tarâ onro anaym âmaemo azagâ mâseinwândylymo, tokalelâ mâenkadomoem watay, Pabai kaynonro xuduze lelâ mâenkadybymo. <sup>20</sup>Yagâ agueze âtâdygywâni modo eagâlâ urâ, tâwâlâ wâne azagâ, azagâ tokalâ warâ kulâ awyly. Xirâ mâuntudyzemo kuru wato lâpylâ —kely Jesus.

**Jesus, tataen-ho inakanhe  
itobyry nenanânehombanro  
wâgâ aguehobyry**

<sup>21</sup>Pedro Jesusram iwaguepa idâly, nhapâiguely:

—Ângyulâ inakanhe kulâ ynyâ aisezedyly watay, âdaraka ise awidyly aitobyry kâenanânehohoem, Pymâ? Sete lelâ inakanhe ynyâ aisezebygueduo tâwâlâ kâpeandyly? —kely.

<sup>22</sup>Aituo Jesus in-hoguly:

—Sete lelâ âdalâ mâiehoduo tâpeânzeba ikâ. Aedyly agâ, aedyly agâ warâ enanânehongâ aetobyry. Mapâguely eki kehoem awyly umelâ, enanânehongâ; tâpeânzeba ikâ. <sup>23</sup>Deusgue tywymâguneim modo inakanhe tuduery tyetobyry modo tânanânehonze. Unâ segatuji wao:

—Tâlâ myani pymâ tagâ tâwanuneim modo igondary wâgâ adâkedyzedonro. <sup>24</sup>Aituo akaemo tokalâ, tokalâ warâ ingâsedyly. Saguho ingâseguyly myani imâem kuru tugondagueim. Milhão

<sup>12</sup>18.11 Idânârâ livru saguho modo wâgâ iwenibyemba xirâ.

kehoem myani igondary. <sup>25</sup> Âdara nhepywadoem nudupa lelâlâ myani, âdy peba tawylygue. Aituo myani iwymâry aguely: “Vende âedylymo isenra, âmâ, âwydy, âmeombyry alelâ” kely. “Tydinherugueinram ise vende âedyly. Idânârâ âsejiguy modo vende iese urâ warâ. Mâkâ eagâ iwano iwelo ise idânârâ dinheru mâenmakely yam xudunri, ogondary mâempywadyly ara” kely mâkâ toenzepa tugondagueinram. <sup>26</sup> Agueduo, mâkâ tâwaneim toenzepa kehoem adahulily. Aituo âzeguhoam idyly iwymâry enado. Eyam aguely: “Ytyendâlâ wao ikâ. Arâ kehoem ayedâ. Âdiempa wao iwânwânkâ. Epywaze lelâ urâ agâ ugondago” kely.

<sup>27</sup>—Tutuze olâ iwymâry, mâkâ tagâ tâwaneim âdy peba awyly. Aituo aguely: “Yagâ ogondago enanânehonze urâ. Yagâ tugondagueiba ise âmâ. Idâ lelâ” kely. <sup>28</sup> Aituo tâwaneim idâly. Târâpa âxigueybyem myani tataen-ho tagâ tugondagueim agâ oxiodyly. Âdiempa kulâ olâ myani mâkâ eagâ igondagu, cem moeda pratagueto lelâ. Aituo myani tataen-ho iwymy wâgâ nhawâdyly. Tingoukuly ume eyam aguely: “Iweâ lelâlâ kehoem iepywagâ” kely.

<sup>29</sup>—Aituo myani eataen-ho âzeguhoam itybyem aguely: “Ytyendâlâ ikâ. Iwânwânkâ wao. Idânârâ kehoem agâ ugondago epywaze lelâ urâ” kely.

<sup>30</sup>—En-hem kepa olâ myani. Tataen-ho nhadyly lelâ etadânehonze kadeia odaxi. “Tarâlâ ise âmâ, idânârâ yagâ ogondago mâempywadoem” kely. <sup>31</sup> Tataen-ho nityembyra kehoem aidyly tâense myani akaemo eagonro modo. Tientuo, mâkâ tataen-ho aienibry izepa tâisemo myani. Aituo myani nhegatuly mo tywymâryam. <sup>32</sup> Aituo iwymâry mo mâkâ aityby ingâsenehonly. Aguely

eyam: “Koendonro keba myaze âmâ! Âtyendylygue yagâ imâem ogondago idânârâ kehoem senanânehoangui, mâenkadobryr wâgâ. <sup>33</sup> Ataen-ho mityendyze, âtyendobryr ara” kely.

<sup>34</sup>—Tyewiâpaduo myani pymâ tyzodadury modoram aguely: “Merâ tumunreim kadeia odaxi sataungâ. Târâlâ yagâ tugondago nepywadâ” kely. Warâ myani mâkâ tataen-ho tagâ igondago tienanânehondyzebaom aieholy —kely Jesus.

<sup>35</sup> Xina agâ tunâry tympygueân-doem kuru Jesus aguely:

—Arâ lâpylâ ise Pabai kaynonro aedylymo, inakanhe amâieho homobryr mâenanânehomba âmaemo-ro watay —kely Jesus xinaram.

### Jesus tâjiwydy imoly wâgâ aguehobryr

(Mt 5.31-32; Mc 10.1-12; Lc 16.18)

**19** <sup>1</sup> Agueypyem Jesus xina agâ idâly Galileiadâpa. Judéia yan-yam xina odopâdyly ânwa oze, paru Jordão kuynâ, xixi egaseho eynynâ. <sup>2</sup> Toenzepa kurâdo xina agâ awyly. Iduanomo tâwânuneim modo kua tyese ani Jesus.

<sup>3</sup> Fariseu domodo ewy eagâ agueze idâlymo. Tienwentâdoem wâne inakanhe kulâ aguedyse awylymo. Aituo Jesus nhapâiguelymo:

—Kâzewenry eynynâ, tâwâlâka uguondo tywydy inmoly âdy wâgâlâ? —kelymo.

<sup>4</sup> Aituo Jesus in-hoguly:

—Deus itaumbryr iweniby tutuzelâ âmaemo. “Kaudyly umelâ myakâwândy Deus uguondo, pekodo warâ nhygadyly, ohogüinrin-em” warâ iwenibyem awyly Deus itaumbryr awo wâgâ. <sup>5</sup> Warâ lâpylâ myakâwândy Deus aguely: “Awylygue mawânkâ uguondo, tunwym agâpa, tyze agâpa warâ idyly, tywydy

agâ lelä tâitoem. Awylygue azagâpa awylymo, tokalelä” kewândymy Deus. <sup>6</sup>Awylygue mawânkâ ohogüimby modo tywydy agâ tokalelä awylymo, Deuslä âzeyam ienimo awylygue. Awylygue ânguy ohogüimby modo âximohoem aniempyra nidâ —kely Jesus.

<sup>7</sup>Fariseu domodo Jesusram ageondylymo:

—Tutuzelâ âmâ Moisés inweniby: “Âwydy mâinmodyze âmaemo watay, tâwâlâ imowâdaungâ” kely. “Iweniwâdaungâ olâ âdaituo mâinmolymo awyly. Aitybyem eyam pape mâinwenibymo eyam xuduwâtaungâ. Igonotaungâ lelä-ro warâ” kely myakâwândy inwenily. Arâ-ro watay, âdaituo pylâka koendâpa tâjiwydy imoly awyly? —kelymo.

<sup>8</sup>Jesus in-hoguly:

—Tutuze myakâwândy Moisés, tienkyly modo ânguydo kulâ, Deus ize ato adiendysedo keba awylymo. Awylygue myakâwândy Moisés “Tâwâlâ tâjiwydy imoly” kely inwenily, pekodo tâwentâzeba itoem. Kaudyly umelâ olâ myakâwândy Deus ohogüinwâdyby modo âximoly izepa awyly. <sup>9</sup>Agâmo ohogüimbyem tawyly umelâ, eagonro uguondoram âdynamâoly watay lelä imowâdaungâ, mâinmodyze mataymo olâ-ro warâ. Tâwâlâ lâpylâ arâ aidyly umelâ eagâ mawylymo. Âdaituoba kulâ âwydymo mâinmolymo, eagonro agâ mitomoem kulâ-ro watay olâ, Deus ize ato araba kulâ amidylymo. Waunroem mohogüin-homobyrylâ âwydymo kuru Deus xurâem, nhatano keba. Xirâ mâuntudyzemo kuru wato —kely Jesus fariseu domodoram.

<sup>10</sup>Aituo xina aguely:

—Arâ atayma, uguondo nohogüimbalâ koendâ awyly-ro —xina kely.

<sup>11</sup>Jesus aguely:

—Âkealâ, Deus eon-honru nhuduypy lelä olâ nohogüimba tawyly emeen-

rim. <sup>12</sup>Tâlâ mawânkâ âdaituo uguondo nohogüimba ato. Tâlâ imezedânryenlä iazepy; awylygue tohogüindyzeba awylymo. Tâlâ emukeybyem tawylygue, tohogüindyzebaom. Tâlâ mâkâ Deus itaumbry tiengatuhoem tohogüindyzebaom, pekodogue, iamudogue warâ aekuru tâtynanâdyzeba tawylygue. Deus, nohogüimba itoem eon-honru nhuduypy lelä ohogüindânry —kely.

### Jesus iamimeom agâ atobry

(Mc 10.13-16; Lc 18.15-17)

<sup>13</sup>Ilâpygueduo tâjiunwyndo Jesusram tymeom nhadylymo.

—Asaemo nhangahu onwa imary iekâ. Deusram koendâ âzehohomoem ekagâ asaemo xurâem —kelymo.

Xina olâ ani akaemo iamudo sani-pyry modo tâuse:

—Jesus kâdynamâdaundâ —tâkeze.

<sup>14</sup>Arâ xina agueduo Jesus xinaram aguely:

—Arâ adâkezeba itaungâ! —kely. —Tâwâlâ iamimeom yam nâedâ. Kodopâdaundâmo. Iamimeom wâne enra ohondybyem lelä yam tâetoem, myara lâpylâ kurâ domodo nohondâ, yeinwântomoem, Deus kaynonro iwymârymoem itoem —kely.

<sup>15</sup>Aituo Jesus nhangahumo onwa tâmary nhedyly; mâkânra, mâkânra warâ aguely:

—Deus koendâ nhese —kely.

Aitybyem idâly.

### Uguondo toenzepa âdypeom agâ

#### Jesus aguehobyry

(Mc 10.17-31; Lc 18.18-30)

<sup>16</sup>Alâ ani uguondo Jesusram sain-tybyem, aguely:

—Pymâ koendonro, âdyka ise koendonro enday agânhekyly, Deusram udâhoem, aunloenlä eagâ witoem warâ? —kely.

<sup>17</sup>Aituo Jesus in-hoguly:

—Amyguely tutuzeka âmâ?  
 Âdaituoka koendonro myguely yam?  
 Tokalelâ koendonro kuru, Deus lelâ.  
 Deus agâ midyse âmâ-ro watay, Moisés  
 inweniby wâgâ agueho ara aikâ —kely.

<sup>18</sup>—Âdaunloka ise Moisés inweniby  
 ewy agânhelyky? —kely uguondo.

Jesus in-hoguly:

—“Ânguy kâdyâ. E agâ  
 mohogüin-hobyry lelâ xynanâgâ.  
 Tâmagazeba ikâ. Aitobyry wâgâpa  
 kulâ âkelomo kâzewentâdâ. <sup>19</sup>Unwâm,  
 âze warâ einwânkâ, xyrenkâ warâ.  
 Agonro agâ âpynegâ; koendâ mâzeto  
 ara, arâ lâpylâ agonrodo agâ koendâ  
 ikâ” —kely Jesus.

<sup>20</sup>Aituo uguondo aguely:

—Aunlolâ inanry idânârâ amygueho-  
 byry Moisés inweniby ara awidyly.  
 Âdy pylâka ise agânhetonguly, Deus  
 agâ lelâ witoem? —kely.

<sup>21</sup>Jesus aguely:

—Deus enudâ kuru amidyse matay,  
 âsejiguy modo idânârâ vende ieta.  
 Ebyry ise âdy pebaom modoram  
 mâunduly-ro warâ. Awârâ amânhe-  
 dyly-ro watay, tâlâ lelâ ise âmâ  
 koendonro Deus eydâ atodâ ekanâ-  
 dyby. Idânârâ tâlâ mato mâunduduo,  
 odopâgâ, ynynonroem mitoem —kely  
 Jesus.

<sup>22</sup>Jesus arâ aguely tindatuo ani  
 mâkâ uguondo toenzepa tydinhe-  
 rugueim âjityendyly, tysejiguy modo  
 vende tiendyseba tawylygue. Tytynre  
 kehoem idâly.

<sup>23</sup>Aituo Jesus xinaram aguely:

—Ton-honre lelâlâ âdypeom modo  
 yeinwântoem, Deus kaynonro iwy-  
 mârymoem itoem warâ, tysejiguy kulâ  
 ize atomo kuru awylygue. Xirâ mâuntu-  
 dyzemo kuru wato. <sup>24</sup>Ton-honre  
 camelu agüie ihu oze sakadoem, arâ  
 lâpylâ ton-honre âdypeom modo tâlâ

tato inmohomoem, Deusgue lelâ tywy-  
 mâgomoem warâ —kely.

<sup>25</sup>“Ton-honre lelâlâ âdypeom modo  
 Deusgue iwymâgomoem” Jesus keduo,  
 toenzepa kehoem xina âseguâdâdyly.  
 Xina enanaji, âdypeom modo lakuru  
 Deus eydâ atoram idâim waunlo ara  
 awylygue. Âjigüe xina aguely:

—Arâ atayma ise ânguy nâsema-  
 guewâbyra-ro —xina kely.

<sup>26</sup>Aituo Jesus xinaram MYK ity-  
 byem aguely:

—Âkealâ, ânguy nâsemaguewâbyra  
 ton-honrugue kulâ, Deus olâ kurâ  
 domodo anhetânry adyese lelâ. Âdy  
 anhetânry lâpeba Deus —kely.

<sup>27</sup>Jesus aguely tindatuo myani  
 Pedro aguely:

—Xina-ro? Idânârâ tâlâ tato xina  
 niâm, âynynonroem tâitoem. Iwerâ  
 ise-ro? Âdy ise xina nhemakely? —kely.

<sup>28</sup>Jesus xinaram aguely:

—Deus idânârâ kehoem iweloem  
 nhetondyly ume, pymâ xurery iwâ-  
 kuru wâgâ ise iekadyly, pymâem  
 witoem, urâ Uguondo Kaynâpa Âetyby.  
 Pymâem wituo, pymâem lâpylâ ise  
 âmaemo. Pymâdo xurery wâgâ ise  
 ikadylymo, kypemugudo israelita  
 domodo iwymâryem. <sup>29</sup>Idânârâ tâlâ  
 matomo mânhânlymo, ynynonroem  
 mitomoem watay, Deus xuduze lelâ  
 ipa matomo. Xirâ mâuntudyzemo kuru  
 wato. Itymo mânhânduomo, âykyho-  
 moem ijidylymo xuduze. Âwaigorumo,  
 âukonomo, nhaundumo, unwânmo,  
 âzemo, âmeonmo warâ mânhân-  
 duo, Deus âpemugumo nhetomo ara  
 kehoem nhenimo, âwynenimo warâ  
 xuduze. Âpimo mânhânduomo, Deus  
 âpynirymo xuduze. Tâlâ matomo  
 mânhânlymo ynynonroem mito-  
 moem watay, âdy ize matomo xuduze,  
 mânhâmpymo takaze kehoem ise  
 tâlâ mawylymo. Âgueduomo olâ ise

aunloenlá Deus agâ mawylimo. Xirâ mâuntudyzemo kuru wato. <sup>30</sup>Iwerâ waunropyry modo, ilâem âgânâyra ise. Âgânonrobry modo, ilâem waunroem ise warâ —kely Jesus.

**Jesus uva ezay tâwanuneim modo wâgâ nhegatuhoery**

**20** <sup>1</sup>Jesus aguely: —Unâ segatui wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani uguondo imâsedogue tyfazendagueim. Typi ezay uva etânehonrimbyryem myani. Ekaunâdyly ume, emedyly wâgâ idâly tâwanuneim modo xuize, uva nhekaunâdomoem. <sup>2</sup>Uguondo modo tientuo myani, eyanmo aguely: “Tâwanuneim modo ize urâ iwerâ, uva ekaunâniem. Koendâ ise ipywadylymo. Tuguanse mâsewanilymo-ro watay, tokalâ moeda prataguetogue ise ipywadylymo” kely. Tutuzemo myani koendâ nhepywadyly awyly. “Ize lelâ ise xina amygueho ara. Âpi ezay âsewanize lelâ xina iwerâ” kelymo myani. Arâ âseinwândybyem, âpa ezary sodo akaemo ingonodyly âsewanize. <sup>3</sup>Emedyly wâgâ nove horas awârâem myani eagonro tâwanuneim modo xuiõse idâõndyly. Tâsewanidyzedonro modo âtâdyguyhoam idâly. Tâsewanidyzedo modo tientuo, eyanmo aguely: <sup>4</sup>“Uva ekaunâni ize urâ” kely. “Iwerâ wao ypi ezaji âsewaniwâdaunda. Koendâ ise ipywadylymo” kely.

<sup>5</sup>—Âseinwândybyem myani âpa ezaji âsewanize idâlymo. Kuotatay myani âpa ezary sodo idâõndyly tâwanuneim modo xuiõse. Tientuo myani eyanmo aguely: “Urâem uva ekaunâdaunda. Koendâ ise ipywadylymo” kely. Inepa kehoem myani akaemo aguewâtobyry modo idâly âpa ezaji. Três horas kogoneyam lâpylâ warâ tâwanuneim modo

xuiõse idâõndyly Tâsewanidyzedonro modo tientuo myani, eyanmo aguely: “Urâem uva ekaunâdaunda. Koendâ ise ipywadylymo” kely. Inepa kehoem myani akaemo aguewâtobyry modo idâly âpa ezaji. <sup>6</sup>Kogoneyam, cinco horas awârâem myani âpa ezary sodo idâõndyly tâsewanidyzedo modo âtâdyguyhoam. Tâsewanidyze donro modo tientuo myani aguely: “Âdy amânhepyralâ inanry tarâ âguansezedylymo. Âdaituoka âsewanize mydâpa mawylimo?” kely.

<sup>7</sup>—“Tâsewanidyze wâne xina, ânguy olâ xina ewanu nudupa” kelymo. —“Ypi ezaji pylâ uva ekaunâdaunda” kely âpa ezary sodo. Agueduo myani idâlymo âsewanize.

<sup>8</sup>—Iguandyly ume, seis horas awârâem myani sodo aguely tâwanuneim modo iwymâryam: “Tâwanu inmoho odaylâ akaemo. Idânârâ tâwanuneim modo igâsegâ, mâempywadomoem. Tokalâ hora lelâ âsewaniby modo saguhoem epywagâ, xypyryem ise tuguanse âsewaniby modo-ro warâ” kely.

<sup>9</sup>—Warâ myani nhepywadaynly. Saguhoem nhepywaguyly myani akaemo tokalâ hora lelâ âsewaniby modo. Tokalâ moeda prataguetogue myani âzepywaolymo. <sup>10</sup>Tuguanse âsewaniby modo awârâ tientuo myani, aguelymo âjigüe: “Imâem ise kâpywadyly, tokalâ moeda takaze” kelymo. Tokalâ moeda prataguetogue kulâ olâ myani akaemo modo âzepywaolymo lâpylâ. <sup>11</sup>Tâpywadobyry tientuomomyani âpa ezary sodo agâ iewiâpadylymo. Eyam aguelymo: <sup>12</sup>“Koendâ xina mâempywanehonwâbyra enra âmâ. Tokalâ hora kulâ awâkâ agâ saintyby modo nâsewaniagui. Xina lakuru enra tuguanse kehoem âdâpigu oday âsewanirim. Xina agâ

âzekiba kehoem akaemo mepywanehoangui. Xina menokudai” kely akaemo tuguanse âsewaniby modo.

<sup>13</sup>—Aituo myani âpa ezary sodo eyanmo aguely: “Idataungâ wao. Inokudaymbamo urâ. “Tokalâ moeda prataguetogue tuguanse âsewanize lelâ xina’ mygueakimoma. <sup>14-15</sup>Ize wato ara ydinheruru agânhedily. Âzekiba idânârâ kêempywanehonly-ro watay, inokudilymo mâkeba. Akaemo modo arâ kêempywadobyry wâgâ tyewiâseba itaungâ. Mâsewânilymo kulâ. Anra ipywadomo. Emakewâdaungâ. Idâwâtaungâ-ro warâ” kely. Warâ myani, âpa ezary sodo, tâwanuneim modo warâ aidily. <sup>16</sup>Iwerâ waunropyry modo, xypyry etay âgânâynra ise. Âgânnonrobyry modo, xypyry etay waunroem ise —kely Jesus.

{Koendâ lelâ awâkâ Jesus agaityon-enlâ tâinwânni agâ, iamudoenlâ tâinwânni agâ alelâ keze awârâ aguely.}

**Jesus, “Yigueduo, kurâem itonze urâ” keontobyry**

(Mc 10.32-34; Lc 18.31-34)

<sup>17</sup>Xidadâ Jerusalémram xina âkuly. Tâtâday Jesus aguiom modo duaypa xina nhejikely. Aituo xinaram aguely:

<sup>18</sup>—Idataungâ wao auguely. Jerusalémram xirâ kytâly. Yizepaom modoram adawâhoze urâ, urâ Uguondo Kaynâpa Âetyby. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ iegamezemo. “Nigue awâkâ” kezemo. <sup>19</sup>Judeu keba modo emaxi iegamezemo. Akaemo ise âwankuem yeni, yapiogunri, kruz wâgâ yârim warâ. Awârâpygueduo, azagâ<sup>k</sup> emedyly idily wâgâ olâ ise kurâem witondily —kely.

**Tiago, João warâ xurâem isemo nhekadobyry**  
(Mc 10.35-45)

<sup>20</sup>Zebedeu iwydy, Tiago, João warâ agâ Jesusram saindylymo. Enado âzeguhoam itybyem eyam aguely:

—Âyam kêenkagulyly wao aiekâ —kely mâkâ pekodo.

<sup>21</sup>Aituo Jesus mâkâ pekodo nhapâguely:

—Âdyka mâenkadyze mato? —kely. Pekodo in-hoguly:

—Pymâem kuru mituo, asaemo azagâ ymeombyryne apay ekanâgâmo, tokalâ aho eynynâ, tokalâ pâem eynynâ warâ, pymâem agâ itomoem —kely.

<sup>22</sup>Jesus aguely mâkâ imeombyryram:

—Mâuntuwâbyra âmaemo âdara yagâ pymâem mitomoem adâjidyly awyly. Toenzepa kâsenagazedo ara kehoem âsenagazeze tâeganeka ise âmaemo? —kely.

Aituo aguelymo:

—Emaenze lelâ xina, mâenmaen-ho ara —kelymo.

<sup>23</sup>Jesus aguely:

—Âsenagazeze urâ, âmaemo lâpylâ warâ. Yahoru eynynâ ekani, pâem eynynâ ekani warâ kâinduakeba olâ urâ. Pabai kaynonrolâ ise iduakeim. Mâkâ mawânkâ târâ tâzekado nhonipyry —kely.

<sup>24</sup>Tiago, João warâ ise nhekadobyry tindatuo, xina nehoguebyra ani. Eagâmo xina tyewiâpadaynze warâ.

<sup>25</sup>Aituo Jesus xina idânârâ ingâsedily tuopaji, xina agâ adâkehoem:

—Tutuzelâ âmaemo, pymâdo ton-honreim modo, tyewiâse kehoem kurâdo agâ aguely, adâkehobyry anhetomoem. <sup>26</sup>Âmaemo olâ arâpa itaungâ. Mâdyren-hondyze mataymo, tâzema-ryenlâ itaungâ. <sup>27</sup>“Imawyadâbyramo

<sup>k</sup> 20.19 Nota de pé Mateus 12.40dâ egâ.

ise urâ. Pymâ wawlygue; âmaemolâ ise urâem aieni” tâkezeba itaungâ, pymâem mituomo. <sup>28</sup>Yara itaungâ. Deus Ingonotyby lelâlâ wâne urâ, iemawydâ-domoem âetyby keba olâ urâ, imarymo lakuru urâ. Igueze âetyby urâ. Kurâdo inakanhe aito modo epywaze ise yiguely, Deus aguehobyry ara —kely Jesus.

### Jesus azagâ epy kua nhetobyry

(Mc 10.46-52; Lc 18.35-43)

<sup>29</sup>Jericódâba xina egaseday, toenzepa kurâ domodo xina nhapygue idâlymo. <sup>30</sup>Tâlâ ani azagâ epy ânwa edazekâ ekadybyem. “Jesus awâkâ sakani” kely tindatuomo, azakâlâ adaenkelymo:

—Xina tytyenzelâ ikâ, Pymâ ton-honreim! Âadamu Davi ara pymâ ton-honreim âmâ! —kelymo.

<sup>31</sup>Ton-honre kehoem kurâdo eyanmo aguely:

—MYK alelâ itaungâ. Tadaenkezeba itaungâ warâ —kelymo.

Adâkehonduomo lakuru ago kuru adaenkelymo:

—Xina tytyenzelâ ikâ, Pymâ. Âadamu Davi ara pymâ ton-honreim âmâ! —kelymo.

<sup>32</sup>Jesus epagudyly. Akaemo azagâ ingâsedily. Tuopaji saintuomo Jesus aguely:

—Âdyka âmaemoem agânhedyse matomo? —kely.

<sup>33</sup>—Tiendyse xina, Pymâ —kelymo.

<sup>34</sup>Tintyenduomo Jesus enumo MÂ’ nhedyly. Inepa kehoem nhedylymo. Xina nhapygueniem idylymo lelâ-ro warâ.

### Jesus Jerusalémram saintobyry

(Mc 11.1-11; Lc 19.28-40; Jo 12.12-19)

**21** <sup>1</sup>Âtâ anary Betfagé iwaguepa xina saindyly, Jerusalém iwaguepa, iwy Se Oliveira Ekaram. Myarâ saintybyem, Jesus xina ewy azagâ waunroem ingonodyly. <sup>2</sup>Wakely eyanmo:

—Idâwâtaungâ Betfagéram. Aindylymo umelâ ise tokalâ jumenta, imerylâ warâ ekâjiby mâendylymo. Azakâlâ ekâjigüewâdaungâ. Enetaungâ xarâ. <sup>3</sup>“Âdaituoka jumenta, imery warâ mandylymo?” myguehonlymo watay, “Kywymâry asaemo izetonro. Inepa olâ ise jumenta, imery warâ nhopânehonly” myguelymo lelâ ise —kely Jesus.

<sup>4-5</sup>Warâ myakâwândy Deus itaumbry egatuim Zacarias inwenily:

“Jerusalém donro modoram

aguewâtaunda:

‘Etaungâ! Âwymârymo saindyly.

Pymâ ton-honreim ara kehoem inkâba ise âewyly.

Jumentinhu wâgâ ise âewyly, jumenta imery wâgâ’

kewâtaunda eyanmo”

kely myakâwândy inwenily.

Jesus jumentinhu wâgâ Jerusalémram saintuo, Zacarias inwenily ara kehoem aidily.

<sup>6</sup>Aituo akaemo azagâ ingonotyby modo idâly. Jesus aguehobyry ara aidilymo. <sup>7</sup>Jumentinhu, ise alelâ nhadylymo. Tygaparyguelâ jumentinhu, ise warâ inkawendâdylymo. Ilâpyryem Jesus jumentinhu onwa âkuly. <sup>8</sup>Jesus saindyly iray toenzepa kehoem kurâ domodo tygapary ânwa oze PO PO nhedylymo, Jesus tynrense tawyly tienhon-homoem. Tâlâ pylâ wakuri sary tiantâwâdyby modo onro onwa PO PO ieni modo, tynrense tawyly tienhon-homoem, pymâ ton-honreim kehoem iray adâitomo ara. <sup>9</sup>Waunroem idâwâni modo, âgânâ idâwâni modo warâ adaenkewâdylymo adaguly:

—Hosana Davi iwerypyry! —kelymo. (“Tohoguezeim Davi iwerypyry” keze aguely.)

—Tohoguezeim kuru awâkâ Deus eon-honru enehonze âeni! Hosana Deus kaynonro! —kelymo.

<sup>10</sup> Warâ Jesus Jerusalém odaxi saindyly. Idânârâ kehoem mârâ xidadâ odano modo âjigüe aguelymo:

—Ânguyka mâkâ saini? —kelymo.

<sup>11</sup> Aituo kurâdo in-hoguly:

—Jesus mâkâ, Deus nynnâ aguenri. Galiléia eynonro, xidadâ Nazaré donro mâkâ —kelymo.

**Jesus ânguydo imeom vende ieni modo Deus ety odayba nhegaseândobyry.**

*(Mc 11.15-19; Lc 19.45-48; Jo 2.13-22)*

<sup>12</sup> Jesus egawândyly Deus ety idase-râji. Âdydo imeom vende ieni modo, sanâni modo warâ târâpa nhegaseândaynly, Deus ety oday aidylymo awylygue. Dinheru troca ieni modo iwenzary nhamely. Papa vende ieni modo xurery nhamunedyly. <sup>13</sup> Egase-ânimobyryem eyanmo aguely:

—Deus itaumbry awo wâgâ iweni-byem: “Xirâ iety yagâ agueho xirâ” kewândy Deus. Kurâ domodo mâenmagazedlymo kulâ olâ. Ânguydo imeom Deusram tiunduly nhanâdylymo watay, toenzepa mâenwâentanâdylymo. Dinheru âmaemoenlâ mânhedlylymo. Deus ety, tâmagazeim modo otoendoem mânhedlylymo kulâ —kely Jesus.

<sup>14</sup> Jesus Deus ety idaseray atay, epy modo, adakobâdânry modo warâ eyam idâlymo. Kua tyesimo ani Jesus. <sup>15</sup> Aituo tonlo modo iamimeom adaenkewâdyly:

—Hosana Davi iwerypyry! —kelymo.

Kurâdo eynynâ Deus agâ aguewâni modo iwymârydo, Moisés inweniby enomedâni modo warâ Jesus akaemo tâwânuneim modo kua nhedyly nhedylymo, iamimeom saenlu indadylymo warâ. Aituo toenzepa kehoem iewiâpadylymo. <sup>16</sup> Jesusram aguelymo:

—Iamimeom âwâgâ aguely midatai? Arâ aguepa nidâmo —kelymo.

—Xidatailâ. Kâeumpyramo olâ ise urâ. Tutuze urâ, Deus itaumbry awo wâgâ iweniby tutuzelâ mawylymo: “Iamimeonra, iamimeom tâjihuanomodoram warâ ise mâzehogueoly kuru” kely iweniby —kely Jesus eyanmo.

<sup>17</sup> Jesus Deus ety odayba egase-bygueduo, xina idâly Jerusalémdâpa. Betanianra xina xykyze idâly.

**Jesus figueiraram,  
“Iwiseodaymba ise âmâ”  
kehobyry**

*(Mc 11.12-14, 20-25)*

<sup>18</sup> Kopaelâgâem emedyly wâgâ Jesus agâ xina odopâdyly Jerusalémram. Tâwinze myani Jesus. <sup>19</sup> Awylygue figueira ânwa edazekânro toenzepa saryum tientuo, ago iopaji saindyly. Tâwise-ro waunlo ara, enanaji, tarysely agâlâ ewiseim mawânâ figueira. Tâwiseba olâ ani mârâ, toenzepa saryun-em lelâ. Aituo Jesus figueiraram aguely:

—Iwiseodaymba olâ ise âmâ —kely.

Aguepygueduolâ kehoem figueira iladyly. <sup>20</sup> Xina emâ figueira sary iladyly. Toenzepa kehoem xina âsewânily. Aituo xina aguely:

—Inepa kehoem awârâ figueira sary niladai! —xina kely.

<sup>21</sup> Jesus xinaram aguely:

—On-honrumo kâunduly mâinwândylymo, âkealâ kuru ton-honre wawyly mâinwândylymo warâ watay, adyesenry modo aiese lelâ âmaemo, figueira agânhetobyry takaze. Amânhetomoem on-honrumo kâundupygye idânârâ aiese lelâ âmaemo. Xirâ iwyrâ “Âxigüegâ; paikaji adamegâ” myguelymo-ro watay, tâjidydâpa tâxigüeze tâise, paikaji tadameze warâ. <sup>22</sup> Emakeze mawylymo mâinwântuomo, mâenka-dybymo âyanmo xuduze Deus. Xirâ mâuntudyzemo kuru wato —kely Jesus.



**Deuslá Jesus igononi, âdaunlo  
kulâ mâkeba**

(Mc 11.27-33; Lc 20.1-8)

<sup>23</sup>Jerusalémram saintybyem, Jesus idâly Deus ety odaji. Târâ kurâdo nhenomedâdyly ume, kurâdo eynynâ Deus agâ aguewâni modo iwymârydo, eagonro pymâ modo warâ eyam idâlymo. Aituo nhapâiguelymo:

—Ânguyka tarâ Deus etydâ arâ ami-toem agueim? —kelymo.

<sup>24</sup>Aituo Jesus in-hoguly:

—Apâiguezemo lâpylâ wao urâ. Uhoguduomo ise ânguy ugononibry awyly aguely —kely.

Aituo aguely:

<sup>25</sup>—Ânguyka ani João Batista inakanhe adâitobyry wâgâ âjityenydyby modo batiza nhetoem aguenri? Deuslá? Âdaunlo uguondo kulâ? Uhoguwâdaungâ wao —kely.

Aituo myani âjigie aguelymo:

—Iwerâ, ise-ro? Âdara kuru ise kin-hoguly? “Deuslá agueim” kykeduo, “Âdaituo pylâka João aguehobyry mâinwâmpyra mawlymo?” keze. <sup>26</sup>“Uguondo kulâ ani João aitoem agueim, Deus mâkeba” kykeduo, kurâ domodo kagâ iewiâpadaynze. “Deuslá João Batista igononi” tâkezemo inanry —kelymo.

<sup>27</sup>Awylygue warâ in-hogulymo:

—Xina nutuwâbyra ânguy João Batista batiza nhetoem agueim awyly —kelymo.

Aituo Jesus aguely:

—Arâ atayma auguepa lâpylâ ise urâ, ânguy xirâ agânhetoem ugononi awyly-ro —kely.

**Jesus azagâ tâjimery wâgâ  
unâ nhegahobyry**

<sup>28</sup>Jesus aguely pymâ modoram:

—Adâjitobyry ise unâ kêngatuly. Koendâne idataungâ mâuntuho-

moem. Tâlâ myani uguondo azagâ tymegueim. Tymery saguhobyryram aguely: “Ypi uva kêntâdobyry ezaxi isenra âsewanize mydâly” kely. <sup>29</sup>Imery aguely: “Kâsewanidyzeba aze iwerâ. Udâpa ise aze” kely. Agueypyem olâ tunâry nhugukely. Idâly âpa ezaji âsewanize. <sup>30</sup>Aguely lâpylâ iukonoam: “Uva kêntâdobyry ezaxi isenra âsewanize mydâly” kely. Mâkâma, “Idâze lelâ urâ, Pabai” keim. Agueypyem olâ myani âsewanize nâtâba.

<sup>31-32</sup>Aituo Jesus aguely pymâ domodoram:

—Âdaunloka akaemo enday tunwym ize ato ara aini? —kely.

Aituo in-hogulymo:

—Iwaigoru âsewanize idâhobyry wâgâ —kelymo.

Jesus eyanmo aguely:

—Âkealâ awârâ. Mâkâ iukono ara kulâ olâ amidylymo. Impostu epywado emakewâni modo, pekodo inakanhe aini modo warâ mawânkâ yeinwântâmo. Âmaemo kulelâ yeinwântânry. Âdara Deus ize ato ara lelâ amidylymo awyly enome-dâze keankâ mâkâ João Batista âewyly. Aguely mâindadyseba olâ keankâ âmaemo. Akaemo kurâdo izepa matomo keankâ toenzepa João aguely idani. Akaemo impostu epywado emakewâni modo, pekodo inakanhe aini modo warâ nâjityendâmo inakanhe adâitomobyry wâgâ, adâidyly nimomo warâ. Akaemo aidyly mâentuomolâ, mâjityenydylymo, inakanhe amidylymo mâinmolymo mipyra olâ keankâ âmaemo. Deus ize ato ara amitaymba âmaemo. Awylygue ise Deus pymâem atoram mydâpa mawlymo. Xirâ mâuntudyzemo kuru wato —kely Jesus.

**Tâwanuneim modo koendâpa  
aitobyry wâgâ Jesus unâ  
nhegatuhoobyry**

(Mc 12.1-12; Lc 20.9-19)

<sup>33</sup>Ilâpyryem Jesus tonlo modoram aguely:

—Idataungâ wao xirâ unâ. Tâlâ myani uguondo uva etâdybybeom. Aituo uva ejidy nhahodânehonly tuhu imâsedo modogue. Onwâgâ tâtagueim nhesaguehonly, uva ekuguehoem tâjihurugue, vinhu xygatoem. Âtâ imeimbyry kaynâ olâ-ro waunlo aienehonwânmy tâmagazeim enuagaendo, ânguydo imeom nady saguwâni modo enuagaendo warâ. Ilâpyryem myani uva ejidy etaynrin modope nhedyly. Warâ myani eyanmo aguely: “Ypi mâendylymo-ro watay, uva xutuduo, epajigâze urâ agâmo” kely. Koendâ lelâ myani in-hogulymo. Aituo myani idânârâ âtunâguedybyem, âtâ anary iwaguenonra idâly. <sup>34</sup>Uva ekaunâdo odaji ituo myani tâmary modo ingonodyly, akaemo tâwaneim modoram nhekaunâdybymo ewy turâ emakeze. <sup>35</sup>Aituo myani ingonotyby modo idâlymo âpa ezaji. Saintuomo, tâzenagazeozemo myani uva ejidy etaynrin modoram. Adapioguolylo, âdyolylo, tuhugue tadamytâoze âdyolylo warâ myani aieholymo. <sup>36</sup>Aituo myani uva sodo eagonro tâmary modo ingonotondyly wâne, turâ emakeze. Adyetonzemo lelâ olâ myani.

<sup>37</sup>—Ilâpyryem myani uva sodo tymery ingonodyly. “Ymery tokaleom awylygue âda nientaymbamo ise” tâkeduo myani ingonodyly. <sup>38</sup>Sodo imery saindyly tientuo myani âpa ezay tâwanuneim modo âjigie aguelymo: “Uva ejidy sodo imery mâkâ âeni. Tunwym igueduo, mâkâ ise ipibyry sodo. Kydyânrene, nhunwym ipibyry kurâenlâ itoem” kelymo.

<sup>39</sup>—Aituo myani mâkâ uva sodo imery nhawâdylymo. Sawânipyryem, âpa ezayba nhedylymo, tyân-hoem —kely Jesus.

<sup>40</sup>Aituo Jesus adâkely idani modo nhapâiguwâdyly:

—Uva ejidy sodo odopâdyly watay, ise-ro? Âdaiehoze akaemo? —kely.

<sup>41</sup>Aituo in-hogulylo:

—Todopâduo, tumunrunneim modo xyâen-honze mâkâ. Eagonro modo ise mârâ uva ejidy eniem nhekyly-ro warâ. Ipi eni iwelo modoma tienkaunâduo, sodo xurâ xuduze —kelymo.

<sup>42</sup>Aituo Jesus eyanmo aguely:

—Deus itaumbryry awo wâgâ iweniby mântaimbymo enanâguedaungâ.

“Tâlâ myani tuhu imeâgâkeba, âtâ itâdo.

Idânârâ itâdaynrin modo mârâ tuhu tâensemo, mârâgue âtâ tintâdyzebamo olâ.

Deus xurâem olâ mârâ tuhu tywyneim kuru!

Kywymâry Deus induakeyby mârâ tuhu, âtâ itâdoem.

Deus anhetyby awylygue iwâkuruem awyly!”

warâ iwenibyem awyly —kely.

<sup>43</sup>—Yizepa matomobyry enanâguedaungâ. Awylygue judeu keba modoram ise âdara Deus kywymâryem idyly awyly egatuly. Yeinwânsemo-ro warâ. Akaemo iwymâryem ise Deus, âwymârymoemba. <sup>44</sup>[Ânguylâ mârâ tuhu onwa ihugueyby, âdyâze. Ânguy onwalâ mârâ tuhu ihugueduo, samiunze] —kely Jesus.

<sup>45</sup>Aituo ani akaemo kurâdo eynynâ Deus agâ aguewâni modo iwymârydo, fariseu domodo warâ Jesus unâ nhegatuhyby indadylymo. Tywâgâ aguely awyly nhutulymo myani, Jesus izetonro keba tawylygue, tâwanuneim modo âpa

ezary sodo imery izepa atomobyry ara. <sup>46</sup>Awylygue Jesus tientadânehon- dyze idylymo, tyâen-hon-hoem. Âjigüe aguelymo:

—Iweâ lelâlâ kianwânehonly watay, kurâdo kagâ iewiâpaze Xurâmoem, koendonro lelâlâ awâkâ Jesus, Deus eynynâ aguenri awâkâ —kelymo.

Awylygue Jesus âdara niepyra awylymo ilâenlâ.

**Todohogüin-ho etyryam  
igâsedyby modo wâgâ Jesus  
aguehobyry  
(Lc 14.15-24)**

**22** <sup>1</sup>Jesus âkelo unâ nhegatuly, tienomedâdomoem. <sup>2</sup>Warâ aguely:

—Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani pymâ tyntenseim, tumuru ohogüin-hoem âty imâsedo aieni. <sup>3</sup>Toenzepa myani kurâdo tâtyram âwinduase idâhoem ingâsedyby modo. Alâ ituo myani tâmary modo ingonodyly aguewâtobyry modo igâseze, âwinduase idâhomoem. Akaemo olâ myani tâtâdyzeba. <sup>4</sup>Ine warâ myani tâmary eagonro modo ingonodyly. Warâ myani aguely eyanmo: “ “Alâ pyni nâwanikeagui. Tapirâ tadygueim modo nâdyoaki, nâjihuoagui warâ. Alâ idânârâ. Yagâ âzetyguedaungârâ” keanry xina iwymâry’ kewâtaunda kâingâsedaymby modoram” kely âty sodo.

<sup>5</sup>—Aituo myani emary modo idâondyly igâsedonzemo. Todohogüin-ho etyryam tâtâdyzeba olâ myani akaemo. Âsewanize lelâ myani idânârâ idâlymo. Tâlâ myani tyfazendaryanlâ âsewanize idâim, tylojaryanlâ âsewanize idâim warâ. <sup>6</sup>Tâlâ lâpylâ olâ myani tygâseze idâypy modo sawâni, sapiogurim, xyârim warâ. <sup>7</sup>Âty sodo tâmary modo enagazenibyry modo agâ iewiâpa-

dyly myani. Aituo myani tyzodadury modoram aguely: “Iemary modo xyârim-pyry modo xyâwâtaunda. Ijidadârymo iaduântaunda warâ” kely. Tywymâry aguehobyry ara myani sodadu domodo aidyly. <sup>8</sup>Ilâpyryem warâ myani aguely tâmary modoram: “Alâ wâne todohogüin-ho etry. Kâingâsedaymby modo olâ enra yagâ tâzetyguedyzeba. Awylygue ise kâingâsedombyramo wawyly. <sup>9</sup>Idâwâtaungâ arua oze. Idânârâ monhontybymolâ ise mâingâseguylymo âtynra âetomoem” kely myani âty sodo.

<sup>10</sup>—Aituo myani emarydo arua oze idâlymo. Idânârâ kurâdo tiontyby ara nhadylymo âtynra. Kurâ domodo inakanhe aitânry modo, inakanhe aini modo alelâ myani nhaklylymo. Sainitybyem, âtâ tâjiwogonro iwâkuru tâduduoze myani eyanmo. Âty sodo ety tumyze myani. <sup>11</sup>Inepa kehoem myani âty sodo egawândyly, saintyby modo edaenkuze. Akaemo duay tâlâ olâ myani uguondo âtâ iwâkuru-gueba kulâ âzetydâni, igâsedyby modo âtâ odaji egawântoem xuduypygueba kulâ. <sup>12</sup>Aituo myani âty sodo mâkâ uguondo nhapâiguely: “Âdaituoka kâingâsedaymby modoram kâunduppy âtâguepa âzetydâdybyem mawyly?” kely eyam. Mâkâ olâ myani nihoguba. <sup>13</sup>Aituo myani âty sodo aguely tâmary modoram: “Etaungâ awâkâ uguondo; kâingâsedyby modoram kâunduppy âtâguepa kulâ âzetydâdyly. Tarâpa tâise awâkâ. Emakâjiwâdaungâ. Ihugâjiwâdaungâ. Iamu odaji samewâdaungâ warâ. Myarâ samewâdyby modo âse-nagazedoram, ohogüendomoram, tyery nhaguhomoram warâ” kely myani âty sodo. <sup>14</sup>Arâ lâpylâ wâne, idânârâ kurâdo igâsedyly Deusgue iwymâgoem. Aguiapa kulâ olâ yeinwânni modo. Awylygue ise aguiapa kulâ lâpylâ Deus eydâ atoram idânri modo awyly —kely Jesus.

**Impostu epywadyly wâgâ Jesus  
nhapâiguehomobyry**

(Mc 12.13-17; Lc 20.20-26)

<sup>15</sup>Jesus aguely tindatuo myani fariseu domodo âxiguely âtunâgueze, Jesus tienwentâdomoem. Warâ aguelymo:

—Moisés inweniby wâgâpa kulâ aguehoem aguyjiene —kelymo.

<sup>16</sup>Âtunâguedybyem tynnonro modo ewy, Herodes eynnonro modo ewy warâ Jesus agâ agueze ingonodylymo. Saintrybyem, ingonotaymby modo Jesusram aguelymo:

—Pymâ, konokuni keba mawily, tutuze xina. Deus ize ato wâgâ âkealâ xina mâenomedâdyly. Iozeno lelâ amygueho, ânguy izepa awily umelâ. Pymâdo tynrenseim modo ize ato amânheteroem kulâ amygueho mâungukewâbyra âmâ. <sup>17</sup>Awylygue âdara impostu epywadyly wâgâ mâuntuly wao xinaram aguekâ. Moisés inweniby ara, koendâ pymâ Roma donro César-ram impostu ebyry epywadyly? Koendâpa? —kelymo.

<sup>18</sup>César tiunâguedoem kulâ tapâiguelymo awily xuturimbyryem olâ myani Jesus.

Aituo aguely:

—Koendonro emyenro wâne âmaemo, koendonro keba olâ âmaemo. Inra esagueyby odaji wâne ânguyilâ ihuguely myara wâne ienokudyze mawilymo. <sup>19</sup>Moeda enetaungâ, pymâ Roma donro xurâem kiempywado —kely.

Agueduo moeda nhadylymo. <sup>20</sup>Emaxi nhudulymo. Jesusram adapâigueolymo:

—Ânguy emydy ekudoka xirâ wogonro? Ânguy ezedy iwâgâ iweniby warâ? —kely.

<sup>21</sup>Aituo in-hogulymo:

—Roma donro kywymâry César ezedy, emydy warâ —kelymo.

Jesus aguely:

—César xurâ, Cesaranlâ xuduwâtaungâ. Deus xurâ, Deusranlâ xuduwâtaungâ warâ —kely.

<sup>22</sup>Jesus aguely tindatuo âseguâdâdylymo. Napâigueombyra idylymo. Aituo idâlymo.



(Mateus 22.18-21)

**Iguewâtyby modo  
kurâem itondyly wâgâ  
nhapâiguehomobyry**

(Mc 12.18-27; Lc 20.27-40)

<sup>23</sup>Mârâ iguandyly wâgâlâ saduceu domodo ewy Jesus agâ âtunâgueze idâlymo. Iguewâtyby modo kurâem itondyly einwânni keba myani akaemo. Jesus iopaji saindylymo. <sup>24</sup>Aguelymo:

—Idakâ, Pymâ. Moisés ezewenry tutuzelâ âmâ, iweâpa kydamudoem inweniby: “Uguondo tywydy namypalâ iguely-ro watay, iukonobyrylâ nohogüim iwydypyry agâ, imezeândoem. Aituo iamudo iazepy, igueypy imeryenlâ âdutuoly” kelype.

<sup>25</sup>Xina olâ ise warâ nhegatuly. Tâlâ myakâwâm sete uguondo modo âjiwai-goruem, âjiukonoem waunlo. Iwaigoru ohogüinly myakâwâm. Tywydy namypalâ iguely. Iukonobyrylâ myakâwâm ohogüinrim pypâ agâ. <sup>26</sup>Mâkâ lâpylâ myakâwâm tywaigoru iwydypyry namypalâ iguely. Azagâ tokalâ ietomo iukono ohogüinly myakâwâm pypâ agâ. Mâkâ lâpylâ iguewâm, tywaigoru iwydypyry namypalâ. Tywaigoru iwydypyry namypalâ lâpylâ myakâwâm quatro ietomo, cinco ietomo, seis ietomo, sete ietomo

warâ iguwâdylimo. Sete uguondo lelâ myakâwâm mâkâ pekodo agâ ohogüimby. <sup>27</sup>Idânârâ mâkâ uguondo modo iguwâpygueduo myakâwâm, mâkâ pekodo iguely lâpylâ.

<sup>28</sup>—Xirâ xina apâiguedyze ato. Âkealâ kuru igueypy kurâem itondyly watay, âdaunlo uguondo akaemo sete ewy iwydyenka ise mâkâ, kurâem itonduomo? Idânârâ akaemo sete lelâ iwydyem ityby mawânkâ! —kelymo.

Âdalâ kulâ in-hoguly tientomoem kulâ olâ ara aguelymo.

<sup>29</sup>Aituo Jesus in-hoguly:

—Iozepa kulâ âunâgumo! Mâuntuwâbyra âmaemo Deus itaumbry awo wâgâ iweniby. Âdydo imeom aiese Deus ton-honre awyly, mâuntuba gâlâ âmaemo. <sup>30</sup>Iguewâtyby modo kurâem itonze lelâlâ, nigueompyra tâitomoem. Anju domodo nohogüinwâbyra. Alâpylâ iguwâtyby modo, kurâem itonduo, nohogüin-ondaymbamo ise. <sup>31</sup>Iozeno kuru iguwâtyby modo kurâem itonze kely mâintaimbaka minasemo? Enanâguedaungâ Deus Moisésram aguehobyry. <sup>32</sup>Deus aguewânmy: “Deus urâ, Abraão, Isaque, Jacó warâ iDeusry; tarâlâ asaemo yagâlâ” kewândymy. Kurâdo enanaji olâ, Deus einwânni iguwâtyby modo, iguwâtybyem lelâlâ. Deus xurâem olâ akaemo igueypyemba, târâlâ akaemo Deus eydâ atodâ. Arâ aguehobyry wâgâ Deus einwântaynrim modo nigueompyra awyly kiuntuly —kely Jesus.

<sup>33</sup>Jesus aguely tindatuo toenzeim keba gâlâ kurâdo âsewânily, arâ kurâdo nhenomedâduo.

#### Deus aguiendyse ato

(Mc 12.28-34; Lc 10.25-28)

<sup>34</sup>Saduceu domodo nhewentâ-guilyemba kehoem Jesus aguely, kely tindatuo myani fariseu domodo âtâdy-

guylymo. <sup>35</sup>Moisés inweniby wâgâ enomedânibe myani akaemo ewy. Inakanhe kulâ Jesus aguedyse wâne myani. Awylygue Jesusram aguely:

<sup>36</sup>—Toenzepa Moisés kâzewenryem inweniby modo. Âdaunloka koendonro kuru? Âdaunloka awârâ modo takazeno kuru? —kely.

<sup>37</sup>Jesus in-hoguly:

—“Kywymâry Deus iwynedaungâ âdydo imeom, kurâ domodo warâ mâinwynedomo takaze kehoem. Idânârâ ize matomo, Deus ize ato ara lelâ nidâ. Idânârâ angahumo oday âunâgomo Deus ize ato lelâ nidâ warâ.” <sup>38</sup>Xirâ aguely mawânâ tâzewenry takazeno kuru. <sup>39</sup>Eagonro tâzewenry koendonro lâpylâ xirâ: “Agonromo agâ âpynedaungâ; koendâ mâzetomo ara, arâ lâpylâ agonrodo agâ koendâ âzetaungâ” kewândy Deus. <sup>40</sup>Arâ aini kydatay, idânârâ Moisés inweniby aralâ aguidyly, Deus itaumbry egatuwâni modo inweniby aralâ warâ —kely Jesus.

#### Jesus, “Ânguyka Messias?” kehobyry

(Mc 12.35-37; Lc 20.41-44)

<sup>41</sup>Târâ fariseu domodo âtâdyguybyem atay, Jesusram adapâigueolyo:

<sup>42</sup>—Âmaemoem, ânguyka Messias, inanajimo? Ânguy iwerypyry? —kely.

Aituo in-hogulymo:

—Davi iwerypyry ise Messias. Davi pymâem atobyry ara ise mâkâ tarâ onro anaym pymâem awyly —kelymo.

Aituo Jesus eyanmo aguely:

<sup>43</sup>—Iozepa kulâ amyguelymo. Tutuzelâ myakâwândy Davi, âdaunlolâ kurâ takaze kehoem ton-honreim Messias awyly. Awylygue “Ywymâry” kewândy Davi Messiasram, niazepa awyly umelâ. Deus Ispiriturylâ mawânkâ eyam xutuen-hoim. Tutuzelâ âmaemo Davi inweniby:

<sup>44</sup> “Deus aguely myakâwâm  
Ywymâryram:  
‘Yahoru eynynâ ikagâ  
tynrenseim ekadodâ,  
âduery modo eon-honru  
kainly ara,  
âdydo ara kulâ âhuru iaxi  
kânhedylimo ara’ kely  
Deus”

kely myakâwândy Davi inwenily.

<sup>45</sup>—Daviâ Messias tywymâryem awyly wâgâ aguewândymy. Awylygue kiuntuly âdaunlo kulâ uguondo keba awyly. Messias tynrenseim kuru awyly xutuwâdaungâ, Davi takaze —kely Jesus eyanmo.

<sup>46</sup> Jesus aguely tindatuo ânguy adâkedyzeba idyly, âkealâ aguely awylygue. Ilâpyryenlâ, ton-honremba idylymo, sapâiguaeze.

**Fariseu domodo wâgâ, Moisés  
inweniby wâgâ enomedâni modo  
wâgâ warâ Jesus aguehobyry**  
(*Mc 12.38-39; Lc 11.43,46;  
20.45-46*)

**23** <sup>1</sup> Ilâpyryem Jesus xinaram, kurâ domodoram warâ aguely:

<sup>2</sup>—Moisés inweniby wâgâ enomedâni modo, fariseu domodo warâ koendâ tutuzemo Moisés inweniby. Awârâlâ akaemo ewanu, Moisés inweniby wâgâ enomedâdylылâ. <sup>3</sup> Awylygue aguedaymo, koendâ aguelymo idataungâ, idânârâ aguehomobyry ara aitaungâ warâ. Earamo adâiseba olâ itaungâ. Koendâ lelâlâ wâne nhenomedâdylimo. <sup>4</sup> “Aiekâ” tâkehomobyry ara nipyramo lâpylâ olâ. Tâjienwyeno tâmânreim sanâdyly tâmaenzeba ato ara awârâ nhenomedâdomo, tâmaenzein-emba awyly. Akaemolâ nemaembamo, ânguy tienmawyadâdomoem. <sup>5</sup> Tâzehogueoly kulâ ize atomo. Tâjituby wâgâ Deus itaumbyry inwenilymo watay imeâgâemba

kehoem tâjituby tywendy wâgâ, tâwâry wâgâ warâ nhekâjilymo. Etaungâ etymo. Tâty tywogonro wâgâ imâem kehoem panu ihomigadyby nhekâjien-honlymo, tynrentomoem kulâ. <sup>6</sup> Âtâ tâdâtâdyguyho odaji tâtâduomo, tâgareim ekado wâgâ ekadylymo, arâ lâpylâ âty mododâ. <sup>7</sup> Âdykâlâ kurâdo âtâdyguyho einkâ takaduomo, mâkâ modo tâdaenkudyzemo, tynrendysemo warâ inanry. “Konomedâni” kelygue lelâ tâzekedyze awylymo.

<sup>8</sup>—Urâ lelâ inomedâni kuru. Awylygue “Inomedâni” myguehon-dyze tâiseba itaungâ. Agonromo takazeno mâkeba âmaemo; idânârâ âzekiba âmaemo, âjiukono, âjiwaigoru waunlo ara lelâ. <sup>9</sup> Tunwyune lelâlâ wâne âmaemo, tarâ onro wâgâ. Deus kaynonro olâ unwânmo kuru âgunimopyry. <sup>10</sup> Nhenimope lelâlâ wâne âmaemo, “Pymâ” myguehomo. Deus kaynonro olâ âwymârymo kuru. <sup>11</sup> Âduaymo tynrenseimbe-ro watay, imawyadâdâmo. <sup>12</sup> Koendonroem tawyly wâgâ aguewâni modo, tynrempa âiehoze. Koendonroem tawyly wâgâ aguedânry modo olâ, âdyren-honze —kely Jesus.

**Jesus ton-honre aguehobyry  
koendâ lelâ aini emyenro  
modoram**  
(*Mc 12.40; Lc 11.39-42,44,52;  
20.47*)

<sup>13</sup> Aituo Jesus aguely, Moisés inweniby wâgâ enomedâni modoram, fariseu domodoram warâ:

—Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendâ lelâ aini emyenro wâne âmaemo, koendonro aieni keba olâ âmaemo. Deus kaynonro âwymârymoem awyseba âmaemo; kurâ domodo iwymâryem idyseba warâ. Pyanta kadiadugue



(Mateus 23.1-12)

enahumbyryem xave soeni emyenro âmaemo, igawâmpyra mitomoem, tâgawândysedo modo mâenkaunânehomba mitomoem lâpylâ warâ.

<sup>14</sup>—Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro ara wâne amyguelymo, koendonro aieni keba olâ âmaemo. Pekodo pypâ modoram amyguelymo inanry: “Xinalâ ise âsejiguymo eni; tusonebama âmaemo” myguelymo. Isejiguymo âmaemoem mânhetomoem kulâ olâ mâenokudylymo. Deus agâ amyguedaymo, imeâgâemba kehoem amyguelymo, koendâ igaromoem kulâ. Awylygue ise Deus inagazedilymo, eagonro modo takaze kehoem.]

<sup>15</sup>—Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro wâne âmaemo, koendonro keba aieni olâ âmaemo. Taypa kehoem wâne mydâlymo, kâmayno einkâ kehoem akadylymo

warâ wâne mâinwânkylयोगे kurâdo enomedâze. Arâ amidilymo, aguipa kurâdo mâenomedâdomo tyeinwântoem, saguho tâzezewenry inmoly umelâ. Mâenomedâdomo einwânni modo inakanhe kehoem adâisemo-ro warâ, amânhekylymo takaze kehoem. Agâmolâ ise idâlymo peto nhântânry onwanji.

<sup>16</sup>—Âmaemo Moisés inweniby wâgâ enomedâni modo, fariseu domodo warâ toenzepa âsenagazeze âmaemo! Epy eagonro epy sakobâni ara kulâ âmaemo. Inanajimo, Deus ety oday ourugue xygatyby modo tywyneim kuru, Deus ety takaze. “Tâwâlâ ise Deus ety adakalaguely, auguehobyry agânhepyra urâ watay’ myguelymo-ro watay, tâwâlâ ‘Aiese urâ’ myguehobyry amânhepyra mawlymo. ‘Tâwâlâ ise Deus ety odano ourugue xygatyby modo âjimatywâdyly, auguehobyry agânhepyra urâ watay’ myguelymo-ro watay olâ, ‘Aiese urâ’ myguehobyry aietaungâ” warâ inanry mâenomedâdylymo. <sup>17</sup>Ândonro âmaemo. Epy emyenro âmaemo! Deus ety tywyneim kuru, iodano modo takaze. Mârâ ioday awylygue kulâ awârâ modo iwynu. <sup>18</sup>Inanajimo, awârâ Deusram xuduypy tywyneim kuru, mesa Deusram xuduypy ekanâdo, altar takaze. “Tâwâlâ ise altar inakanhe idyly, auguehobyry agânhepyra urâ-ro watay’ myguelymo-ro watay, tâwâlâ ‘Aiese urâ’ myguehobyry amânhepyra mawlymo. ‘Tâwâlâ ise Deusram kâundupy inakanhe idyly, auguehobyry agânhepyra urâ-ro watay’ myguelymo-ro watay olâ, ‘Aiese urâ’ myguehobyry aietaungâ” warâ mâenomedâdylymo. <sup>19</sup>Epy emyenro âmaemo! Deusram mâengamelymo âdy mâkeba mâkâ xurâem, ety odano mesa onwa mâenkanâdylymo iraynâ. <sup>20</sup>Awylygue altar iwogonro tynrense kurâ watay,

altar, iwogonro modo alelâ kiynrenkyly. <sup>21</sup>Deus, ety alelâ tywyneim. Deus ety tynrense kurâ-ro watay, alâpylâ Deus kiynrendyly. <sup>22</sup>Deus eydâ ato wâgâ aguykely watay, Deus wâgâ lâpylâ aguykely, mâkâlâ mawânkâ pymâ ton-honreim awâtârâ.

<sup>23</sup>—Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro kehoem âmaemo, koendonro aieni keba olâ. Dez âsejiguymo ewy, tokalâ inanry mâundulymo Deusram, Moisés inweniby agueho ara. Âpa ezano pyni ekubâzeândo ewy warâ inanry Deusram mâundulymo, hortelâ, erva-doce, cominho, awârâ modo. Âdankâba awârâ modo mâundulymo Deusram. Deus xurâem tywyneim kuru amânhepyra olâ minasemo. Âdypebaom, kaikânro modo warâ mâintyendaymba minasemo. Ioze lelâ amipyra, Deus mâinwâm-pyra âmaemo warâ. <sup>24</sup>Epy eagonro epy sakobâni emyenro âmaemo. Toenzepa kuru Moisés inweniby modo wâgâ kulâ mâtynanâdylymo; mârâ tywyneim kuru pylâ amânhepyra âmaemo-ro. Okumo ikano mazagâ mainguelymo, camelu pylâ monwonlymo-ro myara.

<sup>25</sup>—Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, koendonro aieni keba olâ âmaemo. Moisés inweniby ara amidyse mawylymo umelâ, inakanhe kulâ adâiselâ âmaemo tyewiâpazelâ warâ. Tâdâjitoguyly tâkeze minasemo, ize matomo mâenmakehomoem. Tâlâ wâne kopu, prato warâ ikaynâ lelâ nhagokely, ioday pylâ nagokeba waunlo emyenro âmaemo. Deus ize ato

ara adâjidyly mâuntuba olâ âmaemo. <sup>26</sup>Epy ara kulâ âmaemo, fariseu domodo. Deus ize ato ara lelâ aitaungâ. Aituomoma ise Deus tywykeba nhedylymo. Kopu koendâ sagokeyby ara ise âmaemo, kuoho, odaymo alelâ.

<sup>27</sup>—Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, koendonro aieni keba olâ âmaemo. Igueypy etadâdo emyenro âmaemo! Kuoho tywâkure kehoem tapekeingue iwâ-kudâdybyem awylygue, iodano olâ tâjibyry, tywângueim myara âmaemo. <sup>28</sup>Koendonroem mawyse mawylymo kulâ, koendonro mâkeba âmaemo, angahumo oday âunârymo inakanhe lelâlâ —kely Jesus.

**Koendonro emyenro, koendonro  
aieni keba olâ waunlo modo  
enagazeze Deus  
(Lc 11.47-51)**

<sup>29</sup>Jesus aguely:

—Âmaemo Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, aunlo keba olâ âmaemo. Deus itaumbryry egatuwânibyry modo eguepybyry etadâdobyry nhangatay tuhu iwâ-kuru kehoem ekanâni âmaemo. Torre iwâkuru kehoem aieni âmaemo, koendonro modo iguewâtyby enanâgueho. <sup>30</sup>Amyguelymo: “Tâlâ kurâ mârâ ume-ro watay, Deus emary modo kyânwâpyra tâise kurâ; kydamudo ara aguitaymba tâise kurâ” myguelymo.

<sup>31</sup>—Inakanhe mawylymo soense myguelymo wâgâlâ âdamudomo Deus emary modo xyârimpypy aralâ ânguydoem mawylymo mânehonlymo. <sup>32</sup>Alâ ise amidylymo âdamudomo aitobyry aralâ. Âmaemo ise akaemo aitobyry



takaze kuru inakanhe aini. <sup>33</sup>Âgâu tyewiâseim emyenro âmaemo! Âgâu poji iaduly ume âsemagueze kewâni emyenro kulâ âmaemo! “Âsemagueze kurâ” myguelymo wâne. Peto nhântânry onwanji idâze lelâlâ olâ âmaemo.

<sup>34</sup>—Urâlâ ise ywâgâ aguenri âyanmo igononi. Aguelymo, mâinwantageudyzeba olâ ise âmaemo. Akaemo ewy xyâze âmaemo. Akaemo ewy kruz onwa sakâjize âmaemo. Eagonro modo sapioguze âmaemo âtâ tâdâtâdyguyhodâ. Tâinkâ lelâba ise mâwinlymo, mâenagazedomoem. <sup>35</sup>Âadamudomo kurâdo koendonro modo nhâhobyry wâgâ âmaemo ise tânagazezeim. Abel, Adão imery, âdaityby mâkeba myakâwândy saguhoem âdyoim. Alâ myakâwândy toenzepa âdaitânry modo âdyozesedyly. Xypyryem xyâppy myakâwândy Zacarias, Baraquias imery, âdyoly Deus etydâ. Mesa Deusram xuduypy ekanâdo, Âji Tynrenseim Kuru warâ ontay myakâwândy âdyoly. <sup>36</sup>Idânârâ âadamudomo aitobyry modo wâgâ âmaemo xirâ umeno modo ise tânagazezeim. Xirâ mâuntudyzemo kuru wato —kely Jesus.

**Jesus Jerusalém domodo wâgâ toenzepa kehoem itywandobyry**  
(Lc 13.34-35)

<sup>37</sup>Ilâpygueduo Jesus aguely Jerusalém donro modo wâgâ, eydâmolâ waunlo ara lelâ:

—Âmaemo, Jerusalém donro modoram xirâ auguely. Iweâparoem, âjidadârymo donro modo Deus itaumbry egatuwânibyry modo xyâwânmomomy. Agui Deus ingonotaymby modo tuhugue tyâzemo myakâwâm. Arâlâ olâ toenzepa âwynedylymo. Aukuma wâne tymeombyry tawâry iaxi tydâtyguyze, tuan-hun-hoem, myarâ idânârâ nhedysemo wawyly. Agui olâ keankâ âmaemo

ewy yizepaom modo. <sup>38</sup>Deus odokezemo. Saguhoem wâne ani koendâ agâmo myarapa ise Deus. Âtâ sodokeyby ara ise âmaemo. <sup>39</sup>Ietondaymba ise âmaemo, “Koendonro lelâlâ âmâ, Deus Ingonotyby” yam myguelymo ara. Xirâ mâuntudyzemo kuru wato —kely Jesus.

**“Deus ety adakalagueoze” Jesus kehobyry**

(Mc 13.1-2; Lc 21.5-6)

**24** <sup>1</sup>Jesus xina agâlâ âxiguely Deus ety idaserayba. Tâtâday, Jesus iopaji idâppyem, xina aguely ani: —Egâ xirâ Deus ety! Iwâkuru kehoem xirâ! —xina kely.

<sup>2</sup>Aituo Jesus aguely:

—Arâ wâne awârâ Deus ety imâsedo mâendylymo. Adainhoze olâ awârâ. Idânârâ adakalagueoze. Angato inkâba ise awârâ tuhu modo; ihuguewâze awârâ onro onwa —kely Jesus.

**Jesus tâdâsenagazedily wâgâ aguehobyry**

(Mc 13.3-13; Lc 21.7-19)


<sup>3</sup>Ilâpyryem xina idâly iwyrâm, Se Oliveira Ekaram. Târâ Jesus ekadyly. Iopaji idâppyem xina nhapâiguely:

—Âdara kaise xypyry iwaguepa idyly, xina nhutuly? Âdy kaise inepa modopâdo odaxi itybyem awyly xina nhutuho? —xina kely.

<sup>4</sup>Jesus in-hoguly:

—Inanaynmolâ itaungâ, kodopâdo wâgâ ânguy inokubyramo itoem.

<sup>5</sup>Xypyry etaji idyly ume, toenzepa ise “Messias urâ, Deus Ingonotyby” kewâni modo. Toenzepa ise agueduomo âsenogudaynrim modo. <sup>6</sup>Tâinkâ lelâba âseguebylymo, âdyâwâdylymo warâ kely idase âmaemo. Tadahulizeba olâ itaungâ, awârâ modo egary mâindatuomo. Aise awârâ modo, âdypydâdo keba olâ ise. <sup>7</sup>Âkelo anano modo



(Mateus 24.1-2)

âdyâwâsemo; âjitanwebaom modo âdy-  
âwâsemo warâ. Tâinkâ lelâba ise onro  
âzekânily. Âtâ anakâ pyni peba ise.  
8Tâdâsenagazedily imâem isezedyly,  
pekodo âsenagazedily xigâlegueam  
tymery iazehoem ewânugue myara.

9—Yizepaom modo awâsemo,  
yeinwândylymogue, asemo pymâ  
modo enado. Toenzepa inagazenehon-  
zemo, âehonzemo warâ. Ynynonroem  
mawylymogue, toenzepa ise mâjie-  
wiâseolyo. 10Mârâ ume, toenzepa  
ise yeinwândyly imowâni modo,  
nâzenagazeoba tâitoem. Yeinwândyly  
imowânybyry modo, yeinwânni  
modo iewiâseze. Pymâ domodo ena-  
gazenehonzemo. 11Kurâdo enokuni  
modope ise. Warâ ise aguelymo:  
“Deus wâgâ aguenri xina” kezemo.  
Kewâdylymo kulâ olâ ise. Toenzepa  
kurâdo enokuzemo. 12Tâinkâ lelâba  
ise inakai modo awyly. Awylygue ise  
ânguy tagonrodo niwynebyra awyly.  
Peto wâneam tyântoem âdiempa tâise,  
myara ise kurâdo âpynedyly adainly.  
13Idânârâ awârâ emawânibyry  
modo olâ âsemagueze. Aunloenlâ ise

Deus agâ awylymo. 14Tâinkâ lelâba  
ise unâ iwâkuru sani idâly. Deusgue  
tywymâgu wâgâ aguelymo ise. Xirâ  
modopygueduo ise kodopâdyly —kely  
Jesus.

**Jesus Jerusalém adainholy wâgâ  
aguehobyry**

(Mc 13.14-23; Lc 21.20-24)

15 Jesus aguely:

—Âepanâgueze Deus izepaom kuru,  
mâkâ inakai kuru. Jerusalêmdâ  
ise âepanâguely, Deus ety oday,  
Deus unâry egatuim Daniel iwâgâ  
aguehobyry. (Xirâ itainwâni modo  
xutuze, âdara keze aguely awyly.)  
16Mâkâ inakai Jerusalêmrâm saintuo,  
âmaemo Judêia donro modo iwyram  
âwientaungâ, otoenze. 17Inepa  
kehoem âwientaungâ. Itymo inatay  
âmaemo watay, tâwânseba itaungâ  
itymo odaji, âdylâ ese. 18Âpa ezay  
âsewanize mataymo, inepa âwien-  
taungâ. Itymo mâungukehomo ese  
todopâzeba itaungâ. 19Toenzepa  
âsenagazeze pekodo modo ioday  
tymegueim, tuhuazeim modo warâ.

Tahule âwienniembamo mawânkâ ise.  
<sup>20</sup>Deusram ekadaungâ, kopâ umepa, tâzekobyzegueho odaypa warâ, xirâ tâdâsenagazedo saindyly itoem, inepa tâdâwientoem nudupa ise.

<sup>21</sup>—Ton-honre ise awârâ tâdâsenagazedily saindyly. Deus onro nhugutobyryenlâ arâ kehoem tâdâsenagazedily peba awyly. Anitombrya ise-ro warâ xirâ emyenro kuru. <sup>22</sup>Deus olâ mârâ tâdâsenagazedo epagunâze, aisezedily lelâ waypa itoem. Aypa watay, ânguy nemaenwâbyra tâise; idânârâ tadainze. Tynynonroem tinduakeyby modo wâgâ olâ Deus anhedily ise —kely Jesus.

<sup>23</sup>—Kodopâdo xutuze âmaemo, ânguy âdakepalâ. Awylygue, “Anra merâ Messias” kely mâindatuomo, kâzeinwântaundâ. “Awâtârâlâ awâkâ Messias” kely mâindatuomo, kâzeinwântaundâ warâ. <sup>24</sup>Mârâ ume toenzepa ise konokuni modo. “Deus Ingonotyby urâ” kezemo, kurâdo enokuze. “Deus keankâ ugononi, xunârybyry egatuze” kewâni modope lâpylâ ise, kurâdo enokuze. Adyesenry modo kehoem aiesemo, kurâ domodo iomazeâni aiesemo lâpylâ warâ. Idânârâ enokuze kezemo; Deus induakewâdyby modo enokuze kezemo lâpylâ, akaemo olâ ise nâzenokuoba.

<sup>25</sup>—Inanaynmolâ itaungâ. Âurudylymo olâ waunroenlâ, mârâ ume mâzenokuoba mitomoem. <sup>26</sup>Ânguylâ, “Egâ. Messias naintai. Poji anaym mâkâ” kely-ro watay, kâzeinwântaundâ. Uize tâtâzeba itaungâ, kodopâdaymba ise urâ ilâem. “Messias naintai. Âtâ oday notoendai” kely-ro watay, kâzeinwântaundâ. <sup>27</sup>Idânârâ kodopâdyly esemo. Ielu wâne kau wâgâ, âzehoruguely xixi egaseho eynynâ, egawânto eynynâ warâ idânârâ nhetomoem, myara

ise kodopâduo, idânârâ yaindyly nhedylymo. <sup>28</sup>Tywângueimpe atoram elaho modo âtâdyguuly, ânguy “Târâ igueypy” keduo inkâba. Arâ lâpylâ ise kurâdoram kodopâdyly âdutuoly, ânguy âdakepalâ —kely Jesus.

### **Uguondo Kaynâpa Âetyby odopâdo xutuho**

(Mc 13.24-27; Lc 21.25-28)

<sup>29</sup>Jesus aguely:

—Mârâ tâdâsenagazedily saka-bygueduo, xixi, nunâ warâ tohoreba ise. Ximukâ modo kau wâgâpa ihuguewâze. Kaynâ tyngataymby modo ihugueânze Deus. <sup>30</sup>Ilâem ise kau oday âpanâguely urâ Uguondo Kaynâpa Âetyby kodopâdyly xutuho. Idânârâ nynâbaom modo mârâ tientuo, âseanezemo. Eunu duay ytâguuly esemo. Pymâem kuru wawylygue, toenzepa won-honru enehonze. <sup>31</sup>Târâ kaynâ trombeta idyen-honze urâ. Anju domodo igonose urâ, idânârâ âtâ anakâ Deus iduakeyby modo idâtygyuze, xixi egaseho eynynâ, egawânto eynynâ, norte eynynâ, sul eynynâ warâ —kely.

### **Jesus odopâdo xutuhobe ise**

(Mc 13.28-31; Lc 21.29-33)

<sup>32</sup>Jesus aguely:

—Inepa kodopâdyly awyly xutuhobe ise, iwaguepa kopâ ihugueho awyly xutuho ara. Etaungâ figueira. Iwatary modo ikuandaynly, sary ilusewâdyly warâ watay, tutuze âmaemo kopâ ume idily awyly. <sup>33</sup>Myara lâpylâ ise xirâ auguehobyry modo aidily adaguly mâentuomo, kodopâdo iwa-guepa awyly mâuntulylymo. <sup>34</sup>Aise xirâ âdydo imeom, idânârâ xirâ onro anano modo iguelymo iraynâ. <sup>35</sup>Kau, onro warâ adainze. Auguehobyry olâ ise nadaimpa, nâtugugueba warâ;

auñloenlâ ise. Xirâ mãuntudyzemo kuru wato —kely Jesus.

**Ohondybyem lelâ itaungâ, Jesus  
odopâdyly iraynâ**

*(Mc 13.32-37; Lc 17.20-37)*

<sup>36</sup>Jesus aguely:

—Kunwym Deus kulelâ xuturim kuru âdara kodopâdyly awyly, kopae atay, peto oday atay warâ. Ânguy xirâ anano nutuwâbyra. Anju domodo nutuwâbyra. Urâ Deus imerylâ kâuntuwâbyra urâ. <sup>37</sup>Noé umenobyry ara, arâ lâpylâ ise urâ Uguondo Kaynâpa Âetyby kodopâduo. <sup>38</sup>Saguhomem, paru inwenlygue tadainlymo iray, kurâdo xara tatomo aralâ mykâinane. Âwinduadylymo. Adakuilymo. Salokuzenomo modo, âwynsaundo modo warâ ohogüinlymo warâ myakâwândy aidylymo, Noé pepi imâsedo âtâ emyenro tyngatyby odaji âxiedyly iray. <sup>39</sup>Inepa iguein-em tawyly nutuwâbyramo myakâwândy. Deus olâ myakâwândy toenzepa kehoem kopâ tugonose idânârâ adain-homoem, myara lâpylâ ise agui kurâ domodo kodopâdyly nenuemyra awyly.

<sup>40</sup>—Kodopâduo, ynyonro modo sase urâ. Yynnâbaom modo olâ ise urâ kamyra. Ynyonro modo, yynnâbaom modo agâ on-hoan-ro watay, ynyonro modo lelâ ise taseim Deus eydâ atoam. Azagâ uguondo âpa ezay tâwaneim, ynyonro, yynnâbaom warâ watay, ynyonro adahoze Deusram, eagonro olâ âjionze. <sup>41</sup>Azagâ pekodo trigu sakoim, ynyonro, yynnâbaom warâ watay, ynyonro adahoze Deusram, eagonro olâ âjionze. <sup>42</sup>Ywânwântâlâ itaungâ. Mãuntuwâbyra âmaemo, âdara urâ Uguondo Kaynâpa Âetyby kodopâdyly awyly. <sup>43</sup>Âdara tâmagazeim

saindyly awyly nutuwâbyra âtâ sodo. Tutuze-ro watay, tânanaynlâ tâise, tysejiguy tienmakehoem. <sup>44</sup>Kodopâdyly tânuenzelâ itaungâ; inanaynmolâ lâpylâ itaungâ warâ. Ienuendylymo ume inkâba ise urâ Uguondo Kaynâpa Âetyby kodopâdyly. Xirâ mãuntudyzemo kuru wato —kely Jesus.

**Tâwaneim koendonro wâgâ,  
inakai wâgâ warâ Jesus unâ  
nhegatuhyory**

*(Lc 12.41-48)*

<sup>45</sup>Jesus aguely:

—Unâ segatuji wao, âdara kodopâdyly awyly mãuntuhomoem. Fazenda sodo taypa tâtâly iraynâ, tagâ tâwaneim tonomegueim, koendonroram watâkeze: “Udâly wao ise. Âmâ ise iety, ysejiguy, yagâ tâwanuneim modo warâ eni. Kopaelâgâembaba ise akaemo mãwandily. Âdy ize atomo âundugâ” tâkeze mâkâ eagâ ewano, tâtâday. Tâwaneim koendonro eagâ tâwano tânuenze myara ienuendaungâ. <sup>46</sup>Fazenda sodo aguehyory ara aidyly-ro watay, koendâ ise iwymâry eagâ awyly, todopâduo. <sup>47</sup>Tâmariam aguely ise: “Koendonro lelâ âmâ. Koendâ lelâ tâwanuneim modo medâ. Awylygue idânârâ ysejiguy modo eniem ise âmâ” kely. <sup>48</sup>Koendâ tâwaneim keba mâkâ watay olâ eagâ tâwano aguehyory ara anipyra. “Tahule nodopâdaymbe ise mâkâ sodo” kely tyangahu oday. <sup>49</sup>Adâkeduo, koendâ tagonro modo nepyra. Tapioguzemo. Âtydâ kulâ warâ. Âwinduadyly, adakuily, toku ikaji kehoem idyly toku ikano modo agâ warâ aidyly. <sup>50</sup>Mâkâ tâwaneim tynwânwândily umepa iwymâry saindyly. <sup>51</sup>Eagâ ewano mâkâ tâwaneim agâ tyewiâpaze,

tâdâsenagazedoram talehoze-ro warâ, Deus einwântânry modo âsenagazedoram. Ohogüenze, tyery saguze warâ tâsenagazedylgyue —kely Jesus.

**Jesus dez âwynsaundo wâgâ unâ nhegatuho byry**

**25**

<sup>1</sup>Jesus aguely:

—Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani kopae salokuzenomo ohogüin-ho etyry. Kuoho myani akaemo dez âwynsaundo modo mâkâ salokuzenomo enuenze. Lamparinague tâmatunemo myani. <sup>2-4</sup>Cinco lelâ myani akaemo âwynsaundo modo ewy tonomegueim. Tумыке myani tylamparinary nhadylymo, sapadondo warâ. Cinco âwynsaundo modo myani tonomegueim keba. Tумыке lelâ tylamparinary nhadylymo; sapadondo napyramo olâ myani. <sup>5</sup>Tahuleba idyly myani ohogüinrim. Aituo myani idânârâ âwynsaundo modo xuedunu iwynely, xkylymo.

<sup>6</sup>—Kuetâji xuagueânimo adaenkely: “Etaungâ! Ohogüinrim saindyly! Iotaungârâ” kely.

<sup>7</sup>—Aituo myani âwynsaundo modo xuaguewâdyly. Tylamparinary nhântybyem awyly nhedylymo, taseba awylygyue. Aituo tonomegueim modo nhapadylymo, nhemanâdylymo warâ. <sup>8</sup>Aituo myani akaemo âwynsaundo modo tonomeguenry aguely: “Âdiempa wao xina ilamparinary eoku ânduwâtaungâ. Xina ilamparinary nhâdyly olâ” kelymo.

<sup>9</sup>—Tonomegueim modo olâ en-hem kepa. Aguelymo myani: “Sapadondo xina nhenetyby nuduwâpyra âmae-

moem. Âlamparinarymo eoku ânâtaunda” kelymo.

<sup>10</sup>—Agueduomo myani akaemo tonomeguenry modo idâlymo tylamparinary eoku sanâse. Nodopâbyramolâ myani ohogüinrim saindyly. Akaemo tonomegueim modo myani ohondybyenlâ tawylygyue, eagâlâ egawândylymo âtyam. Warâ myani pyanta âzenahuoly, xavepe âieholly warâ.

<sup>11</sup>—Ilâpygueduo myani akaemo âwynsaundo modo tonomeguenry saindylymo. Ohogüinrinram adaenkelymo: “Yataen-ho! Yataen-ho! Xina egawântoem pyanta enahunguegâ” kelymo.

<sup>12</sup>—Ohogüinrim eyanmo aguely: “Kâenahungueba ise aze. Tarâpa itaungâ. Yataen-ho mâkeba âmaemo” kely. Warâ myani âwynsaundo modo, tonomegueim, tonomeguenry warâ aidylymo —kely Jesus.

<sup>13</sup>Warâ Jesus xinaram aguely:

—Inanaynmolâ itaungâ! Mâuntuwâbyra ise âmaemo âdara kodopâdyly —kely.

**Azagâ tokalâ warâ tâwaneim modo wâgâ unâ Jesus nhegatuho byry**  
(Lc 19.11-27)

<sup>14</sup>Jesus aguely:

—Unâ segatuji wao âdara Deus kaynonro kywymâryem lelâlâ idyly awyly mâuntuhomoem. Uguondo tydinherugueim âkelo âtâ anaxi tâtâly iraynâ myani tagâ tâwanuneim modo ingâsedyly. Eyanmo aguely: “Koendâne ysejiguy etaungâ. Dinheru xirâ âyanmo kâunduly. Imâem ienehewâdaungâne xirâ âyanmo kâundupy” kely myani. <sup>15</sup>Aiedyly nhutulymo aralâ olâ myani nhuduly, imâem nhetomoem. Saguhoram quinhtas

moedas ourugueto modo<sup>1</sup> myani nhuduly, nhatanoram duzentas moedas, azagâ tokalâ ietomoram, cem moedas warâ. Aitybyem myani idâly. <sup>16</sup>Mâkâ quinhentas moedas lelâ emakerimbyry âdydo imeom nhanâdyly, tyanâtyby vende nhedyly warâ myani mârâ dinherugue. Alâ imâem nhenehonly; mil moedas lelâ idyly. <sup>17</sup>Mâkâ duzentas moedas emakerimbyry, alâpylâ myani âdydo imeom nhanâdyly, tyanâtyby vende nhedyly warâ mârâ dinherugue. Alâpylâ dinheru imâem nhenehonly; quatrocentas moedas nhedyly. <sup>18</sup>Mâkâ cem moedas emakerimbyry olâ myani anipyra. Tâtagueim tâsagueze, dinheru tâpyâze warâ myani.

<sup>19</sup>—Iweâpa itybyem myani mâkâ dinheru sodo odopâdyly. Saintybyem myani tokalâ, tokalâ warâ tâmary modo ingâsedyly, dinheru âdanhetybymo awyly tiuntuhoem. <sup>20</sup>Saguhom kuru saini myani mâkâ quinhentas moedas emakerimbyry. Mil moedas myani nhuduly eagâ tâwanonra. Aituo myani aguely: “Pymâ, quinhentas moedas keankâ yam mâunduly. Âdydo imeom sanâdâ, kanâtyby vende xiedâ warâ, quinhentas moedas kânhetondoem. Anra, mil moedas lelâ âdinheruru” —kely.

<sup>21</sup>—“Koendâlâ myze amidâ!” kely myani iwymâry. “Koendonro âmâ. ‘Aiekâ’ uguehobyry amiendâ. Koendâmy awârâ âdiempa dinheru kâunduppy mewani. Âdydo imeom manâdâ, manâtyby vende miedâ warâ. Aituo, imâemba kâunduppy imâem

mânhenehon-hobyry wâgâ, imâem ise âmâem kâunduly. Yagâ âzetyguegârâ” kely myani iwymâry.

<sup>22</sup>—Ilâpyryem myani duzentas moedas emakerimbyry idâly. Aituo aguely: “Pymâ, duzentas moedas keankâ yam mâunduly. Âdydo imeom sanâdâ, kanâtyby vende xiedâ warâ âdinherurugue, duzentas moedas kânhetondoem. Anra xirâ quatrocentas moedas lelâ âdinheruru” —kely.

<sup>23</sup>—“Koendâlâ myze amidâ!” kely myani iwymâry. “Koendonro âmâ. ‘Aiekâ’ uguehobyry amiendâ. Koendâmy awârâ âdiempa dinheru kâunduppy mewani. Âdydo imeom manâdâ, manâtyby vende miedâ warâ. Aituo, imâemba kâunduppy imâem mânhenehon-hobyry wâgâ, imâem ise âmâem kâunduly. Âekâ. Yagâ âzetyguegârâ” kely lâpylâ myani mâkânra.

<sup>24</sup>—Aituo myani mâkâ cem moedas emakerimbyry idâly, aguely: “Pymâ, ânguy ityeni keba mawyly, tutuze urâ. Mâsewanihobyrygueba âdype midyly. Xina âsewanirim, âmâ pylâ xina ewanopyrygue âdypeon-ro. <sup>25</sup>Âytadâ, awylygue âdinheruru ondaxi sepyâdâ. Egâ, anra tarâ dinheru mâunduppy” kely.

<sup>26</sup>—Iwymâry eyam aguely myani: “Inakanhe tâwaneim, xynumi warâ myanze âmâ. Yam amyguely enra: ‘Mâsewanihobyrygueba âdype midyly. Xina âsewanirim, âmâ pylâ xina ewanopyrygue âdypeon-ro’ mygueanse. <sup>27</sup>Ydinheruru imâem itoem âdy amânhedyseba matay, dinheru xynanâdaynrim modoram metadânehondyze banco odaji. Imâem

<sup>1</sup> 25.15 Gregüem aguehobyry, cinco talentos, azagâ talentos, tokalâ talento warâ. Quinze anos lelâ kâwanu ebyry myani tokalâ talento. Awylygue, xuduppy toenzepa dinheru awyly, toenzepa lelâlâ. Setenta e cinco anos âsewanizeze tatobyry ebyry waunlo ara myani waunro nhemakely. Eagonro myani trinta anos âsewanizeze tatobyry ara. Tokalâ ieto uguondo myani quinze anos âsewanizeze tatobyry ebyry ara.

ydinheruru tyenehonze tâise akaemo. Arâ tâise kodopâduo imâem kâenmakely” kely. Aituo iwymâry aguely eagonrodoram: <sup>28</sup>“Merâ inakanhe tâwaneim emaymba moeda emakewâdaungâ. Mil moeda modopeonra xuduwâtaungâ” kely. <sup>29</sup>“Mâkâ toenzepa tâlânro, imâem emakeze, iwerâ tâlâ tato takaze. Mâkâ agui ipaom olâ, âzemaakeoze iwerâ aguipa tâlâ ato. <sup>30</sup>Iamu odaxi awâkâ tâwaneim inakai samewâdaungâ, toenzepa âsenagaze-doem. Ohogüenze, tyery saguze warâ awâkâ târâ tâsenagazedilygue” kely myani iwymârymo tonlo modoram. Warâ myani akaemo azagâ tokalâ warâ tâwaneim aidilymo —kely Jesus.

**Deus eynnonro, eynnâbaom modo warâ iduakeho**

<sup>31</sup>Jesus aguely xinaram:

—Pymâem kuru wituo ise kodopâdyly. Anju domodo agâ ise kâewyly. Yaimpygueduo, pymâ tynreim ekado wâgâ ise iekadyly. <sup>32</sup>Tâinkâ lelâba ise anju domodo adakobâdyly kurâdo idâtyguyze. Kaneru eni wâne, kaneru modo âikânra tyese kabra modo duaypa myara ise ynnonro modo âikânra âedylymo, ynnonro keba modo duaypa. <sup>33</sup>Yahoru eynnâ ise ynnonro modo kâenjitâdyly. Pâem eynnâ ise ynynâbaom modo kâenjitâdyly, tyguelâ itomoem. <sup>34</sup>Aituo ise yahoru eynnonro modoram auguely: “Yagâ âetaungâ, Deus xurâem tywyneim âmaemo. Deus idânârâ nhugudyly iraynâlâ myakâwândy, âmaemoem koendonro nhekanâdyly. Deusgue tywymâgueim modo xurâ tâlâ mâkâ, mârâ koendonro lelâlâ. <sup>35</sup>Koendâ lelâ ise Deus agâmo, koendâ yagâ mawylmogüe. Iewindy ume, uwamâmo. Yatuandyly ume, parugue yakuiwânmo. Itymo anakâ

kadakobâdyly ume, itymodâ ykyân-mâmo, utubamolâ. <sup>36</sup>Iety ywogonro muduwânmo, tâtyemba wawyly ume. Iewânmo ume, wonmâmo, Iewiânmo warâ, kua witoem. Kadeia oday watay, yam IU ise mydâwânmo, womazeânze” keze urâ ynnonro modoram.

<sup>37</sup>—Aituo ise koendonro modo yam aguely: “Pymâ, xina nutuwâbyra âda-keze amyguely awyly” kelymo ise. “Âdykâ tâty anaym xina nhetaymba ani. Inwindy ume xina âwapyra ani. Âdykâ xina akuiwâbyra, atuandyly ume. <sup>38</sup>Âykyândaymba lâpylâ warâ xina tâty oday. Tâtyemba mawyly ume, xina itydâdaymba ani. <sup>39</sup>Iwânmo ume, ontaymba, iweântaymba warâ ani xina, kua mitoem. Kadeia oday matay, omazeânze xina nâtâwâbyra ani” kezemo yam. <sup>40</sup>Warâ ise auguely eyanmo:

—“Ynnonro modoram pyini, paru, âtâ xykyhomo warâ muduwânmo. Ynnonro modo ewânmo ume, kadeia oday awylymo ume warâ, iomazeânze mydâwânmo. Ukono emyenro modo koendâ memâmo. Kaikânro modo, tâwaneim modo warâ koendâ mâendylymo-ro watay, urâlâ mâenkylymo” keze urâ yagonro modoram. Xirâ mâuntudyzemo kuru wato.

<sup>41</sup>—Warâ ise akaemo pâem eynnonro modoram auguely: “Ydâpa itaungâ, âmaemo Deus izepa ato modo. Inakanhe kehoem ise mâsenagazedilymo. Mârâ peto nhântânry Diabu ejidyem, eanjury kadopâ keho modo ejidyem warâ Deus anhetyby odaji idâze âmaemo. Âdara igasewâbyra ise âmaemo târâpa. <sup>42</sup>Koendâ inkâba ani iedylymo. Awylygue ise mâzenagazeolylo lâpylâ. Iewindy ume, uwapyra mataunaguynre. Yatuandyly ume, yakuiaba mataunaguynre parugue. <sup>43</sup>Itymo anakâ kadakobâdyly ume, itymodâ ykyâmbyra mataunaguynre.

Tâtyemba wawyly ume, iety ywogonro mâundupa mataunaguynre. Iewânu ume, wompyra, iewiâmpyra warâ mataunaguynre, kua witoem. Kadeia oday watay, yam IU ise mydâwâpyra mataunaguynre womazeânze” keze urâ nynâbaom modoram.

<sup>44</sup>—Warâ ise yam aguelymo: “Âdykâ nhetaymba xina. Awylygue ani koendâ tawyly tienehon-hoem xina aniempyra awyly. Inwindy ume xina âwapyra; atuandyly ume, xina akuiba, âdykâ xina agâ mipyra mawylygue. Tâtyram âykyânze xina apyra; ity owogonro xina nudupa, xina agâ mipyra mawylygue. Iwânu ume, kadeia oday mawyly ume warâ xina âyam IU nipyra, xina âutuba awylygue” kezemo yam.

<sup>45</sup>—Aituo ise auguely eyanmo: “Âdykâ kaikânro modo mâenmawyadâdaymba ani âmaemo. Akaemo mâenmawyadâdaymba âmaemo watay, urâlâ mâenmawyadâdyzeba matomo” keze urâ eyanmo. Xirâ mâuntudyzemo kuru wato —kely.

<sup>46</sup>—Akaemo yynâbaom modo idâlymo ise myarâ kurâdo inakai modo âsenagazedoram. Ynynonro modo olâ Deus agâ idâze aunloenlâ —kely Jesus.

**Jesus xyâly wâgâ aguehomobyry**

(Mc 14.1-2; Lc 22.1-2; Jo 11.45-57)

**26** <sup>1</sup>Waunroem aini modogue xina tienomedâbygueduo, Jesus xinaram agueondyly:

<sup>2</sup>—Tutuzelâ âmaemo, kopaelâgâbygueduo kâtyry Páscoa awyly, kydamudo Egitodâba âsemaguehomobyry etyry. Yizepaom modo yawânehonzemo, kruz onwa yakâjien-honzemo yiguehoem warâ. Warâ ise ayedylymo urâ Uguondo Kaynâpa Âetyby —kely xinaram.

<sup>3</sup>Aguehobyry ara kehoem aidyly. Kurâdo eynynâ Deus agâ aguewâni modo iwymârydo, kywymâry modo warâ Caifás ety imâsedo oday myani âtâdyguelymo. Caifás ani kurâdo eynynâ Deus agâ aguewâni modo iwymâry kuru. <sup>4</sup>Âjigüe aguelymo myani, âdara Jesus tientadânehonly, tyâen-honly warâ wâgâ. Kurâ domodo nhutudyzebamo olâ myani. Aituo myani aguelymo:

<sup>5</sup>—Koendâpa ise enra âty ume sawâdyly. Toenzepa ise kurâdo âzetygueni modo. Jesus etadâdobyry egary indadylymo watay, kagâ iewiâpazemo, âjigüeyzemo warâ —kelymo wâne myani.

**Pekodo Jesus nhangahu onwa uriza nhapâdobyry**

(Mc 14.3-9; Jo 12.1-8)

<sup>6</sup>Jesus agâ xina idâondyly âtâ anary Betanianra. Târâ tatay xina idâly Simão tâjimituguelygue tâwâneimpyry etyram. <sup>7</sup>Xina âwinduadyly ume, pekodo Jesus iopaji saindyly. Alabastrogue uriza etary xygatybygue tâmase; uriza tâwânseim nardogue tumyke ani mârâ. Uriza tyânângueim nhapâdyly Jesus nhangahu onwa. <sup>8</sup>Pekodo uriza nhapâdyly tientuo aidyly xina nehoguebyra. Aituo âjigüe xina aguely:

—Etaungâ! Awâkâ pekodo uriza tâwânseim alâ kulâ nhumedyly! <sup>9</sup>Awârâ uriza vende iedylylâ-ro watay, toenzepa tâise idinherugu. Koendâ tâise vende nhedyly, âdy pebaom modoram dinheru tiunduhoem —xina kely.

<sup>10</sup>Xina aguely xuturimbyryem olâ Jesus. Aituo xinaram aguely:

—Arâ adâkezeba itaungâ merâ pekodoram. Âwankuem kâietaundâ warâ. Koendonro merâ urâem anhekyly. <sup>11</sup>Aunlolâ ise âdy pebaom modope awyly mâenmawyadâdomoem. Urâ olâ ise âdiempa kulâ agâmo wawyly.



<sup>12</sup>Wonwa uriza tyânângueim niapâdai, yigueduo, ieguepybyry etadâdo odaji ietoem, wondyly ara. <sup>13</sup>Merâ anhe-tyby ânguy nenanânehonwâbyra ise. Âdykâlâ unâ koendonro egatuly watay, tânanâguezeinlâ ise merâ aitobyry. Xirâ mâuntudyzemo kuru wato —kely Jesus.

**Jesus tiengamehoem, Judas dinheru nhemakehobyry**  
(Mc 14.10-11; Lc 22.3-6)

<sup>14</sup>Aituo Jesus eynynonroem ityby ewy Judas xidadâ Queriole donro idâly kurâdo eynynâ Deus agâ aguewâni modo iwymârydoram, Jesus wâgâ agueze. <sup>15</sup>Aituo myani Judas aguely:

—Âdaraka ise iepywadylymo, Jesus âyanmo kêngameduo? —kely.

—Trinta moedas pratague ise ipy-wadyly. Anra —kelymo myani.

Aituo Judas dinheru nhemakely.

<sup>16</sup>Ilâpygueduo Judas âdara Jesus tiengamely awyly wâgâ âpaunzedyly.

**Jesus, “Ohondaungâ, Páscoa kientyguedoem” kehobyry**  
(Mc 14.12-21; Lc 22.7-13; Jo 13.21-30)

<sup>17</sup>Pão ioliho pebaom etyguedo adaguly ume Jesusram xina aguely:

—Âdykâka ise pyni iwâkuru xina anhenehondyze mawyly, xirâ Páscoa ume kydawinduatooem? —xina kely.

<sup>18</sup>Jesus in-hoguly:

—Jerusalémdâ ise kydwâwindua-dyly. Idâwâtaungâ wao myarâ. Mâkâ uguondo auguehobyry agâ oxioze âmaemo. “‘Alâ enra iweâma’ keanryze Konomedâni. Itydâ ise tynynonro modo agâ Páscoa nhetyguedyly, âwinduadyly warâ” kewâtaunda eyam —kely Jesus.

<sup>19</sup>Jesus aguehobyry ara aidylymo. Pyni modo adyenehonzemo myani, Páscoa xina nhetyguedoem.

<sup>20</sup>Iguampygueduo xina myarâ idâly Jesus agâ. Xina ekadyly tâwindua-

toem. <sup>21</sup>Xina âwinduatay Jesus aguely xinaram:

—Idataungâ wao. Tokalâ âmaemo ewy ise yizepanro modoram iegamerim —kely.

<sup>22</sup>Jesus agueduo xina itynwandyly. Mâkâ, mâkâ warâ xina aguely:

—Urâ mâkeba ise igamenri, Konomedâni! —xina kely.

<sup>23</sup>Aituo Jesus aguely:

—Âmaemo ewylâ olâ ise iegamerim, yagâ pão edawynrim modo ewylâ.

<sup>24</sup>Deus itaumbryry egatuwâni modo iweniwânmy ywâgâ: “Uguondo Kaynâpa Âtyby âdyoze” kely myakâwâm inweni-lymo. Aguehobyry ara ise awidyly. Toenzepa âsenagazeze olâ yizepanro modo emaxi iegamerimbyry. Niazepa wânkâ nidyze! —kely.

<sup>25</sup>Aituo egamenrianlâ adapâigueoly, Judasram:

—Yanlâ amyguely watay, Ienomedâni. Urâ mâkeba ise igamenri —kely.

Aituo Jesus in-hoguly:

Mâkadulylâ awârâ —kely.

**Kywymâry Jesus iguehobyry enanâgueho**

(Mc 14.22-26; Lc 22.14-20;  
1 Co 11.23-25)

<sup>26</sup>Tâwinduatay Jesus pão nhanâ-dyly. Deusram aguely:

—Koendonro âmâ, Pabai, xirâ pão mâundulygue —kely.

Aguenripyryem pão nhepajiwâdyly. Mâkânra, mâkânra warâ nhuduly. Aguely xinaram:

—Sawâtaungâ. Edawynwâtaungâ. Xirâ pão kêempajiwâdyby, wodolâ xirâ —kely.

<sup>27</sup>Ilâpyryem kopu vinhugue taseim tâmaxi nhedyly. Deusram aguely:

—Koendonro âmâ, Pabai, xirâ vinhu mâundulygue —kely.

Aguenripyrem, mâkânra, mâkânra warâ nhuduly, xina nhenyoem. Aituo aguely xinaram:

—Enywâdaungâ idânârâ âmaemo. <sup>28</sup>Unulâ xirâ. Tâunkeze ise yiguely, toenzepa kurâdo emakeze, inakanhe aitomobyry xygakeze. “Ynynonro modo emakeze urâ” Deus kehobyry mawânârâ. Awylygue ise unu tyapâze yigueduo, iwelo tâdâsemaguehobe Deus nhedyly. <sup>29</sup>Xirâ pygueduo, Pâscoa kâentyguedombyra, vinhu kâenyombyra warâ wao ise urâ agâmo, Pabai Deus eynynonro modo myarâ pymâem atoram saindylymo ara. Xirâ mâuntudyzemo kuru wato —kely Jesus.

<sup>30</sup>Âty âwanikebygueduo, xina igâtudyly Deus tionmaendoem. Igâtudybyem xina idâly iwy Se Oliveira Ekaram.

**Jesus Pedroram, “Azagâ tokalâ warâ, ‘Kâuntuwâbyra urâ awâkâ’ keze âmâ” kehobyry**

*(Mc 14.27-31; Lc 22.31-34; Jo 13.36-38)*

<sup>31</sup>Jesus aguely xinaram:

—Xirâ kopae idânârâ âwiense âmaemo. Wodokeze âmaemo. Deus itaumbry sawo wâgâ iwenibyem: “Kaneru sodo xyâduo, idânârâ eguy modo adapâeguyze” kewânmy Deus. Arâ ise ayedylymo. <sup>32</sup>Yigueduo, kurâem itonze olâ urâ. Kurâem witombygueduo, âwaynâmolâ ise udâly Galileiaram —kely.

<sup>33</sup>Agueduo myani Pedro aguely:

—Tâwâlâ wâne ise idânârâ odokelymo. Urâ olâ ise odokeba —kely.

<sup>34</sup>Jesus olâ warâ eyam aguely:

—Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely. Xirâ mâuntudyze wato kuru —kely.

<sup>35</sup>Pedro olâ agueondyly lelâ:

—“Jesus kâuntuwâbyra urâ” uguewâpyra ise urâ. Tâwâlâ ise agâlâ yâlymo. “Jesus kâuntuwâbyra urâ” uguewa olâ ise urâ —kely.

Idânârâ xina Jesus eynynonro modo aguely:

—“Jesus kâuntuwâbyra urâ” xina kepa lâpylâ ise —xina kely.

**Jesus Tunwym agâ Getsemanidâ aguehobyry**

*(Mc 14.32-42; Lc 22.39-46)*

<sup>36</sup>Xina saindyly âji Getsemaniram. Myarâ saintybyem Jesus xinaram aguely:

—Tarâlâ wao itaungâ, ikadaungâ warâ, Deus agâ agueze udâday —kely.

<sup>37</sup>Adâkebygueduo, Jesus Pedroram, azagâ Zebedeu imeombryram warâ aguely:

—Yagâ âetaungâ; akaemo modo lelâ ise taunlo —kely.

Aituo eagâ idâlymo iwague nekâ. Târâ myani toenzepa kehoem Jesus itywandily.

<sup>38</sup>Aituo myani aguely eyanmo:

—Toenzepa enra tytnru, yigueho ara kehoem. Tarâlâ wao itaungâ. Tykyzeba olâ itaungâ, yynâ Deus agâ amyguehomoem —kely.

<sup>39</sup>Âdiempa waunroem idâly myani. Târâ myani âzeguhoam idyly, Deus agâ adâkehoem:

—Pabai, toenzepa kuru kâsenagazedily warâ izepa wâne urâ. Ize wato araba olâ aidyse wawyly, ize mato aralâ —kely myani.

<sup>40</sup>Deus agâ agueypyem myani, Pedro, Tiago, João warâ âxiân-hobyryram idâly, xykylymo ume. Xuagueânimopyryem myani aguely Pedroam:

—Âmâ, agonrodo warâ âykylymo enra. Âdiempalâ yynâ Deus agâ amyguehomoem âykyba mitomoem nudupa kuru? —kely.

Aituo eyanmo aguely:

41—Nhaum, xuagueypyem lelá itaungâ, inanaynmolâ warâ. Satanás umohomoem aienehonze keze. Deusram ekadaungâ, Satanás ize ato amânhepyra mitomoem. Deus eon-honru peba kulâ yagâ tâdâ-senagazedily mâenmaenwâbyra ise âmaemo, yagâ mâsenagazedily mawilymo umelâ —kely myani Jesus.

42 Jesus idâondily âdiempa waunroem, Deus agâ agueonse:

—Pabai, idânârâ adyese âmâ. Toenzepa kuru kâsenagazedily warâ izepa wâne urâ. Ize wato araba olâ aidyse wawily, ize mato aralâ —kely.

43 Ilâpyryem myani odopâondily Pedro, Tiago, João warâ eydâ atoram. Xykyondybymoem awily nhedyly. Toenzepa myani xuedunumo, xuagueypyem lelá itomoem nudupa. 44 Jesus târâpa âxigueondily. Deus agâ agueonse idâly. Alâpylâ myani agueondily:

—Pabai, idânârâ adyese âmâ. Toenzepa kuru kâsenagazedily warâ izepa wâne urâ. Ize wato araba olâ aidyse wawily, ize mato aralâ —kely.

45 Ilâpyryem Jesus eagâ idâypy modo warâ odopâdilymo xina eydâ atoram. Xinaram Jesus aguely:

—Âykylymo kulâ enra. Inuzeba lelá mataunaze, Deus agâ amyguehomoem. Alâ! Iweâ lelâlâ yizepaom modo emaxi

âduduoze urâ. 46 Autaungâ. Inoro, eagâmo kydoxioda. Etaungâ! Awâkâlâ iegamerim saindily —kely.

### Jesus nhawâtomobyry

(Mc 14.43-52; Lc 22.47-53;

Jo 18.3-12)

47 Jesus aguely ume Judas saindily. Jesus eynynonrolâ kâinane mâkâ. Toenzepa kurâdo eynynâ Deus agâ aguewâni modo iwymârydo ingonotaymby modo, kywymârydo ingonotaymby modo warâ Judas agâ saindilymo. Espadague, segue warâ tâmatune kehoem saindilymo, Jesus sawâse. 48 Taindilymo umelâ myani Judas eyanmo aguely:

—Uguondo konhonuguguly, mâkâlâ ise mâkâ, Jesuslâ. Tâwâlâ ise manwâdilymo —kely.

49 Aituo Judas saindily Jesus iopaji, aguely:

—Âdapalâ wâne, Pymâ? —kely.

—Âdainkâba urâ —kely Jesus.

Aguenripyryem Jesus iwaparydâ nhonugudyly; tataen-ho agâ adâito ara nhedaenkuly.

50 Jesus eyam aguely:

—Yataen-ho, inepa aiese mâetobyry aiekâ —kely.

Aituo Judas agâ idâwâtyby modo Jesus nhawâdilymo, nhemakâjilymo warâ.



(Mateus 26.36-46)

<sup>51</sup>Xina ewy tydahoru imâsedo ety odayba tâtyze ani. Kurâdo eynynâ Deus agâ aguewâni modo iwymâry kuru agâ tâwaneim iwantazagâmâ.

<sup>52</sup>Aituo eyam Jesus aguely:

—Adâiseba ikâ. Âdahoru eka-nângâ. Tutuzelâ âmâ, “Espadague âsegebyby, espadaguelâ ise âdyoly” kely. <sup>53</sup>Kâsemaguehoem âmâ, uguewâpyra urâ. Pabairam tâise kâenkadyly kâsemaguehoem. Inepa tâise toenzepa kehoem anju domodo ingonodyly iemakeze. <sup>54</sup>Deus itaumbry awo wâgâ inwenibyem olâ ara âsenagazieniem wawly. Anju domodo kâingâsedly watay, iwenihobry aguehobry araba ise awidyly —kely Jesus mâkâ aienibryam.

<sup>55</sup>Ilâ ume Jesus aguely kurâdo tawâse idâypy modoram:

—Espadague, segue warâ tâmase kehoem yawâse mâewylymo, tâmagazeim urâ-ro waunlo ara. Yawâtomo tuduzelâ keankâ saguhoem, kyâho pebalâ. Kopaëlâgâembaba keankâ Deus ety idaseray, agâmo agueze wawly. Târâlâ yawâpyra olâ mataunaguynre. Yawâto odayba awylygue keankâ ilâenlâ yawâpyra mawlymo. Tâwâlâ yawâtaungâ lelâ, âdaitybyemba wawly umelâ. <sup>56</sup>Arâlâma Deus itaumbry egatuwâni modo ywâgâ inwenibyem awyly Deus itaumbry awo wâgâ —kely Jesus.

Jesus sawâtuo, idânârâ xina eagonropyro modo nhodokely. Xina âwiendlyly.

**Jesus judeu domodo  
iwymârydoram satobry**

(Mc 14.53-65; Lc 22.54-55,63-71;

Jo 18.12-14,19-24)

<sup>57</sup>Ilâpygueduo Jesus nhadylymo kurâdo eynynâ Deus agâ aguewâni modo iwymâry kuru Caifás etyram.

Idânârâ pymâ tynruneim modo târâ âtâdyguybyem awylymo. Kurâdo eynynâ Deus agâ aguewâni modo iwymârydobe, Moisés inweniby wâgâ enomedâni modo warâmo myani târâ, idânârâ uguondo modo tynrenseim modope warâ. <sup>58</sup>Myarâ idâdaymo myani âgânâ kehoem Pedro idâly, Caifás ety idaseraji. Tâgawânse, tâkaze warâ myani akaemo guarda domodo agâ, âdara Jesus nhedylymo tientoem.

<sup>59</sup>Kurâdo eynynâ Deus agâ aguewâni modo iwymârydo, kywymâry modo, kurutaynrim modo warâ, âdara Jesus tienwentâdo wâgâ aguelymo myani. Mâkâ wâgâ âdalâ kulâ aguenri nhuinlymo warâ, âdy wâgâ tiân-homo awyly tiuntuhoem. <sup>60</sup>Akaemo pymâ domodoem olâ myani âdy ewentâdo peba, iwâgâ aguewâni modo kewâdyly kulâ awylygue. Ilâpyryem myani azagâ uguondo saindyly pymâdo enadoram. Jesus ewentâze kewâdylymo kulâ olâ myani. <sup>61</sup>Warâ aguelymo:

—Jesus aguehobry tindatyby ise xina nhegatyly. “Deus ety sakalagueze urâ. Azagâ<sup>m</sup> emedyly idyly ara saunâtonze olâ urâ” kely, xina nidadâ —kelymo myani, Jesus tienwentâdomoem.

<sup>62</sup>Aguelymo idanipyryem, kurâdo eynynâ Deus agâ aguewâni modo iwymâry kuru saudyly. Jesus nhapâiguely: —Âwâgâ aguelymo midatailâ. Âkealâ, âkealâba iwentâdomo awyly ise amygueho? Âdamyguepaka ise âmâ mâsemaguehoem? —kely.

<sup>63</sup>Âdakepa olâ myani Jesus tâsemaguehoem. Aituo myani kurâdo eynynâ Deus agâ aguewâni modo iwymâry kuru nhapâigueondyly:

—Messiaslâka âmâ, Deus Ingonotyby? Deus iguedânry imerylâka

<sup>m</sup> 26.61 Nota de pé Mateus 12.40dâ egâ.

âmâ? Âkealâ xinaram mâengatuba  
âmâ-ro watay, âsenagazeze âmâ —kely.

<sup>64</sup>Aituo Jesus in-hoguly:

—Mâkâlâ urâ, amygueho aralâ.  
Xirâpygueduo ekadybyem ise urâ  
Deus ton-honreim ahoru eynynâ. Eagâ  
ise pymâem wawyly. Eunu duay ise  
Deus eydâpa kêawlyly. Xirâ mâuntu-  
dyzemo kuru wato —kely Jesus.

<sup>65</sup>Toenzepa kehoem kurâdo eynynâ  
Deus agâ aguewâni modo iwymâry  
kuru iewiâpadyly “Deus imerylâ urâ”  
Jesus kely tindatuo. Tyewiâkygue tâty  
tywogonrolâ nhaunguely. Pymâdo  
târâ âtâdyguyby modoram aguely:

—Deus nunâguedai merâ Jesus.  
Deus agâ âzekiba tawylылâ agueho,  
“Deus imerylâ urâ” keduo. Ânguy kin-  
gâsedaymba ise kurâ, ewentâniem.  
Midataimolâ Deus wâgâ aguely.  
<sup>66</sup>Âdara iedylyka inanjimo inakanhe  
kehobyry wâgâ? —kely.

Aituo pymâ domodo aguely:

—Uguondo inakai kulâ awâkâ! Xyâly  
lelâ! —kelymo.

<sup>67</sup>Agueypyem emydy onwa KUITÚ  
kelymo, nhapiogulymo warâ. Jesus  
nhenuahulymo, tiampioguhomem.  
Sapiogunrimbyryem, aguelymo:

<sup>68</sup>—Ânguyka apiogurim? Apio-  
güimbyry xutugâ, âkealâ kuru Deus  
Ingonotyby matay —kelymo.

**Pedro, “Jesus kâuntuwâbyra urâ”  
kehobyry**

(Mc 14.66-72; Lc 22.56-62;  
Jo 18.15-18,25-27)

<sup>69</sup>Jesus pymâdo enado atay, Pedro  
târâ taseraylâ myani. Pekodo târâ  
tâwaneim ewy Pedro einkâ sakadyly.  
Koendâ kehoem enipyryem aguely:

—Jesus Galiléia donro eynynonro  
modo ewylâ âmâ —kely.

<sup>70</sup>Aituo myani kurâdo enanaym  
Pedro aguely:

—Mâkâ mâkeba urâ! Kâuntuwâbyra  
urâ awâkâ! Ânguyka awâkâ Jesus,  
iwâgâ amyguehomo? —kely.

<sup>71</sup>Agueypyem myani taseraji tâdâ-  
wânto iwyantaji Pedro idâly. Eagonro  
pekodo târâ tâwaneim modo ewy,  
Pedro tientuo, tydâ iwaguepanro  
modoram aguely myani:

—Jesus Nazaré donro eynynonro  
ewy awâkâ uguondo —kely.

<sup>72</sup>Mâkâ pekodo aguely tindatuo  
myani Pedro agueondyly:

—Âdykâ Jesus eynynonroem  
witaymba urâ. Kâuntuwâbyra urâ  
awâkâ. Tâwâlâ ise Deus ienagazenehonly,  
uguewâdyly kulâ-ro watay —kely.

<sup>73</sup>Ilâpyryem myani uguondo modo  
ewy Pedro iopaji saindylymo.

—Jesus eynynonrolâ âmâ. Tutuze  
xina, Galiléia donro mawyly, earamo-  
lâma amyguely —kelymo.

<sup>74</sup>Aituo myani Pedro agueondyly:

—Mâkâ mâkeba urâ! Kâuntuwâbyra  
urâ awâkâ uguondo! Tutuze Deus  
âkealâ auguely awyly. Tâwâlâ ise  
Deus ienagazenehonly, uguewâdyly  
kulâ-ro watay —kely. Pedro.

Aguely umelâ myani aukuma  
igâtudyly. <sup>75</sup>Tindatuo, Pedro Jesus  
tyam aguehobyry nhenanâguely,  
“Xirâ kopae, aukuma igâtudyly  
iraynâ, azagâ tokalâ warâ ise ‘Jesus  
kâuntuwâbyra urâ’ myguely” keho-  
byry. Aguehobyry tienanâgueduo  
myani toenzepa Pedro itynwandily.  
Târâpa âxiguely. Tâjityenze kehoem  
eogumadyly.

**Pilatosram Jesus satobyry**

(Mc 15.1; Lc 23.1-2; Jo 18.28-32)

**27** <sup>1</sup>Emetybyem idânârâ akaemo  
kurâdo eynynâ Deus agâ  
aguewâni modo iwymârydo, pymâ  
judeu domodo iwymârydo warâ  
âatunâguedylymo, âdara kuru Jesus

tyâen-honlymo awyly tiuntuhoem. <sup>2</sup>Tonlo guarda modoram nhekâjien-honlymo, nhaleholymo, nhegamehonlymo warâ Pilatosram, pymâ Romadâpa ingonotybyram.

### Judas âdyâhobyry

(At 1.16-19)

<sup>3</sup>Judas, Jesus egamenribyry, pymâdo Jesus tiân-homoem aguelymo tientuo, toenzepa kehoem âjityendyly, pymâdoram mâkâ tiengamehobyry wâgâ. Awylygue myani kurâdo eynynâ Deus agâ aguewâni modo iwymârydoram, kywymâry modoram warâ idâly. Mârâ trinta moeda sopâze kely mâkâ tiengamehobyry ebyry. <sup>4</sup>Eyanmo aguely:

—Inakanhe lelâlâ awidâ; mâkâ uguondo âdaityby keba kulâ sawâneho —kely.

Aituo eyam aguelymo:

—Awârâ tiuntudyze inkâba xina. Âmâ inakanhe aini, xina mâkeba —kelymo.

<sup>5</sup>Agueduomo, Judas mârâ dinheru nhamely Deus ety odaji. Dinheru sameimbyryem, idâly okogâjize.

<sup>6</sup>Akaemo kurâdo eynynâ Deus agâ aguewâni modo iwymârydo mârâ moeda pratagueto sanânibyryem, aguelymo:

—Xirâ dinherugue keankâ uguondo xyâhoem epywadyly. Awylygue ise Moisés inweniby eynynâ, Deus ety oday kienwanipa kydawyly —kelymo.

<sup>7</sup>Aituo âtunâguedybyem, mârâ dinherugue onro nhanâdylymo. “Âdydo imeom onrogoe xygato” kehobyry. Mârâ onro nhanâdylymo judeu keba modo igueypy etadâdoenlâ. <sup>8</sup>Jesus iguehoem egamehobyry ebyrygue sanâtyby awylygue,

“Xyâhoem egamehobyry ebyrygue sanâtyby” kelyguelâ mârâ âji ezeku iwerâ. <sup>9</sup>Aguewânlâmy Jeremias, Deus eynynâ agueypy”: “Trinta lelâ moeda pratagueto nhemakelymo. Israel iweom ‘Warâ ise ebyryem kiunduly’ kehobyry” kewâm. <sup>10</sup>Mârâ dinheru tienmakeybygue, âdydo imeom onrogoe xygato ejidy nhanâdylymo. Warâ myani aidylymo, Kywymâry Deus aguehobyry ara tâkeze myakâwânmy Deus eynynâ agueim.

Warâ myani Judas mârâ dinheru, Jesus tiengamehobyry ebyry anhedyly.

### Jesus Pilatos enado satobyry

(Mc 15.2-5; Lc 23.1-5; Jo 18.33-38)

<sup>11</sup>Jesus XYDYK warâ, mâkâ pymâ Romadâpa ingonotyby, Pilatos enado. Pilatosram adapâigueoly:

—Judeu domodo iwymâry kuruka âmâ? —kely.

Jesus in-hoguly:

—Mâkâlâ urâ, amygueho ara —kely.

<sup>12</sup>Akaemo kurâdo eynynâ Deus agâ aguewâni modo iwymârydo, kywymâry modo warâ tâwentâduo, âdakepa olâ Jesus.

<sup>13</sup>Pilatos aguely Jesusram:

—Akaemo iwentâdo midatailâ. Amyguehonly mâin-hogubaka ise âmâ? —kely.

<sup>14</sup>Jesus olâ âdakepa. Toenzepa kehoem Pilatos âseguâdâdyly, Jesus tâsemaguehoem âdakepa awylygue.

### “Nigue lelâ awâkâ Jesus” Pilatos kehobyry

(Mc 15.6-15; Lc 23.13-25; Jo 18.38-19.16)

<sup>15</sup>Páscoa etyguedyly ume, aunlolâ mykâinane Pilatos etadâdyby modo ewy

<sup>27.9</sup> Zacarias 11.12-13 warâdâ aguely. Zacarias myakâwândy agueim. Judeu domodo xurâem olâ idânârâ Deus xunâry egatuwâni modo inweniby Jeremias aguehobyryem lelâ nhutulymo.

tokalâ nhetaguehonly, âdaunlolâ kurâdo nhekadybylâ. <sup>16</sup>Ilâ ume tâlâ myani uguondo kadeia oday tâtagueim, kurâ domodo nhutuly, Barrabásgue tâzekeim. <sup>17</sup>Aituo kurâdo âtâdyguuly, Pilatos ety iwyantay. Pilatos eyanmo aguely:

—Ânguyka kâentaguedyze matomo, [Jesus] Barrabás keho, Jesus Messias keho Deus Ingonotyby? —kely.

<sup>18</sup>Tâsewânilygue kulâ akaemo judeu domodo iwymâry, Jesus tyam nhegamely awyly, tutuze olâ myani Pilatos. <sup>19</sup>Pilatos târâ tribunaldâ ekadybyem awyly ume myani iwidy âjitaumbyguely eyam.

—Jesus âdakâiedâ. Koendonro awâkâ uguondo. Âdy inakanhe anientaymba awâkâ. Kopae eagâ kâji-âensedai. Toenzepa kâsenagazedai eagâ kâjiâensedobryr wâgâ —kely.

<sup>20</sup>Akaemo kurâdo eynynâ Deus agâ aguewâni modo iwymârydo, kywymâry modo warâ toenzepa kurâdoram aguelymo.

—Barrabás nhetaguehoem eka-daungâ Pilatosram. Jesus xyâhoem ekadaungâ-ro warâ —kelymo.

<sup>21</sup>Ine warâ myani Pilatos kurâdoram agueondyly:

—Âdykonlo uguondoka kâentaguehondyze matomo? —keondyly.

Aituo in-hogulymo:

—Barrabás! —kelymo.

<sup>22</sup>—Âdakânhedyly pylâka ise merâ Jesus, Messias, Deus Ingonotyby? —kely myani Pilatos.

Idânârâ kehoem in-hogulymo:

—Kruz onwa sakâjien-hongâ, iguehoem! —kelymo.

<sup>23</sup>—Âdaituo? Ienanaji, âda nitaymba merâ iguehoem —kely Pilatos.

Agueduo olâ idânârâ adaenkelymo ton-honre kehoem:

—Kruz onwa sakâjien-hongâ, iguehoem! —keondylymo.

<sup>24</sup>Tutuze olâ Pilatos, aguiom kurâdo tunâry nugukeba awyly. Tutuze lâpylâ, akaemo tagâ iewiâpadyly, aguehomo-bryr ara anipyra-ro watay. Aituo tâzemaunguehoem paru nhenenehonly. Enanaynmo âzemaunguely, tâwentâzeba tawyly tienehon-hoem. Eyanmo aguely:

—Urâ keba ise âsenagazeni merâ uguondo iguehobryr wâgâ. Âmaemo ise tâwentâzeim, mâyâen-hohomobryr wâgâ —kely.

<sup>25</sup>Idânârâ kurâdo aguely:

—Xinalâ ise tâwentâzeim awâkâ iguehobryr wâgâ, xina, xina imeom-bryr, xina iweompyry alelâ —kelymo.

<sup>26</sup>Aituo Barrabás nhetaguehonly, nhekadomobryr ara. Ilâpyryem myani Roma donro sodadu domodoram aguely:

—Jesus sapioguwâdaungâ. Ilâpyryem ise mandylymo, kruz onwa sakâjize-ro warâ, iguehoem —kely.

#### Sodadu domodo Jesus âwankuem nhetobryr

(Mc 15.16-20; Jo 19.2-3)

<sup>27</sup>Ilâpyryem sodadu domodo Jesus nhadyly palaciuram, Pilatos etyram. Idânârâ târâ sodadu modo âtâdyguulymo myani. Jesus tuontaji nhedylymo, âwankuem tientomoem.

<sup>28</sup>Jesus etygueimbyryem, âtâ BOH waunlo tapabileingue nhetydâdylymo, pymâ âzetydâdo ara, âwankuem tientomoem. <sup>29</sup>Tyguyreim koroaem xygatyby myani mâkâ nhangahu onwa nhekylymo. Aho eynynâ segue nhematâdylymo, pymâ ara. Enado âzeguhoam idylymo, pymâ enado adâitomo ara. Eyam aguelymo:

—Tynrenseim âmâ, judeu domodo iwymâry kuru! —kelymo, âwankuem nhedylymo.

<sup>30</sup>KUITÚ kelymo nhonwa, segue nhangatainlymo warâ. <sup>31</sup>Âwankuem

ienipyryem âtâ BOH waunlo tapabileim Jesus wâgâpa nhetylymo. Ety iwogonropyryguelâ nhetydâdylimo. Ilâpyryem nhadylymo, kruz se xygatyby onwa sakâjize.

**Jesus kruz wâgâ iguehoem sakâjihobyry**

(Mc 15.21-32; Lc 23.26-43;  
Jo 19.17-27)

<sup>32</sup>Xidadâ odaypa tâgasedaymo, uguondo Simão agâ oxiodylimo. Xidadâ Cirene donro myani mâkâ. Aituo myani, sodadu domodo kruz Jesus tiankâjiho eyam nhanânehonlymo. <sup>33</sup>Golgotaram myani Jesus nhadylymo. (Iwy Calvariogue tâzekeim lâpylâ, tâjian-gahubyry ara enurunugue.) <sup>34</sup>Târâ myani vinhu tâzenukuru agâ ietybygue sakuize kelymo. Ekunibyryem myani tienydyzeba idyly. <sup>35-38</sup>Aituo kruz onwa nhakâjilymo. JESUS MERÂ, JUDEU DOMODO IWYMÂRY KURU kely iweniby sakâjiwânmony Jesus nhangawaym kruz wâgâ. Âdaituo Jesus nhakâjilymo awyly xutuhoem myani mârâ anhedylimo. Ilâem lâpylâ azagâ tâmagaduneim modo nhakâjilymo. Tokalâ Jesus ahoru eynynâ, eagonro pâem eynynâ warâ nhakâjilymo. Sakâjirimbyryem, Jesus ety iwogompyry nhepajiwâdylimo. Dadu nhamelymo ânguy, ânguy warâ Jesus ety iwogompyry emakeim awyly tiuntuhomoem. Aitybyem ekadylymo, akaemo azagâ tokalâ warâ kruz onwa sakâjiwâdyby ânguy nyanâbyra itoem.

<sup>39</sup>Tâinkâ sakadaynrim modoram âwankuem âieholy. Angakânilimo, inwykelymo warâ.

<sup>40</sup>—“Deus ety sakalagueze urâ” myguema. “Azagâ emedyly” idyly ara kulâ saunâtonze urâ” mygue warâ.

Ton-honreim lelâlâ matay, tâwâlâ âsemaguegâ! Deus imery âmâ watay, kruz wâgâpa âytâguygâ! —kelymo.

<sup>41</sup>Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, kywymâry modo warâ âwankuem nhedylymo. Aguelymo:

<sup>42</sup>—Âkelomo nemake, tâwâlâ nâsemagueba olâ! Israelita domodo iwymâry lelâlâ-ro watay, iweâ lelâlâ kruz wâgâpa nytâguy. Xytâguyly-ro watay, einwânse kurâ. <sup>43</sup>“Deus imery urâ” nygue. “Deus ietâ” nygue warâ mawânkâ. Âkealâ kuru-ro watay, Deus kruz wâgâpa xytâguyânze âese iweâ lelâlâ! Deus tâense watay, nemake pylâ! —kelymo, âwankuem nhedylymo.

<sup>44</sup>Akaemo azagâ tâmagaduneim modo eagâ sakâjiwâdyby modoram âwankuem âieholy lelâ lâpylâ.

**Jesus iguehobyry**

(Mc 15.33-41; Lc 23.44-49;  
Jo 19.28-30)

<sup>45</sup>Kuotatay idânârâ iamadyly; azagâ tokalâ warâ horas ani iamu. <sup>46</sup>Azagâ tokalâ horas ituo myani Jesus adaenkely:

—*Eli, Eli, lemá sabactani?* —kely. (“Pabai, âdaituoka wodokely?” keze aguely.)


<sup>47</sup>Tonlo modo, koendâ nidapyra tawylygue, Elias ingâsedylly ara nhenehonlymo, Deus eynynâ ageuim lâpylâ mykâinane mâkâ. Aituo aguelymo:

—Idataungâ. Elias ingâsedylly tâmakehoem —kelymo.

<sup>48</sup>Akaemo ewy egatudyly myani vinhu nhewantybygue esponja ikuize. Tinkuibygueduo se iopiry onwa nhakâjily. Jesus nhugakâin-hoem wâne nhuduly.

° 27.40 Nota de pé Mateus 12.40dâ egâ.





(Mateus 27.35-44)

<sup>49</sup>Eagonro modo eyam aguely:

—Ine wao. Elias awâkâ ingâseguyly. Elias emakeze âewyly kyzene wao —kelymo.

<sup>50</sup>Aituo Jesus adakenkeondyly ago kehoem, tyiguehoem kuru. Ipa kuru idyly.

<sup>51</sup>Iguely ume kehoem myani, Deus ety oday Deus Âepanâgueho xuahuho tyxieim iotagâ adauguely kaynonrobyryem, on-yam; Deus, kurâdo agâ tygue ito myani mârâ xuahuru. Ton-honre kehoem onro âzekâ-nily. Tuhu imâsedo modo tatuwâze myani. <sup>52</sup>Onro âzekâniduo, âguedy modo etadâdo âzenahunguewâ-dyly. Aituo myani Deus eynynonro igueypy modo myarâ ietyby, kurâem itondylymo. <sup>53</sup>Tâkanâdobyrydâba egaselymo. Deus, Jesus kurâem nhetombygueduo myani akaemo idâly xidadâ Jerusalémram, Deus ijidadâryam. Târâ tâtyuneim modoram tâzehozemo myani.

<sup>54</sup>Sodadu Roma donro modo iwymâry, izodadury Jesus etaynrin modo warâ onro âzekânily tâensemo myani. Aidyly tâensemo warâ. Tientuomo, toenzepa kehoem myani âseandilymo. Aguelymo:

—Deus imery lelâlâ mynra merâ uguondo! —kelymo.

<sup>55</sup>Tâlâ myani târâ pekodo modo, iwaguelâ olâ nhedylymo. Jesus sakâ-jily iraynâ, Jesus Galiléia eynynâ atay, emawyadânibyry ani akaemo pekodo modo tâlâ tatomogue. <sup>56</sup>Maria (Magdala donro), Maria (Tiago, José warâ ise), Zebedeu imeom ise warâ myani iduaymo.

**Jesus eguepybyry tuhu  
imâsedo tâtagueim odaji  
nhetadâdomobyry**

(Mc 15.42-47; Lc 23.50-56;  
Jo 19.38-42)

<sup>57</sup>Iguandyly iraynâ uguondo tydinherugueim José saindyly, xidadâ Arimatéia donro. Jesus einwânni lâpylâ myani mâkâ. <sup>58</sup>Aituo José, Pilatosram idâly agueze:

—Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtagueim odaxi kâenkanâdoem. Tâwâlâ kâyntâguyândyly? —kely.

Aituo Pilatos, Jesus eguepybyry José nhatoem,

—Tâwâlâ —kely.

<sup>59</sup>Aituo José, Jesus eguepybyry kruz wâgâpa nhytâguyândyly. Xytâguyânibyryem intuwynly âtâ iwelo linhuguetogue. <sup>60</sup>Tyigueduo tâtaryem tiensaguehoymby odajilâ myani Jesus eguepybyry nhetadâdyly. Iwelo

esagueze myani mârâ tâtagueim. Myarâ eguepybyry ienipyryem nhenahunly tuhu imâsedogue. Ilâpygueduo, idâly. <sup>61</sup>Azagâ pekodo modo: Maria Magdala donro, Maria lâpylâ warâ Jesus eguepybyry etadâdobyrydâmolâ myani.

**Jesus eguepybyry etadâdobyrydâ guarda domodo âxidâdobyry**

<sup>62</sup>Páscoa etyry sakabygueduo, iguandyly ume akaemo kurâdo eynynâ Deus agâ aguewâni modo iwymârydo, fariseu domodo warâ idâlymo Pilatos agâ âtunâgueze.

<sup>63</sup>—Pymâ, tyiguely iraynâ, warâ keankâ Jesus aguely: “Yigueduo, azagâ<sup>p</sup> emedyly idyly wâgâ kurâem itonze urâ” nygue. Xirâ âkealâba kulâ aguehobyry enra xina nhenanâguely. <sup>64</sup>Awylygue Jesus eguepybyry etadâdobyry koendâ mânehonly xina ize ato. Azagâ emedyly idyly ara enipe târâ nidâ, eynynonrobyry modo eguepybyry nemagazebyra ito moem. Tienmagazeduo, “Jesus kurâem nitondâ” kezemo mawânkâ. Toenzepa iwerâ “Jesuslâ Messias” kelygue tonokudo einwânni modo. “Jesus kurâem itondybyem” kely nheinwândylymo watay lakuru ise aguykeho einwândyly inmolyo kuru —kelymo.

<sup>65</sup>Aituo Pilatos eyanmo aguely:

—Âdainkâba. Anra yzodadury modo. Idâzemo lelâ agâmo, azagâ emedyly ise târâ agâmo awyly, Jesus etadâdobyry eniem. Imawydâzemo, ânguy Jesus eguepybyry nynanâbyra itoem —kely.

<sup>66</sup>Aituo myani Roma donro sodadu domodo tagâ nhadylymo. Tâtagueim enahun-ho enahungueybyem awyly xutuho tyesimo myani, ânguylâ Jesus eguepybyry eydâ atoram ega-

wâniipyryem awyly tiuntuhoem. Adiempygueduo myani idâlymo. Sodadu domodo lelâ myani eniem âxiânrim.

**Jesus kurâem itondobyry**

(Mc 16.1-10; Lc 24.1-12; Jo 20.1-10)

**28** <sup>1</sup>Tâzekobyzegueho saka-bygueduo domingo pealâ pekodo modo Jesus eguepybyry etadâdobyryram idâlymo, Maria Magdala donro, Maria lâpylâ warâ. <sup>2</sup>Tadaguezim kulâ onro âzekânyly. Anju Deus ingonotyby myani Jesus eguepybyry etadâdobyry enahun-ho ejikeim. Tuhu imâsedo ejikeimbyryem myani nhonwa ekadyly. <sup>3</sup>Ielu ara kehoem myani ehuru, tapeke kehoem ety iwo gonro warâ. <sup>4</sup>Târâ eniem âxiâymbly modo tâseaneze myani, tadapânizemo warâ. Onro onwa ihuguewâdylymo myani, ekomadybyem.

<sup>5</sup>Anju kaynâpa âetyby pekodo modoram aguely myani:

—Tâseanezeba itaungâ. Tutuze urâ, Jesus mâwinlymo awyly, kruz onwa sakâjiby. <sup>6</sup>Tarâpa olâ mâkâ. Ipa, kurâem nitondai, aguehobyry aralâ! Etaungârâ etadâdobyryram. Ânguy lâpeba tarâ. <sup>7</sup>Inepa idâwâtaungâ, eynynonro modoram egatuze. “Kurâem nitondai! Waunroenlâ ise Galileiaram idâly. Târâ ise mâendylymo” kewâtaunda eyanmo. Auguehobyry ara ise aidyly —kely myani anju.

<sup>8</sup>Inepa kehoem pekodo modo Jesus eguepybyry etadâdobyry nhodokelymo. Toenzepa myani eanumo, iomarumo lâpylâ warâ. Egatudylymo Jesus eynynonro modoram tiengatuhomoem. <sup>9</sup>Jesus eagâmo toxioze myani. Aituo myani aguely:

—Âdapa lâwâne âmaemo? —kely.

—Âdapa —kelymo.

<sup>p</sup> 27.63 Nota de pé Mateus 12.40dâ egâ.

Iopaji saindylymo. Enado âzeguhoam idylymo. Ixinary tywymogoynzemo myani, koendonroem awyly wâgâ adâkezemo warâ.

<sup>10</sup>Aituo myani Jesus eyanmo aguely:

—Tâseanezeba itaungâ. Idâwâtaungâ. Ynynonro modoram aguewâtaunda. “Âwaynâmolâ ise Jesus idâly Galileiaram. Târâ ise âwânwândylymo. Ese âmaemo” warâ kewâtaunda —kely Jesus.

#### Guarda domodo xunâry

<sup>11</sup>Pekodo modo xinaram Jesus wâgâ agueze idâday myani guarda domodo ewy xidadâram odopâdylymo. Idânârâ tientyby ara myani kurâdo eynynâ Deus agâ aguewâni modo iwymârydoram nhegatulylymo. <sup>12</sup>Kurâdo eynynâ Deus aguewâni modo iwymârydo myani kurâdo nhutudyzeba akaemo tyam nhegatuyby. Aituo myani kywymârydo agâ âtunâgueze idâlylymo. Koendâ âtunâguedybyem myani toenzepa kehoem guarda domodoram dinheru nhudulylymo. <sup>13</sup>Warâ myani eyanmo aguelymo:

—Jesus eguepybyry wâgâ amyguehonly-ro watay, “Kopae xina xykyly ume Jesus eynynonro modo nâtâ, eguepybyry emagazeze” kewâtaungâ lelâne. <sup>14</sup>Pilatos âykyhomobyry wâgâ agâmo iewiâpadyly-ro watay, xina ise eagâ aguenri, inagazebyramo itoem —kelymo.

<sup>15</sup>Aituo myani guarda domodo dinheru nhemakely. Kurâdo eynynâ Deus agâ aguewâni modo iwymârydo

aguehobyry ara lelâ aguelymo. Arâ lelâ myani judeu domodoram nhegatulylymo, kypemugudoram. Xirâ tonokudobyry tâinwânselâ akaemo judeu domodo ewy iwerâ.

#### Jesus onze tynynonro modoram âepanâguehobyry

(Mc 16.14-18; Lc 24.36-49;  
Jo 20.19-23; At 1.6-8)

<sup>16</sup>Xina idâly Galileiaram. “Târâ ise kydoxiodyly” Jesus kehobyry iwy onwa xina âkuly. <sup>17</sup>Târâ Jesus tientuo, toenzepa kehoem xina iomazely. Enado xina âzeguhoam idyly. Koendâ awyly wâgâ xina aguely warâ. Tâlâ olâ ani xina ewy Jesuslâ awyly einwântânry. <sup>18</sup>Aituo Jesus xinaram saindyly, aguely:

—Deus kaynâ, onwâgâ alelâ pymâem witoem anygue. <sup>19</sup>Awylygue idâwâtaungâ awârâem kurâdope ato ara enomedâzemo, yeinwântoemoem. Yeinwâmpygueduomo, batiza ietaungâmo, ynynonroem, Pabai Deus eynynonroem, Deus Ispiritury eynynonroem warâ awylymo xutuhomoem. <sup>20</sup>Amitomoem inomedâdomobyry ara lâpylâ enomedâdaungâmo. Enanâguewâdaungâ, agâmolâ wawyly, koendâ nhetoemoem xypyry etaji kehoem —kely Jesus.

Alâ kulâ.

Mateus